

KUHLUTWA KWETAGA TESISWATI

David Pholile Thwala

KUHLUTWA KWETAGA TESISWATI

ngu

David Pholile Thwala

Kwetfulwa kwenelisa tidzingo teticu te-

MASTER OF ARTS

Etikweni LesiZulu Nemagugu


Enyuvesi YakaZulu

Umhloli: Dokotela PM Lubisi

Lusuku: 30 Kholwane 2006

SIFUNGO

Ngifunga ngiyacinisa kutsi **"Kuhlutwa Kwetaga tesiSwati"** ngumsebenti wami futsi yonkhe imitfombo yelwati lesetjentsiwe iboniswe ngalokufanele nekutsi lolucwaningo alumange luniketwe lesinye sikhungo semfundvo lephakeme ngenhloso yekutfolela ticu.



DP Thwala

SETFULO

Lomsebenti ngiwetfula ngalokukhulu kutitfoba kubabe wami Samuel, make Chrestinah nadzadzewetfu Nomoya, lababe ngumtfombo walolucwaningo.

Ngitsi kubo tifezekile tinhloso tabo noma bonkhe sebalifulatsela leli lelimagadze lahlabako.

Ngibuye ngiwetfula kukhosikati wami, Thembi nakubantfwana bami Gugu, Mphilisi naMandisa.

SIFINYETO

Lomsebenti ubuka kubaluleka, indzabuko nekusetjentiswa kwetaga tesiSwati. Kubukwa kunotsa kwelulwimi lokweyamele etageni njengemicambo yesive. Lulwimi lwesiSwati kuba lulwimi sibili ngetaga ngobe tingumgogodla walo.

Sehluko sekucala sikhombisa kuhleleka kwelucwaningo ngekuveta setfulo, tinhloso, tindlela, umkhawulo nebudlelwano betaga naleminye imibhalo yakadzeni noma bucikomlomo.

Sehluko sesibili sigcamisa kucambeka kwetaga lokutsintsa titfoluvelo, tento tebantfu, inkholelo, inkholo, umlandvo, tinganekwane, tilwane letihucutelako naletihambako, tilwane tasendle netasekhaya, timila nemifula.

Sehluko sesitsatfu sibuka tingcikitsi letehlelene letilandzelako: yekuganana, yekucaphelisa ngengoti, yekusonga, yekufa, yebuwula, yenkhani, yemashwa, yekungabi nebuntfu, yekutigcabha, yekukhuliswa, kwebantfwana, yekungabi nebuntfu, yekutigcabha, yelufuto, yekwehluleka, yelunya nekuphatsana kwebantfu.

Sehluko sesine sikhombisa kwakheka kwetaga ngekwetinongo tenkhulumo, tifo tenkhulumo nekusebenta kwato ngaphasi kwelubumbomisho (syntax).

Sehluko sesihlanu sigcamisa imiphumela yelucwaningo (research findings) ngaphasi kwemvelaphi yetaga, ingcikitsi yetaga nekwakheka kwetaga. Kubuye kugceme netincomo letiyewusita labanye bafundzi, bacwaningi nabosotilwimi.

LOKUCUKETFWE

SEHLUKO 1

1.0	SETFULO SELUCWANINGO	
1.1	SINGENISO	1
1.2	TINHLOSO TELUCWANINGO	9
1.3	TINDLELA TELUCWANINGO	9
	1.3.1 Indlela Yekufundza Tincwadzi	10
	1.3.2 Indlela Yemibuto	10
1.4	IMIGUDVU YELUCWANINGO	10
	1.4.1 Umgudvu wemlandvo	10
	1.4.2 Umgudvu wengcikitsi	13
	1.4.3 Umgudvu wemsebenti	15
1.5	UMKHAWULO WELUCWANINGO	16
1.6	UMLANDVO LOMFISHANE WESIVE SEMASWATI	16
1.7	LUHLAKA LWEMSEBENTI	20
1.8	SIPHETFO	21

SEHLUKO 2

2.0	IMVELAPHI YETAGA	
2.1	SINGENISO	22
	2.1.1 Taga yinkhulumo yebantfu	24
	2.1.2 Kwenaba kwetaga	25
	2.1.3 Emakhono ekuchumana	27

2.2	TAGA LETICAMBEKE NGETITFOLUVELO	30
2.3	TAGA LETICAMBEKE NGETENTO TEBANTFU LABATSITE	30
2.4	TAGA LETICAMBEKE NGEKWENKHOLO YESINTFU	31
2.5	TAGA LETICAMBEKE NGEKWENKHOLO	33
2.6	TAGA LETICAMBEKE NGEBUGANEKWANE	35
2.7	TAGA LETICAMBEKE NGEMIFULA	40
2.8	TAGA LETICAMBEKE NGETINTFO LETIFIKE NEBELUNGU	41
2.9	TAGA LETICAMBEKE NGETENTO TEBANTFU TEKUPHIKELELA	41
2.10	TAGA LETICAMBEKE NGETILWANE TASEKHAYA	41
2.11	TAGA LETICAMBEKE NGALOKUMILAKO	41
2.12	TAGA LETICAMBEKE NGETINYOKA	42
2.13	TAGA LETICAMBEKE NGEKWETIGODZI	43
2.14	TAGA LETICAMBEKE NGETINYONI	47
2.15	TAGA LETICAMBEKE NGETINKHOMO	48
2.16	TAGA LETICAMBEKE NGEMANTI	48
2.17	TAGA LETICAMBEKE NGEKWETIKHUNDLA	49
2.18	TAGA LETICAMBEKE NGEKWEMLANDVO	49
2.19	SIPHETFO	50

SEHLUKO 3

3.0	KUHLELEKA KWETAGA NGEKWETINGCIKITSI	
3.1	SINGENISO	52
3.1.1	Sikhatsi	53
3.1.2	Indzawo	53
3.1.3	Sive	53
3.2	INGCIKITSI YEKUPHATFWA KWEMITI	55

3.3	INGCIKITSI YEKUGANANA	57
3.4	INGCIKITSI YEKUCAPHELISA NGENGOTI	60
3.5	INGCIKITSI YEKWELULEKA	63
3.6	INGCIKITSI YEKUSONGA	65
3.7	INGCIKITSI YEKUFA	66
3.8	INGCIKITSI YEBUWULA	69
3.9	INGCIKITSI YENKHANI	71
3.10	INGCIKITSI YEMASHWA	73
3.11	INGCIKITSI YEKUNGABI NEBUNTFU	74
3.12	INGCIKITSI LEPHATSELENE NEKUTIGCABHA	76
3.13	INGCIKITSI YEKUKHULISWA KWEBANTFWANA	78
3.14	INGCIKITSI LETSINTSA LUFUTO	81
3.15	INGCIKITSI LEPHATSELENE NEKWEHLULEKA	82
3.16	INGCIKITSI YEKUTIPHINDZISELA NELUNYA	84
3.17	INGCIKITSI YEKUPHATSANA KWEBANTFU	85
3.18	SIPHETFO	88

SEHLUKO 4

4.0	KUHLELEKA KWETAGA NGEKWESAKHIWO	
4.1	SINGENISO	89
4.2	SIGCI ETAGENI	90
4.3	LINANI LEMAGAMA	92
4.3.1	Emagama lamabili	95
4.3.2	Emagama lamatsafu	96
4.3.3	Emagama lamane	97
4.3.4	Emagama lasihlanu	98

4.4	IMISHO	90
4.4.1	Saga njengemusho wekucala	101
4.4.2	Saga njengemusho wekugcina	102
4.4.3	Saga njengemusho losekhatsi	103
4.5	KUPHENDVULEKA KWEMIBUTO	104
4.6	TITFO TENKHULUMO	105
4.6.1	Sibanjalo	107
4.6.2	Emabitombaca	108
4.7	TAGA LETISAKUPHIKA	109
4.8	BUNYE NEBUNYENTI ETAGENI	111
4.9	IMICONDVO LECUKETWE TAGA	114
4.10	TINONGO TENKULUMO	116
4.10.1	Sifaniso	117
4.10.2	Sifanisongco	119
4.10.3	Simutfutiso	120
4.10.4	Sicatsaniso	121
4.10.5	Sifutangwaca	123
4.10.6	Sifutankhamisa	124
4.10.7	Secamagama	124
4.11	IMIFANEKISOMICONDVO	125
4.11.1	Imifanekisomicondvo lebonakalako	126
4.11.2	Imifanekisomicondvo levakalako	126
4.11.3	Imifanekisomicondvo lehogelekako	127
4.11.5	Imifanekisomicondvo letsintsekako	127
4.11.6	Siphetfo ngemifanekisomicondvo	127

4.12 TAGA NEMISHO	128
4.12.1 Taga	129
4.13 SIPHETFO	131

SEHLUKO 5

5.0 SIPHETFO SELUCWANINGO

5.1 SINGENISO	133
5.2 SIPHETFO NGEKUCAMBEKA KWETAGE	134
5.3 SIPHETFO NGETINGCIKITSI ETAGENI	136
5.4 SIPHETFO NGEKWAKHEKA KWETAGA	138
5.5 SIPHETFO NGEMIBONO LEYEHUKENE YETAGA	143
5.6 TINCOMO	144
IMITFOMBO YELWATI	146

SEHLUKO 1

1.0 SETFULO SELUCWANINGO

1.1 SINGENISO

Buciko bemlomo bubanti ngobe butsintsa tincenye letehlukene njengetaga, tisho, tiphicaphicwano naletinye. Lucwaningo lwetfu lutawubuka taga njengencenye yebuciko bemlomo. Kutawubukwa imvelaphi yetaga, umsebenti wetaga ekutfufukiseni lulwimi nekubaluleka kwato esiveni jikelele.

Taga tisisekelo kulabo labafundza lulwimi lwekucala lizinga lelisetulu, ngako-ke kumele tihlatiywe futsi tihlatiyisiswe. Kubalulekile kutsi kubukisiswe simo, kunjalo nemisebenti yetaga. BeTswana babita taga batsi **diane**, tisho **maele**. BaPedi taga batsi **diema**, tisho **dika**. EmaZulu taga atsi **izaga**, tisho **izisho**. EmaChoza atsi taga **amaqhala**, tisho **izaci**. Bahluti labanyenti bemaSwati abawuveti umehluko, losekhatsi kwetaga netisho, ngako-ke kubonakele kufanele kutsi kubukwe taga ngendlela lejulile.


Taga tiyinkhulumo lenemlandvo lomudze njengesive lucobo. Akekho lowati kutsi taga tacala nini kubakhona futsi akusilula nekufanekisa. Taga tithfolakala kulo lonkhe luhlobo lwebuciko bemlomo, ngako-ke tisisekelo semphilo. Lokugcamako ngetaga kutsi tingemavi lahlakaniphile, lanemcondvo lobumbene lophinyiswa kuvakale.

Taga tikhali letibalulekile futsi letinemandla telulwimi. Kujula nekunotsa kwelulwimi kulinganiswa ngekubuka taga. Taga tisilinganiso selikhono lekukhuluma nekubeka indzaba ivakale kahle.

TAGA NEBUDLELWANO BATO NALEMINYE IMIBHALO

Imibhalo Lemidzala/Bucikomlomo

Imibhalo Lemisha



Taga tiyinkhulumo legcamisa Inhlonipho ngaso sonkhe sikhatsi ngenca yekungagaguli letikushoko.

Inhlonipho ibaluleke kakhulu esiveni semaSwati ngobe isisekelo nemgogodla wemphilo. Sive kuba sive lesihloniphekile nalesatiwako ngenhlonipho. Inhlonipho ihambisana naleminyane imikhakha yemphilo lefana nebuntfu, inkholo, imvelo, emasiko, imihambo, lutsandvo, umbusave nebucwepheshe.

Inhlonipho igcama ebantfwaneni nasebantfwini labadzala, etindzaweni nasetikhatsini letehlukene. Sive semaSwati sakhiwe ngebantfu labagcogceleke ndzawonye balandzela emasiko nemihambo lefananako futsi bakhuluma lulwimi lunye ngaphasi kwembuso wenkhosi yinye.

Taga betisetjentiswa kadzeni, kantsi nalamuhla tisasebenta ngenhloso yekubeka emavi lamnandzi ngendlela lekhombisa kuhlakanipha. Taga tisayawusetjentiswa nangemuso. Buntsengu bemuntfu loliSwati bugcanyiswa taga.

Sibonelo:

Saga: Ingwenya ishelwe sitiba.

Inchazelo: Bucili bakhe buphumele ebaleni.

Lapha kucondziswe kumuntfu lolicili, kepha lochuba bucili bakhe ngendlela lefihlekile. EmaSwati avele asebentise saga kuveta loko lokuvelele loyomuntfu. Lesinye sibonelo ngulesicondziswe ebantfwini labevanako futsi lababonakala bandzawonye njalo:

Saga: Tifupha tiya emasini.

Inchazelo: Abahlukani, bevana kakhulu.

Taga tiyindlela yekuchumana lekhombisa buciko nelikhono lelihle. Timisho lemifishane lephakatsile, legcogcene, lenemandla, lenemcondvo, lokhutsatako nalonesisekelo. Timisho lefundzisako, lenemaciniso nalenembako. Thwala (1986:9) uphawula ngemehluko lokhona ekhatsi kwetaga netisho utsi:

Both proverbs and idioms depict a richness of the language, but the main differences are that, the former remain fixed and unchangeable, didactic and not easily learned by a person who is not a speaker of that language, while the latter are not didactic, alter depending on syntactical construction and learned by any person without any difficulty.

Buhle bembhalo beyame etageni. Uma umbhalo ungenato taga ufana

nekudla lokuphekiwe kwangatselwa sawoti. Kuyo yonkhe imibhalo lebhaliwe kuye kubutwe umbuto munye lotsi: Ngabe tikhona yini taga? Taga tisisekelo selulwimi.

Taga ticondzene nemphilo yebantfu. Libhayibheli (1997: 874) lichaza kabanti ngetaga litsi:

Timfundziso tencwadzi yetaga tinakisisa kuphila kwebantfu kwemihla ngemihla. Tikhuluma ticondzane nemindeni kanye nekutsintsana nalabanye bantfu, titsintse nendlela yekutiphatsa kahle embikwemakhosi nasemikhosini ...

Thwala (1996:48-49) ugcamisa lombono lalandzelako:

Taga tisisekelo selulwimi. Tikhombisa kujula kwelulwimi lwesive, kubaluleka kwalo, kunotsa nekutfufuka kwalo. Tiindlela yekusho intfo ngemavi lambalwa, lagcizelelako nalahehako. Taga atigucugucuki, tingasetjentiswa netikhatsi letehlukile tesento kodwa tona tisale tinjalo.

Bonkhe bacwaningi labacashuniwe bagcamisa kutsi taga tibuntsengu, bugabazi, imisho lemifishane lengagucuki nekugcogceleka ndzawonye kwemicondvo. Taga tinemlandvo lojulile ngobe tikhombisa sikhatsi sakadzeni nesanyalo kanye netindzawo lapho kwenteka khona tigateko letitsite.

Kuniketa umcondvo logcogcela ndzawonye imibono yebacwaningi labanyenti kuvetwa ngulamaphuzu lalandzelako:

- * Saga buciko bekusho intfo.
- * Saga ngemavi lambalwa lashubile.
- * Saga bugabazi bekuhlela emagama.

* Saga ngumusho lophelele.

Minyenti imibono levetwa bacwaningi labehlukene ngetaga njengencye yebuciko bemlomo. Imibono yabo igcina inekuhambisana nekuvumelana etikhatsini letinyenti.

Simelane naThwala, (1981:1) *baveta lombono lolandzelako ngetaga:*

Tikhombisa bugabazi besive. Tikhombisa kahle kutsi buciko nebuntsengu bebukhona esiveni semaSwati kusukela endvulo. Timisho lemifishane, leshubile futsi legcogcela ndzawonye umcondvo locuketse lokutsite.

Bhiya (1993:73) *uveta umbono lolandzelako ngesaga:*

Siyindlela lemfisha yekuchaza simo sentfo nobe yekubeka inkhulumo ngendlela lefinyetako. Saga sijulile ngemcondvo sikhombisa indlela yekusebentisa emagama ngekuhlakanipha. Uma sicwaningisisa kahle, linyenti letaga linemlandvo leliwucocako ngesive mayelana nekutsi kwasukelaphi kute sibe khona.

Mavuso naMakhanya, (1994:6) *baveta lombono:*

Saga simusho lophelele lobeka emaciniso njengobe anjalo. Simusho longagucuki nanini, kodvwa lekumele uhlale unjengobe unjalo. Saga singemavi lahlakaniphile latsintsa imikhakha letsite yempilo. Siyinkhulumo lebumbene, lebeka umcondvo lophelele. Umusho uba nenhloko, silandziso namentiwa; ngako-ke naso saga sigcamisa loku lokutsatfu.

Taga tikhulunywa onkhe emalanga. Tiyincenye yemphilo ngobe tivakala imihla nemalanga tigcamisa inhlakanipho, kujula kwemicondvo, kunotsa kwelulwimi nekufundzisa. Asikho sikhatsi lebesihlelelwe kucanjwa kwetaga, kepha kucanjwa kwetaga bekutentakalela nje njegobe kusenteka nalamuhla. Loku kuveta kusebenta ngalokujulile kwemicondvo yebantfu labatsandza lulwimi lwabo.

Lulwimi lolumunyiwe kumake lusisekelo semphilo ngobe wamunya lona, uphupha ngalo, uchumana nebantfu kalula ngale. Taga tingumgogodla welulwimi lwasekhaya. Bushney kuGroenewald (1990:89) uphawula utsi:

Proverbs are syntactically immutable forms of idiomatic usage of language (except for variations in wording and abbreviations) with the semantic implication of expressing a moral lesson or distilled wisdom. They are often recognized by virtue of a characteristic linguistic organisation, typical syntactical organisation and/or verse structure.

Taga tiyincenye yemasiko nemihambo yesive ngobe tikhutsata kwenta tintfo letinhle, tifundzise ngetinchubo letemukelekako, tibuye figcugcutele kuchumana ngekusebentisa tiffombemagama letihehako naletikitaza imiva. Akusibo bonkhe bantfu labakwati kutsaka inkhulumo ngetaga ngoba tiletsa bumnandzi nebuhle bululwimi. Uma sikhulumi sikhuluma siye silalelwe bantfu bonkhe lapho inkhulumo yaso inongwe ngetaga. Buhle belulwimi beyame etageni.

Taga tenta umsebenti lomyenti emibhalweni lenjengalena:

- * Tihlobisa indzaba tiyente ihehe, ilandzeleke futsi ikhumbuleke kalula.
- * Timisho lenenhloko nesilandziso futsi leniketa imicondvo lephelele.

- * Tigcamisa kujula kwelulwimi ngekusebentisa tiffombemagama letinyenti letifuna imicondvo lejulile.
- * Tingumgogodla welulwimi. Tiyinsika yelulwimi kulo lonkhe luhlobo lwembhalo ngenca yekujula kwato, kuletsa buhle nebumnandzi kanye nekugcamisa likhono.
- * Tiyinkhulumo lebumbene, lehlakaniiphile nalehlanganisa emasiko nenchubo yesive.
- * Tisilinganiso sekutfutfuka kwelulwimi, emandla ebugabazi nebuntsengu besive.
- * Tingumnotfo wesive nesibuko semaciniso, imivila yemphilo kusukela kuDlamini l kuye kufinyelele engwenyameni lebusako nyalo.

Simelane nalabanye (1998:15) baniketa inchazelo ngesiZulu legcogcela n dzawonye imicondvo leyehlukene ngetaga:

- * Okuphawulekayo ukuthi izaga zethula amaqiniso angephikiswe. Konke lokhu okutholakala kuzona izaga kukhona lapho kusukela khona. Iqiniso lakhona lihlezi sobala lingephikiswe futhi.
- * Okunye okuphawulekayo ngesaga ukuthi asiguquki nenkathi. Ngamanye amagama sihlala sisenkathini eyodwa. Ungeke futhi usithole sisebunyeni noma ebuningini.
- * Siye sithole isaga esisuselwa emlandweni owaziwayo kepha esingumsuka wesenzeko esithile esagcina sesinobunganekwane ngenxa yokungakholeki kwaso njengokuthi, "Uyohamba ubuye okwengubo kaZiyongo" Lesi yisigameko esithinta umlingiswa owake waphila emlandweni kepha okunobunganekwane indlela isigigaba leso esenzeka ngayo.

- * Siyaphawula futhi ukuthi njengoba izaga sithi zijulile ngokomqondo kungenxa yolimi olushubile oluye luhambisane nezifenko ezitholakale ezinkondlweni. Kungakho sithi izaga zinobunkondlo ngenxa yolimi ezinye nangesakhiwo sazo sangaphandle.
- * Okunye esikuphawula ngesaga ukuthi siwumusho onomqondo ophelele, kanti siyakwazi ukuzimela sodwa singancike ndawo. Uma nje kuthiwa: ì Induku elukhuni ima esiweni akusadingekile ukweluleka komusho onamanye amagama ukuze kutholakale umqondo waso. Lowo ozwe lawo mazwi useyazi ukuthi izinto ezinhle umuntu uyazenzela yena ngokwakhe.

Nyembezi (1974:xii) uniketa umcondvo lowendialekile ngetaga lapho atsi:

Proverbs are a useful means of studying a people. They show how very observant the people are, for the habits of birds and animals, and the behaviour of nature in general, do not go unobserved. They reveal what it is that people adore, and what it is they hate; what they respect and what they despise. They reveal what the people's outlook on life is and will provide the student of human nature a peep into the character of a people.

Emaciniso lavetwa taga sitawuwabona lapho sesibuke ingciki si nenchazelo yetaga. Ingucuko yetaga ngekwetikhatsi itawuhlolwa ihlatiye esehlukweni sesine. Umlandvo wetaga utawubukwa esehlukweni sesibili, lulwimi netinongo tenkhulumo esehlukweni sesine.

1.2 TINHLOSO TELUCWANINGO

Tinhloso telucwaningo kubukisisa taga tesiSwati ngekwetindzikimba noma tingcikitsi letehlukene. Kucwaningisisa kahle ngebuhle nekubaluleka kwato emikhakheni yemphilo leyehlukene.

Kucwaninga ngemvelaphi yetaga, kucambeka kwato, budlelwano bato netindzawo netikhatsi kanye neligameko letigcamile. Kufundzisa kabanti ngemisebenti yetaga ekutfufukiseni lulwimi nasekwakheni sive sonkhe.

Kubukisisa kuhleleka kwetaga ngekwelinani lemagama, imisho, tikhatsi, tiffo tenkhulumo naletinye tincenye. Kubuka taga ngekweluhlelo lwelulwimi nekugcamisa imicondvo lebalulekile lesisekelo semphilo.

Kubuka tingcikitsi letibalulekile emphilweni letigcanyiswa taga njengaleti letilandzelako buntfu, imphumelelo. Lubambiswano: imvelo, kufa, naletinye.

Kuhlolisisa kujula kwelulwimi lokuletfwa tiffombemagama letitfolakala etageni. Lapha kugcama kwakheka kwetaga kwangekhatsi lokuvetwa tinongo tenkhulumo.

Kwakheka kwetaga kwangaphandle (external structure) kutawuhloliswa ngekubuka kwakheka kwemagama lakhe taga nemiphumela yawo ekuletseni imicondvo lephelele yetaga.

1.3 TINDLELA TELUCWANINGO

Bacwaningi baye basebentise tindlela letinyenti tekucwaninga, kepha lapha sitawubuka tindlela letimbili kuphela: yekufundza tincwadzi neyekubuta imibuto.

1.3.1 Indlela Yekufundza Tincwadzi

Lapha kutawufundwa tincwadzi letiphatselene netaga. Kutawuba tincwadzi letibhaleke ngetilwimi lehlukene, kepha letitsintsa taga.

1.3.2 Indlela Yemibuto

Kutawubutwa imibuto ebanfwini labadzala lekungibo tinsika telulwimi, timphandze tesive, emahlahlandlela netisekelo temphilo kutfolakalisise kahle kubo kutsi:

- * Siyini saga?
- * Sibaluleke ngani saga?

Kutawubutwa netichwichwichi ngemakhono ekwakheka kwesaga lekumele agcanyiswe anekelwe live ngenhloso yekukhombisa buciko besive ekusebentiseni lulwimi.

1.4 IMIGUDVU YELUCWANINGO

Imigudvu yelucwaningo letawulandzelwa lapha ngulena lelandzelako: yetingcikitsi (thematic approach), yemlandvo (historical approach) neyemsebenti (functional approach).

1.4.1 Umgudvu wemlandvo

Lapha kubukwa umlandvo wesaga nendlela lesicambeke ngayo. Kuyatiwa kutsi kunetago letindzala kakhulu, kepha akusilula kwati iminyaka letacambeka ngayo. Umlandvo wesaga uye ukhonjiswe

balingiswa noma bantfu labatsite labatsintsekako kuleso saga. Uma sisebentisa saga lesitsi, Wamhabisa kwelituba laNowa. Kuye kwatiweke bekusikhatsi saNowa futsi sento lesichumene nelivi lelingcwele.

Kubalulekile sati kutsi kungaba umlandvo loweyame kumuntfu, sento, live nalokunye. Umlandvo ubaluleke ngekutsi usikhumbuta kwayitolo nekwakutsanti, bese kuba sendlalelo sekwangemuso. Akekho umuntfu lowati iminyaka yekucambeka kwetaga, ngaphandle kwekudalula kutsi taga tindzala futsi tijulile.

Esiveni semaSwati taga tinyanyaniswa netingwenyama nebanakabo noma lusendvo. Ingwenyama kuba yingwenyama lenesisekelo ngekwesekelwa yindlovukati. Kasenene (1993:94) uphawula ngekubaluleka kwendlovukati ekusekeleni ingwenyama kanje:

In his kingly duties, Ngwenyama is supported and assisted by many officials the most important being the Queen Mother. The mother of the King, whether real or ritual. Is the most important person in the kingdom, next to the King. She has her own establishment with her own estate, Indlovukati plays an important part in the day to day running of the country as the King's chief adviser and she automatically becomes the Head of State when the King is away or dies. Her role, however, is primarily ritual since she is the priestess of the royal ancestral cult and the custodian of the royal medicines.

Taga letikhombisa kubaluleka kwelusendvo lwebukhosi nguleti letilandzelako:

* Ngwane kawulali kulala emehlo.

- * Ungumholinchanti unguMatalatala yini?
- * Emanaphanapha umhlolo waMbandzeni.
- * Ubitwa nkhalo tonkhe njengaMahlokohla.
- * Umgwami longavutfwa nasetiko.
- * Wadla ludledle njengaMbilini.
- * Ngumtsimba waMkabayi!
- * Emabon' abonane lashiwo nguGcugcwa.
- * Nginetseteke ngiyindlovukati yini?
- * Ngifunga Somcuba kuletimakheleketse.

Taga tenta sivumelane nesisho salabadzala lesitsi, kukhuluma kusebantfwini ngobe tikhombisa injulalwati ngekutsintsa tigameko ngelikhono lebusiko bemlomo nemlandvo ngekusebentisa emagama emakhosi noma lusendvo lwasebukhosini.

Kulindzelekile kutsi labanye basho batsi: Amange ngisive leso saga naseJuteni! Kutawube kuliciniso loko ngobe umuntfu uye angalwati lonkhe lulwimi futsi angatati tonkhe tigameko. Kwendlala kwematsafa elive lemaSwati kuyenta kutsi kubekhona lokwatiwa kuletinye tigodzi noma tifundza, kube kungatiwa kuletinye. Ngwane angeke umcedze ngobe umtfolakahlolohlo, eLubombo, eShiselweni, eNgwenya, eHlanzeni, eMsukaligwa, eGauteng jikelele naseMkhanyakudze.

Umlandvo wemaSwati weyame kakhulu etingwenyameni, banakabo netindlovukazi.

INGWENYAMA	BANAKABO
Ngwane III	Ndilela Mgabhi Langwenya
Zikodze	Mhlambi LibaNdzinisa
Sobhuza I	Phangodze NgcayiniSobandla
Mswati II	Malambule MsukusukuSomcuba
Mbandzeni	Mbilini Dludluma Gija
Mahlukohla	Malunge Klebe Mhawu
Sobhuza II	Mnduze Makhosikhosi Mlumbi

INGWENYAMA	INDLOVUKAZI
Ngwane III	LaNxumalo
Ndvungunye/Zikodze	Lomvulo Mndzebele
Sobhuza I	Lojiba Simelane
Mswati II	Tsandzile Nxumalo
Mbandzeni	Sisile Khumalo
Mahlukohlo	Labotsibeni Gwamile Mdluli
Sobhuza II	Lomawa Nxumalo

Umlandvo utsintsa emakhosi, labo labasondzelene nebukhosi, bantfu labadvumile netigameko letinkhulu letase tenteka.

1.4.2 Umgudvu wengcikitsi

Lapha kubukwa umnyombo wetaga ngekutsintsa letikushoko, letikufundzisako naletikukhutsatako. Nyembezi (1974:46-47) uhlele taga ngekwemagcogco lalishumi kanje:

- * Buntfu: kutiphatsa kahle nekuba nesimilo lesihle, lesikhutsatako, lesilandzelelekako nalesihehako.
- * Kwetsembeka nekungetsembeki: bucoffo, inkhohliso, bucili, nekungabi nesimilo.
- * Buhlobo nebutsa: Kubambisana, tinsongo, imphindziselo, emagcubu nebulwane.
- * Imphumelelo, inhlanhla nemashwa: lapha kubuye kutsintseke kukhutsateka, kwehluleka, tinkinga, kuphetelwa, ngemandla, kusebentela lite, nalokunye.
- * Buchawe nebugwala

- * Emakhaya: Kutsintseka imphilo yelikhaya, umtsimba, lusendvo, buhlobo, budlelwane ekhatsi kwemtali nemntfwana, ingcoco nemadloti.
- * Kwedlula kwemihla: Kufa, kuguga nekuphela kwesikhatsi.
- * Inhlonipho nebuwula
- * Tecwayiso: Kubalekela ingoti, kwenta tintfo ngesikhatsi lesifanele, kubonga, kukhuliswa kwebantfwana naletinye.
- * Letibhicene: Lapha kubutsetwe ndzawonye leto letingangeni emagcogcweni langenhla.

Umcwaningi utawulandzela lenye indlela yekuhlela taga ngekwetingcikitsi letiticuketse, bese kucwaningwa nangemagama lasetjentisiwe etageni. Kuleso naleso saga kutawuniketwa inchazelo. Luhla lwetingcikitsi lolutawubukwa ngulolu:

- * Kuphatsana kwebantfu.
- * Kuphatfwa kwemiti.
- * Kuganana.
- * Kucaphelisa ngengoti.
- * Kweluleka.
- * Kusonga.
- * Kufa.
- * Buwula.
- * Inkhani.
- * Emashwa.
- * Kungabi nebuntfu.
- * Kutigcabha.
- * Kukhuliswa kwebantfwana.
- * Lufuto.
- * Kwehluleka.

* Kutiphindzisela nelunya.

Tinyenti tingcikitsi letikhona letibonakala etageni tesiSwati, kepha kulolucwaningo sitawubuka leti letibalwe ngenhla sigcile kuto.

1.4.3 **Umgudvu wemsebenti**

Lapha kutawubukwa kusetjentiswa kwetaga njengemisho lehlangene:

Saga ekucaleni kwemusho.

Saga ekhatsi nemusho.

Saga ekugcineni kwemusho.

Kutawubukwa kusebenta kwetaga ngekwetikhatsi tesento Tibonelo:

Saga: Umkhosi uhlatjwe nguBebesha.

Inchazelo: Phutfuma uyewutibonela.

Sikhatsi: Lesengcile.

Saga: Yawucitsa umutsi inkhonyane.

Inchazelo: Sekonakele.

Sikhatsi: Sanyalo.

Kutawubukwa kwakheka kwetaga ngekwetiffo tenkhulumo, tinongo tenkhulumo, imicondvo letiyivetako nekuhleleka kwemagama etageni kugcame umdvumo.

Kusetjentiswa kwetaga kutawugcama ngekwetindzawo: ebandla, emphakatsi, esontfweni, njalonjalo. Timo lekusetjentiswa taga ngaphasi kwato tiye tibukwe ngenhloso yekukhombisa emaciniso lakhulunywako,

kunotsa kwelulwimi nekugcamisa emasiko nemihambo yesive.

1.5 UMKHAWULO WELUCWANINGO

Lucwaningo lugcile etageni njengencenye yetemdzabu kuphela. Leminye imikhakha njengetinanatelo, tibongo, tisho, tiphicaphicwano n a l e m i n y e , itawutsintfwa njengemachakela.

Lucwaningo lutsintsa tonkhe findzawo letihlala emaSwati: Umbuso weSwatini nesifundzave iMpumalanga.

Taga tibukwa ngekwetingcikitsi, ngekwemvelaphi, ngekwemlandvo nangekuhleleka kwato.

1.6 UMLANDVO LOMFISHANE WESIVE SEMASWATI

EmaSwati adzabuka eNkhabave. Ngaleso sikhatsi bekutive talabamnyama letihlangene. Mafsebula (1972:4) uchaza kanje:

The Bantu speaking communities began to move southwards from Central Africa. There were various factors which contributed to the southward movement of these communities. The factors included the search for new pastures for their domestic animals, a desire for adventure, inter-tribal wars and so on.

Letive tacala kwehlukana ngemasiko, ngekwetinkholo, ngetemnotfo, ngetembusave, ngetetilwimi nangemasu ekuphaka nekulwa timphi. Labadzala nebatekeli batsi emaSwati abeholwa ngumholinchanti wawo Matalatala lobebuye atiwe ngekutsi nguDlamini I. Dlamini wekucala watala emadvodzana

Iamabili boMswati wekucala, lokunguye uyise wesive semaSwati naMtfongo, longuyise wesive semaTfonga.

Dlamini wesitsatfu nguye lowahola sive kusuka ngaselwandlekati iNdiya, waya ngaseNshonalanga edvute nemfula iNgwavuma endzaweni leyatiwa ngekutsi kuseMavaneni. Kulapho kwachutjwa khona kugidvwa kwencwala. Lilawu lenkhosi belisedvute nemfula luPhongolo indzawo yatiwa ngekutsi kuseZibayaneni. Ngwane wesitsatfu lowabe atalwa nguDlamini wesitsatfu wayishiya lendzawo etiveni letilandzelako: takaNyawo, Mngomezulu nesakaMatsenjwa.

Ngwane wesitsatfu wahamba wayewukwakha lilawu lakhe emagcumeni eMagudu. Wabuye wayishiya leyondzawo wayewukwakha ngasesihosheni iMzinsangu wayibita ngekutsi kukaZombodze. Sikhulu sakaZombodze kwaba nguMasenjana Nsibandze. Lelinye lilawu walakha kaHhlhho lapho abeka khona Mndindane Shiba waba sikhulu. Ngwane wesitsatfu wakhotsama ngemnyaka wanga - 1780 washiya indvodzana yakhe Zikodze lobebuye atiwe ngekutsi nguNdvungunye, atalwa nguLomvulo Mndzebele.

Ndvungunye wakha kaLobamba lapho bekuhlala khona unina. Sikhulu sakaLobamba kwabekwa Danile Nkhambule. Lilawu laNdvungunye beliseShiselweni lapho sikhulu sakhona kwaba nguMahagane Hlophe. Ndvungunye wabusa sikhatsi lesincane ngobe waba nelishwa lekushaywa ngumbane wakhotsama. Washiya emaphovela lamatsatfu Somnjalose, Lojiba naLaLukhele. Somnjalose abeyinhlangi yaLojiba. Watala Somhlolo labebuye atiwe ngekutsi nguSobhuza wekucala.

Uma ingwenyama isandza kukhotsama, leyondvodzana lejutjelwe kutsi ibuse iye ihlale iminyaka lencunyiwe, esikhatsini lesinyenti ibamitsatfu ingabonani nalabatilile. Indzawo leyakhelwa yona ibitwa ngekutsi umtsangala. Ihlala lapho

ibe ingaphasi kwetandla temadvodza latsembekile esiveni. Uma kutila sekwengcile, nelihlambo selentiwe umntfwanenkosi uyasuswa endzaweni abebekwe kuyo angabonani nebatali ngisho nenina imbala, ayiswe kulenye leyakhiwe leyatiwa ngekutsi lusasa. Unina wemntfwanenkosi uyasuswa lapho kukhotsamele khona inkhosi asiwe lapho kunendvodzana yakhe khona kulo lusasa. Umtsangala uyadzilitwa, lusasa bese luniketwa ligama lelisha lebhukhosi. Kulapho-ke kutawuncunywa khona tindzaba telive. Phela inkhosi ayibuseli lapho bekubusa khona uyise. Indlovukati iye ihlale emphakatsi, inkhosi itakhele lilawu layo kulenye indzawo.

Somhlolo wasihlanganisa sive semaSwati ngekugcogcela tive letinyenti letincane ndzawonye. Wakhombisa kubambisana nemakhosi abenemandla angaleto fikhatsi boZwide wakaNdwandwe naShaka wakaZulu. Somhlolo wacanjwa lelibito ngetizatfu letimbili:

- * Uyise Ndvungunye wabulawa ngumbane intfo leyenteka kwakhutwa umhlolo eveni lonkhe.
- * Kungena kwaSomnjalose endlini kwacaka ngobe watsi nakatala Somhlolo kwadzingeka kutsi kubitwe inyanga yesive itewulekelela ngoba amange atalwe njengebantfwana bonkhe. Loko kwaba ngumhlolo esiveni sonkhe.

Mswati wesibili walandzela uyise Somhlolo ngekubusa. Wakha emalawu akhe Ekufinyeni nakaHhohho. Sigodlo sakhe besiseLudzidzini. Yinkhosi leyabusa ngalokukhulu kutetsemba ngobe yaphumelela kuvula iminyele yesive seMaswati yayewufinyelela emfuleni iNdubazi kulelisenhla, yacinisa bunini nebaseMgazini, Hlatjwako, Sibiya nalabanye eningizimu. Yahlangana nebakaMatsenjwa, Temba, Zikhali, Ngubane nalabanye emphumalanga. Yacinisa buhlobo bayo nebakaNhlapho etigodzini teLigwa.

Mbandzeni wabusa ngesikhatsi lesilukhuni lapho tive letinyenti betifuna kudla live lemaSwati. Kwaliwa nebaPedi, emaZulu, emaBhunu naletinye. Lilawu laMbandzeni beliseMbekelweni, kantsi sigodlo siseNkhanini. Wabambisana netindvuna takhe boMngayi, Mbovane Fakudze, Tikhuba Magongo naletinye. Wabusa ngesikhatsi setimphi letinyenti.

Mahlokohla wabusa simo selive sesintjintje kakhulu. Abesekelwe tindvuna takhe boMgudlula Mtsetfwa, Mandanda Mtsetfwa, Manikiniki Nkhambule naletinye. Lilawu beliseZabeni kantsi sigodlo sikaZombodze wesibili.

Sobhuza wesibili wakha lilawu lakhe Ezitheni, sigodlo saba kaLobamba wesitsatfu. Wabusa ngekuthula abambisene kahle netindvuna takhe. Yinkhosi leyakwati kubeka sitfombe lesihle ngesimo nemphilo yemaSwati emhlabeni jikelele.

Emakhosi labaliwe ngenhla kusukela kuDlamini wekucala kuye kufinyelele kuMswati wesitsatfu achamuka elicenjeni lekuphawula Krige (1968:4) ngalo lapho atsi:

One section of Tekela Nguni moved south from about the Komati river along the outskirts of Swaziland and settled for a time south of Delagoa Bay between the Lubombo Mountains and the sea. Here they became know as the Abambo and they were met at the end of the sixteenth century by the Portuguese.

Emphakatsi kulapho kuhlala khona inkhosi. Yindzawo lehlonishwa kakhulu esiveni semaSwati. Kusekhaya lemasiko nemihambo yesive. Umuntfu logcamile emphakatsi yinkhosi lucobo lwayo. Ngiko nje emagabazi atsi:

Saga: Inkhosi yinkhosi ngebantfu.

Inchazelo: Kubusa kahle kwenkhosi kweyamele ekubambisaneni kwayo nesive sayo.

Saga: Inkhosi ayicedwa.

Inchazelo: Tibongo tenkhosi atinamkhawulo, ticanjwa njalo tibe lilungelunge ize iyewukhotsama.

Inkhosi ngumuntfu lobalulekile esiveni ngobe yengamele konkhe lokuphatselene nesive. Bukhosi besiSwati bunenkhosi nendlovukati. Indlovukati ngunina wenkhosi. Inkhosi lilunga lelibalulekile emphakatsi, lapho kugidzelwa khona incwala. Yona itakhela lilawu layo, noma umuti wayo ngoba emphakatsi kuye kugcame livi lendlovukati. Tindzaba tesive ticedzelwa emphakatsi.

1.7 LUHLAKA LWEMSEBENTI

Sehluko sekucala setfula lucwaningo ngekubukisisa kutsi siyini saga, sibaluleke ngani nebudlelwano baso naleminye imikhakha yebuciko bemlomo. Siveta tinhloso, tindlela, imigudvu nemkhawulo welucwaningo.

Sehluko sesibili siveta imvelaphi nekwakheka kwetaga. Kuphawulwa ngemlandvo wetaga kusukela kadzeni kute kube kulamuhla; sikhatsi sakadzeni, sanyalo nalesitako. Umlandvo wetaga utawubukwa ngalokujulile.

Sehluko sesitsatfu sigcila etingcikitsini letehlukene lekuhleleke taga ngato. Kubukwa kusukela kulefigcamisa buhle kuye kufinyelelwe kutebubi.

Sehluko sesine sibuka kusetjentiswa kwetaga etindzaweni letehlukene nasetimeni letitsite tenkhulumo. Sibuka kwakheka kwetaga ngekwemakhono elulwimi latsintsa tinongo tenkhulumo.

Sehluko sesihlanu siphetho selucwaningo lesiveta lokutfolakele ngemlandvo, ngetingcikitsi nangekusetjentiswa kwetaga. Imiphumela yelucwaningo netiphakamiso tivela tigcame kulesehluko.

1.8 SIPHETFO

Bumnandzi nebhule belulwimi busetageni. Taga fikhombisa emakhono esive ekucabanga ngalokujulile, ekonoma, ekuhlelembisa imicondvo nekubeka emaciniso ngendlela lenhle nalemukelekako.

Taga tiyinkhulumo lesemilonyeni yebanftu legabe ngemakhono lamahle nalehlukene. Leso naleso sive sinetaga taso. Taga tiyachumana nalamanye emasu ebuciko bemlomo ngekutsi tisuselwe kubo noma bona bususelwe kuto.

Silindzele kutsi umlandvo usibonise kuhambelana kwetaga nesikhatsi, indzawo netigameko. Silindzele kubona kwendlaleka kwetingcikitsi ngekutsi titsintse buhle nebubi, buncane nebukhulu, budze nebufishane, imphumelelo nekwehluleka.

Lokuphawulekako kutsi akusilula kuhlatiya ngetaga ungatsintsi tisho letitsite. Kubalulekile kwati umehluko ekhatsi kwetaga netisho ngenhloso yekusebentisa lulwimi ngendlela lefanele nalehehako. Imibono yebahluti nebacwaningi labanyenti ime emaphuzwini ekutsi taga tiyinkhulumo lenemcondvo lophelele, lophakatsile nalotiyile, tiyafundzisa, tikhutsate, ticondzise, teluleke tibuye tetfule emaciniso.

SEHLUKO 2

2.0 IMVELAPHI YETAGA

2.1 SINGENISO

Taga tiyinkhulumo lesuselwa ekukhulumeni nasekwenteni kwebantfu. Tiyinkhulumo lejulile lekhombisa kucaphelisisa kwebantfu ekubukeni simo semphilo nasekwenteni tintfo letitsite. Imvelaphi yetaga ichamuka emikhakheni yemphilo nasetikhatsini letehlukene.

Nyembezi (1974:1) uchaza utsi:

Ö proverbs seem to suggest that they were in existence before the Bantu people divided into groups and followed various ways.

Mathenjwa naMaphumulo, (1999:10) baveta umbono lolandzelako ngetaga:



Izaga ziyinkulumo ezingqiwe esebenzisa ulimi olujulile olunotho ngezifenko. Zingamazwi ambalwa aliqiniso eliphathelene nokwenzeka empilweni. Zisebenzisa ulimi olungagaguli kodwa olwethula amaqiniso. Zisetshenziselwa ukunika izeluleko noma zinikeze iziyalo ezexwayisayo.

Thwala (1999:7) usiniketa umcondvo logcamisa kubaluleka kwetaga kanje:

Tikhombisa kufutshane kwelulwimi lwesive lolukhula imihla nemalanga. Tikhombisa inkhambo, imisimeto nemasiko esive kusukela kadzeni kusadliwa ngaloludala. Tichumanisa imphilo yakutsanti, yayitolo, yalamuhla neyakusasa. Tingumgogodla

welulwimi lekufanele kubanjelelwe kuwo ngaso sonkhe sikhatsi.

Lokushiwo ngumcwangingi Nyembezi (1974) ngenhla kusikhombisa ngalokugcamile kutsi uma bantfu bahlala endzaweni yinye lulwimi lwabo lugcina lufana etintfweni letitsite. EmaSwati sive sebaNguni Lesadzabuka eNkhabave njengaletinye tive letitinte entasi ne-Afrika. Kukhona kuhambelana etageni letinyenti ikakhulu leto tetive tebaNguni naletinye tive. Muncane umehluko lokhona etageni tetive taseNingizimu Afrika letilandzelako:



Labanye bacwaninigi bagcamise kuphendvuleka kwemibuto lelandzelako:

- Tiyini taga?
- Tibaluleke ngani taga?
- Tenta misebenti mini emphilweni, esiveni naselulwimini?


2.1.1 Taga yinkhulumo yebantfu

Taga tiyimicambo yesive lekhombisa kucabanga lokujulile, kucaphelisisa, kufundzisa nekwakha sive ngekutsi kusetjentiswe lulwimi. Kucambeka kwetaga kutsintsa emakhono latsite emifanekiso luchumano lafana nalawa:


Saga njengenkhumo-mphendvulwano yebantfu lababili.



Saga njengenkhumo yebantfu labatsatfu



Saga njengenkhumo yebantfu labane




2.1.2 Kwenaba kwetaga

Saga siyinkhulumo lengukuvumelana ebantfwini legcina imile noma isabalele esiveni sonkhe. Singumcambo wemuntfu munye lapho akhuluma nalomunye. Sitsi lapho saga sesatiwa bantfu lababili, nabo bakhulume nalabanye sandze. Sigcina siyinkhulumo levakala etibhimbini, emihlanganweni, ebandla nakuletinye tindzawa.


Kwenaba kwesaga kusiniketa lemifanekiso:

A: UMFANEKISO - SIYINGI




Kutsiwa ngumfanekiso-siyingi nje ngobe taga tenaba tikhule njengaso siyingi lesicala sisincane sigcine sesisikhulu.

B UMFANEKISO – TINKHOMBA



C. UMFANEKISO – TIBUTSE



Kufundzeka, kukhulumeka nekusabalala kwetaga kweyamele emakhonweni ebantfu ekuchumana.

2.1.3 Emakhono ekuchumana

Inhlelembomugca


Kufundziswa kwetaga kusukela kuletilula kuya kuletilukhuni.

Kulandzelana kwato kuye kufane nemugca kanje:




Inhlelembosiyingi

Kuhlelembeka kwekufundziswa kwetaga ngekweziyinki. Kuhleleka kwato kusiniketa lomfanekiso:




Inhlelembolwehlukano

Lapha kugcanyiswa kuhleleka kwetaga tibe tisuselwa kulesinye tivete kuhambelana, kuchumana nekusho intfo yinye.




Inhlelembosibutsetelo

Lapha kubukwa taga letehlukene ticatsaniswa nalesicuketse umcondvo logcogcela ndzawonye imicondvo yaletinye.



Inhlelembo letsandzelako/Inhlelembo lutsandzelo



Inhlelembo letsandzelako ibonakala ngekutsi itsandzele. Sibonelo lesikhombisa kuchumana noma indlela kulokukhulunyiwe lokuhamba ngayo kusuka kulokhulumako kuye kulokhulunyiswako.

2.2 TAGA LETICAMBEKE NGETITFOLUVELO

Uma sibuka imvelaphi yetaga kutsintseka tiffoluvelo letinjengaleti: e me hlo ngekubona, tindlebe ngekuva, tinyawo ngekuhamba, umlomo nelulwimi ngekunambitsa, naletinye.

Saga: Liso liwela umfula ugcwele.

Inchazelo: Liso libona naloko lekusuke kutsiwa kufihliwe.

Saga: Liso lelilodwa kaliphumeleli.

Inchazelo: Imitamo yemuntfu munye ayivami kuphumelela, kantsi yelinyenti leseketwe imicondvo leyehlukene iyaphumelela.

Saga: Ligula lindlebe aligcwali.

Inchazelo: Indlebe ayidzinwa kulalela, kepha ilalela noma ngabe yini.

Saga: Lunyawo alunamphumulo.

Inchazelo: Lunyawo alukwati kuhogela nekubona kutsi indlela injani embili, kepha lutfuka seluhlangana nesimo.

2.3 TAGA LETICAMBEKE NGETENTO TEBANTFU LABATSITE

Tibonelo letingentasi titsintsa emagama ebantfu lababili: LaShongwe lowabe advume ngekungaboni emehlweni kanye nengwenyama yemaSwati leyabusa esikhatsini lesilukhuni sekudliwa kwelive, Mbandzeni lowatjalwa kuteMdzimba.

Saga: Awuboni emehlweni unguLaShongwe yini?

Inchazelo: Kushiwo kumuntfu longayiboni intfo lesebaleni. Kutsiwa loyo LaShongwe abengayiboni intfo lesebaleni, ngiko lokwabangela kutsi kucanjwe saga ngaye.

Saga: Ngifunga Mbandzeni kuteMdzimba.

Inchazelo: Ngicinisile ngaloku lengikushoko. Lapha kufungwa ingwenyama yesive, lengumuntfu lobalulekile esiveni sonkhe. Kubuye kufungwe imbilaneni uMdzimba, lehlonishwa sive sonkhe.

2.4 TAGA LETICAMBEKE NGEKWENKHOLO YESINTFU

Kasenene (1993:20) uchaza ngenkholelo yemaSwati emadlotini kanje:

Mvelinchanti is always with his people through ancestors and the latter play an important role in Swazi religious life. In Swazi spirituality the world of the living is projected into the world of spirits. In the world of spirits the dead maintain the same relationships with one another and with the living as those established on earth, performing the same roles in relation to the living. Death, however, adds status and power to a person and the dead enjoy more respect than the living. The power they acquire through death is used to benefit the living by bestowing blessings on them and protecting them from evil-doers and misfortunes. Ancestors promote the health and wealth of their relatives and may grant them long life. In short, ancestors promote the well-being of the individuals and of whole communities.

Saga: Akudloti laya endlini layeka/dabo.

Inchazelo: Bantfu basita fihlobo tabo. Nelidloti lisita bakabo, hhayi

labanye.


Saga: Lidloti liyabhekelwa.

Inchazelo: Lidloti liyasitwa. Akuyekelelwa konkhe emahlombe alo kutsiwe litawubona.


Kubaluleka kwemadloti emphilweni yetive tebaNguni naletinye letinyenti kugcanyiswa ngumcwaningi Maphalala (1985:3) lapho atsi:

They acknowledged uMvelinqangi (a God that had power over all agencies) They recognized that they were responsible not only to their king, but also to uMvelinqangi whom they regarded as being more powerful than their king. Another element of their religious belief was that the amadlozi (the ancestral spirits, who were second in the religious hierarchy) should intercede for them. The izangoma and abalozi (the diviners and ventriloquists) were third in this order of religious concepts.

EmaSwati awatisa kakhulu emadloti ngobe atsatfwa njengebachumanisi ekhatsi kwemuntfu neMvelinchanti. Bumcoka bemadloti bubonakala kulomdvwebo lolandzelako:




Ngekwembono waMaphalala (1985:3) kubuye kungeteke tangoma noma balozi eluhleni lwenkholelo yesintfu kanje:



2.5 TAGA LETICAMBEKE NGEKWENKHOLO

Inkholo yesimanje nguleyo leyafika nebafundisi-titfunywa letsintsa liBhayibheli nekukhonta Nkulunkulu ngendlela yendvodzana yakhe Jesu. Loluhlobo lwenkholo lusiniketa lomdvwebo:



I Afrika leseNingizimu icala kwati kabanti ngenkholo yebukhrestu kusukela eminyakeni yabo 1750, loko lokusiniketa iminyaka lekwacala ngayo lokutsintsene nekhohlo kulelive.

Simelane nalabanye (1988:18) bachaze ngelulwimi lwesiZulu kanje:

Zikhona ezinye izaga ezidabuka enkolweni yobuKrestu, lapho siye sithole izinto ezithile ezake zenzeka eBhayibhelini. Akekho umuntu ongumKrestu ongayazi indaba kaNowa. Phela ngokweBhayibheli wasinda uNowa kuzikhukhula ezabhubhisa umhlaba ngenxa yokuthi yena walalela umyalelo kaNkulunkulu. Isibohlile imvula uNowa wathuma ijuba ukuthi liyohlola ukuthi asebohlile yini amanzi emhlabeni. Lahamba ijuba kalizange liphinde libuye. Ngenxa yokholo olwemukelwa ngamaZulu lesi sehlo sasesiba ngumthelela enkulumeni yawo. Kwagcina sekufaniswa umuntu ohambe amalombo wangaphinde walubhada ekhaya wase efaniswa naleli juba. Kwase kuthiwa: **Wahambisi okwejuba likaNowa.**

Saga : Wahambisa kwelituba laNowa.

Inchazelo: Wahamba wangabe asabuya.

Saga : Umfundisi akamtali umfundisi.

Inchazelo: Kushiwo lapho kutelwe umntfwana lonetento letiphambene netemtali.

Saga : Ngigeza tandla njengaPilatu.

Inchazelo: Ngiyatihlambulula mine angingeni kulentfo.

2.6 TAGA LETICAMBEKE NGEBUGANEKWANE

Saga: Sibambe lentfulo.

Inchazelo: Sibambelele kuloku lesitjelwe kona, asigucuki.

Inganekwane: Lunwabu nentfulo

Kwasukasukela: Cosi.

Kutsiwa endvulo bekukhona lunwabu nentfulo. Letilwane tatihlala ehlatsini. Kwenteka-ke ngalelinye lilanga uMdali wafuma lunwabu kwekutsi aluhambe luyotjela bantfu kutsi babofa baphindze bavuke. Lwahamba-ke lunwabu luchachatela yonkhe indlela.

Emuva kwemalanga lamanyenti uMdali wabuye wafuma intfulo kwekutsi iyotjela bantfu kutsi batawufa bangavuki. Yatsintinini ngemagonso intfulo yafika yalwengca endleleni lunwabu lusadla emacembe ebukhwebeletane.

Uma ifika ebantfwini intfulo, yamemeta yatsi, "Lalela ... ni, utsi uMdali nitawufa ningavu ... ki. Niyeva na?" Bantfu baphendvula ngekutsi "Yebo siyeva." Yagijima intfulo ibaleka seyiphindzela emuva.

Ngesikhatsi lesidze lokungaba ngemalanga lamanyenti intfulo yawushiya umyaleto wayo, lwefika lunwabu. Lwafika nalo lwamemeta lwatsi, "Utsi uMdali nitawufa nibuye nivuke!" Bantfu baphendvula batsi, "Sibambe lentfu ... lo yona lefike kucala."

Saga: Imphangele lenhle ngulekhala igijima.

Inchazelo: Umuntfu lophumelelako nguloyo lotsi akhala abe enta taba.

Inganekwane: Imphangele

Kwesukasukela: Cosi.

Imphangele yinyoni lenemacashata lamnyama nalamhlophe. Iyaphapha kantsi futsi inematubane. Italela emacandza esikhehleni sayo. Iyabukisisa kutsi isendzaweni lephephile yini embikwekutaleta.

Yataleta emacandza esikhehleni sayo. Yatsi seyilungiselela kuwafukamela, kwachamuka bafana labeluse tinkhomo batsi:

"Mphangele! Mphangele!
Macashata lamnyama nalamhlophe,
Makhal' egijima
Ngiph' emacandza."

Bafika batsatsa emacandza emphangele. Imphangele yandiza yayobhaca ehlatsini. Sikhehle semphangele sasala site lutfo. Kwaba lusizi sibili emphangeleni. Akuphelanga tinyanga letinyenti kwentekile loko, imphangele yabona kutsi kuncono iyokwakha sikhehle sayo ekhatsi ehlatsini lelimnyama. Yasakha kahle kakhulu. Yasho kutsi bafana labelusa tinkhomo ngeke bafinyelele esikhehleni sayo.

Akuphelanga emasontfo lamanyenti italele emacandza, chamu bafati lababili. Batfota tinkhuni. Bavakala batsi:

"Mphangele! Mphangele!
Macashata lamnyama nalamhlophe,
Makhal' egijima,
Siph' emacandza."

Bacondza ngco esikhehleni semphangele. Yatsi beyibone kutsi naba bafati

beta esikhehleni sayo yabaleka ngematubane. Bahamba bacondza esikhehleni sayo bafike bawatsatsa onkhe emacandza. Yakhala sililo sodvwa imphangele. Yagijima yacondza endzaweni lenematjje lamanyenti. Yafike yahlangana nenyoka iphincilika incinca ingati emhlubulweni, kubonakala kutsi igcivitwe ngelitje. Yafike yadzindza sililo embikwenyoka.

“Kwentenjani Mphangele?” Kubuta inyoka ifutselwa.

“Aphelile emacandza ami, acedvwa bantfu.”

Yatsi beyicedze kusho njalo yasidzindza sililo inyoka.

“Ngifutselwa nje ngenca yebantfu. Bebatsi bangiphihlita inhloko, litje langishaya emhlubulweni.”

Leso naleso silwane saveta sikhalo saso. Takhombisa kungeneliswa yindlela bantfu labatiphatsa ngayo. Tenta sivumelwano sekutsi titawusitana ngaso sonkhe sikhatsi. Titawukulwa nesitsa sato lesingumuntfu. Inyoka yatsi, “Ngicela ungivumele ngihlale ngaphansi kwetjani lobutawuhlala emacandza akho. Yindlela lengitawutiphindzisela ngayo.”

Yavumela etulu imphangele ngobe itimisele kubona emacandza ayo aphepha ebantfwini.

Kwacala ngaleso sikhatsi kutsi lapho kunesidleke semphangele khona, kube nenyoka edvute.

Saga: Imbila yeswela umsila ngekulayetela.

Inchazelo: Ubotentela tintfo ungalayeteli.

Inganekwane: Imbila yeswela umsila

Kwesukesukela. Cosi.

Endvulo tonkhe tinyamatane tatingenayo imisila. Loku kwadala kutsi tilwane tiphile kabuhlungu ngenca yekuhlushwa timphungane netibawu. Ngalelinye lilanga inkhosi yetilwane yabita umhlangano lomkhulu yatsi akungasali ngisho nasinye silwane emakhaya, akute ngisho nalesinelidvulo, wonkhe wonkhe aphelele emtini wenkhosi. Yakhipha tigijimi inkhosi taphuma ngayo yonkhe imimango tiwuhlaba tiwulawula wekutsi tonkhe tilwane tiyamenywa komkhulu. Pho, laliphuma kubani livi ... indlovu lucobo lwayo, umlomo longatsetsi manga.

Teta tonkhe tilwane emaphaphu asemlonyeni, tingati kutsi ingabe lenhlabamkhosi lengaka ngeyani. Utsi umuntfu angabe asati yini loku live selema mantontolwane, libi simanga. Phela ngalesinye sikhatsi uma umuntfu abitelwa emphakatsi kusuke sekukhona lokubi lakwentile kwayitfukutselisa inkhosi, silo semabandla wonkhe. Titseleke ngelutsi lwato, tifike titsi khwatsalala ngaphasi kwesihlahla lesikhulu enkhundleni. Tihlale tilindzele inkhosi. Ichamuke inkhosi isingafwe tindvuna tayo, ite ifike ihlale embikwato tonkhe tilwane, Kwadvuma, "Bayethe!" kwatamatama nemhlaba. Noko kukhona bogalajane lebeta nje sebayati kutsi inkhosi itiphatsele tipho letinhle, imisila phela. Inkhosi yayibite lenkhundla nje ngobe tindvuna tabe setike tayiluma indlebe kutsi sive siyakhonondza ngenhlupheko letiyibangelwa timphungane netibawu, nekutsi inkhosi ibindzile ayikunaki kuhlupheka kwato.

Netimfene tehle etintsabeni, bolohha nabomathananazane babhekise emabombo entansi emtini wenkhosi. Titsi natehla emaweni tikhandze imbila itihlalele ngase/mlonyeni wemgodzi wayo yetsamele lilanga. "Kuyiwaphi ekuseni kangaka bomfene ngamfene kungakahhohloki nematolo?" kubuta imbila iphakamisa tidladla taphambili.

"Nguwe kuphela longakativa tindzaba letimnandzi? Siya emphakatsi, inkhosi iyosemukelisa imisila kute siphunge ngayo tilokatane letisiphathamisako, ikakhulukati timphungane netibawu," kuphendvula timfene tansondvo timoyitela tikhombisa kuwufokotelela lomhlangano.

"Nisite bahlobo bami nami ningiphatsele bo!" kucela imbila isho ishobela emgodzini wayo. Tihambe timfene. Tikhandza sekuyaphitsitela enkhundleni, nguleso naleso silwane sitsatsa indzawo yaso. Ikhulume indlovu.

"E! Nginibitele ludzaba lwemisila sive sami. Sekukanyenti ngitfolo tikhalo kulabanye benu, bakhala ngetilokatane... ikakhulukati bakhonondza nganaba bakamphungane, "isho indlovu ibeka incwaba yemisila embikwetilwane. "nguloyo naloyo akatsatse umsila wakhe awuchume kahle enhlakwetibunu." Ikhuluma nje yona itiphunga ngemsidlana wayo, ibuye yelule umboko wayo, itsi kutibhambatsa ngawo emhlubulweni timphungane tibaleke kungatsi kukhona laticoshako. Wayo phela umsila mncanyana ngobe inemtimba lomkhulu lowesabekako, netimphungane imbala tiyayesaba indlovu. Tilandzelane tinyamatane tiyotapha imisila.

Kucale lihhashi lifike likhetse sikhashakhasha selishoba lisinameke kahle etibunu, lisuke liholobhe liphakamise umsila walo, utsi hashahasha. Kulandzele tinkhomo nato tifike titikhetsele imisila lemidze lenemashoba lamahle ekugcineni.

Tilandzelane njalo tonkhe tilwane titikhetsela imisila kudzine kuphelele wonkhe wonkhe umuntfu. Imbila yona iloku ihleli laphayana emadvwaleni etintsaba, iyabukela kutsi kwentiwani lapha entansi emtini wenkhosi. Noko inelitsemba lekutsi timfene titakuyiphatsela wayo umsila njengobe icelile. Kwendlula lesi silwane iyalayetela kutsi siyiphatsela umsila. Tiychazele lesetibuya khona kutsi inkhosi ayivumi kutsi kuphatselwane imisila, itsi umuntfu ngemuntfu akatotitsatsela. Loku vele imbila kwase kungumkhuba wayo kutsandza

kulayetela, ichubeke nekucela tinyamatane letengca ngendlela kutsi tiyiphatsele umsila.

Kwatsi ekugcineni seyibona kutsi kutawudzimate kushone lilanga iloku ihlalele lite; yehla yaya lapho kutatjwa khona imisila. Yahlangana netilwane tihamba titigabisa ngemisila yato lemidze. Tatijabulile ngobe sesitawuphumula kuhlushwa timphungane. Itsi iyafika imbila ekhubulweni ikhandze imisila seyiphelile, kusele tiguu kuphela. Isale ikhalela kuso, itsatse sona isinameke. Kwesukela lapho kutsi imbila yeswele umsila ngenca yekulayetela.

Cosi, cosi. Iyaphela.

2.7 TAGA LETICAMBEKE NGEMIFULA

Umfula lobaliwe ngentasi uMkhuze logeleta enhla nelaKaZulu ucondze emphumalanga uyewungena elwandlekati iNdiya. Nawo uMgwenya ugeleta ehlanzeni ucondze emphumalanga. Lokufananako ngalemifula kutsi igeleta iya emphumalanga, iyimitselela, emanti ayo aphelela elwandlekati iNdiya.

Tibonelo:

Saga: Ngiyawutselela imifula yonkhe nginguMkhuze yini?

Inchazelo: Kushiwo kumuntfu lobekadze asita bonkhe bantfu, kepha longachubeki nekuniketa lusito.

Saga: UMgwenya ugcwele ugola tintsetse.

Inchazelo: Utfukutsele kakhulu.

2.8 TAGA LETICAMBEKE NGETINTFO LETIFIKE NEBELUNGU

Saga: Imali yimphandze yesono.

Inchazelo: Imali ifakana etilingweni.

Saga: Umlungu angatfunga umbhodze.

Inchazelo: Intfo leyingeke yenteke.

2.9 TAGA LETICAMBEKE NGETENTO TEBANTFU TEKUPHIKELELA

Saga: Litalbutfongo lifela emnyameni.

Inchazelo: Kwenta tintfo ekusitsekeni kuyalimatana.

Saga: Salakutjelwa sibona ngemopho.

Inchazelo: Umuntfu longafuni kwelulekwa ugcina asengotini lenkhulu.

2.10 TAGA LETICAMBEKE NGETILWANE TASEKHAYA

Imbuti nelinkhonyane tilwane tasekhaya ngoba tiyafuywa. Tilwane letakhelwa sibaya teluswe belusi. Kucanjwe taga letilandzelako ngato:

Saga: Imbuti iphekwe netimphondvo tayo.

Inchazelo: Kwentiwe intfo lengubulima.

Saga: Inkhonyane ikhetfwa kusakhanya.

Inchazelo: Yenta intfo ngesikhatsi lesifanele.

2.11 TAGA LETICAMBEKE NGALOKUMILAKO

Kusetjentiswe tihlahla: saphopho nesemsenge. Tihlahla tasehlanzeni letimila

fibe tindze. Umsenge awunamahlavu lamanyenti, ukhula uye etulu ugcine ugobile.

Saga: Ematsanga ahlantela labangenasilulu.

Inchazelo: Umuntfu longayidzingi intfo kuyenteka kutsi aphumelele ekuyitfoleni.

Saga: Liphopho labolela esihlahleni ngekutitsambisa.

Inchazelo: Yenta intfo lefanele sikhatsi sisekhona futsi usenemandla ekuyenta.

Saga: Goba msenge udliwe timbuti.

Inchazelo: Angiguge ngibe nje bantfu batentele labakutsandzako bangaphazanyiswa muntfu.

2.12 TAGA LETICAMBEKE NGETINYOKA

Lapha kubukwe taga leticambeke ngekubuka tinyoka. Tinyoka tibukwe ngeliso lebungoti. Tikhona letinye tinyoka letingesiyi ingoti letifana nensakalubisi, lifulwa namabibini kepha emagabazi elulwimi amange acabange kucamba taga ngato.

Saga: Imamba lemnyama ayinakuphutfunyelwa.

Inchazelo: Yingoti lewungeke uyivike noma sewenta miphi imitamo.

Saga: Inyoka kayilandzelwa naseyisemgodzini wayo.

Inchazelo: Kumele sibocaphelisisa siyibalekele ingoti.

2.13 TAGA LETICAMBEKE NGEKWETIGODZI

Taga ticambeka etigodzini tiye ngekwenaba ngekutsi tigcine kuyimicambo yesive sonkhe. Taga kumele tihlale tinjalo, tingaguculwa. Lowo mbono kumele siwugcizelele noma tonkhe tintfo letingaphasi kwemtfunti welilanga tintjintja. Kunekutsi kuntjintjeke taga letacanjwa kadzeni, kuncono kucanjwe letinye njengobe kwenteka kulamalanga.

Kucambeka kwetaga ngendlela lengafani, kepha taga tibe tisho intfo yinye kubonakala ekwakhekeni kwesaga lucobo kwaso. Umehluko siye siwubone emagameni latsite:

* Ligama lekucala lehlukile

Inja idla umnikati.

Ingwe idla umnikati.

Intsandzane lenhle ngulekhofwa ngunina.

Inkhonyane lenhle ngulekhofwa ngunina.

Imphangele lenhle ngulekhala igijima.

Intsendzele lenhle ngulekhala igijima.

* Egameni lesibili lekugcina

Emacili kawakhelani.

Emacili kawatsengani.

Bucitseka bugayiwe.

Bucitseka buyoviwe.

Kufa akunantsandzane.

Kufa akunamahloni.

Kufa lisela.

Kufa butfongo.

* Egameni lesibili lelisekhatsi

Ungabona emehlo esibungu.

Ungabona ematsambo esibungu.

Wakhahlelwa yindlovu esifubeni.

Wakhahlelwa lihashi esifubeni.

Akunyatsi yaphika nelitfole.

Akunyatsi yehlulwa litfole.

Ubopha inja netinkhuni.

Ubopha umtsakatsi netinkhuni.

* Egameni lesitsatfu

Indvodza ifela emaceleni.

Indvodza ifela etinkhomeni.

Imphi ivuka etaleni.

Imphi ivuka emlotseni.

Imphungane ingena emasini.

Imphungane ingena elubisini.

Ematsanga ahlantela labangenatingobo.

Ematsanga ahlantela labangenatimba.

* Taga letisebentisa ligama linye ekucaleni

Tinyenti taga letisebentisa ligama linye ekucaleni bese tiyehluka ngekusetjentiswa kwemagama lamanye lalandzelako. Kwehluka kwemagama kugcamisa:

- * Kwehlukana kwemicondvo ekucambeni taga.
- * Tigodzi letehlukene lapho kukhulunywa khona taga.
- * Kutfufuka kwelulwimi ngekusebentisa timo tekukhuluma letehlukene.

Inyoka < Ishaywa enhloko.
Ayilandzelwa seyisemgodzini wayo

Akudloti < Lingayi ekhaya.
Laya endlini layeka kwabo.

Kutala < Kutilungelela.
Kutelula emadvolo.

Emankhonyane < Alandzela bonina.
Afuta bonina.

Indzaba < Ilala endleleni.
Ibekelwe ematolo.

Umlomo < Sihlangu sekutivikela.
Lishoba lekutiphungela.

<u>Awumbiwa</u>	◀	Ndzawonye. Godzini linye.
<u>Ingwenya</u>	◀	Idla luhlobo leyase yaludla. Ilandzela ingati.
<u>Kufa</u>	◀	Akunantsandzane. Akunamahloni.
<u>Akukho</u>	◀	Muti ungatfunyi intfutfu. Mfula ungahlokomi.
<u>Kupha</u>	◀	Kutiphakela. Kutibekela.
<u>Itsi</u>	◀	Ingadla litsambo yetayele. Ingacoba litsambo yetayele.
<u>Kutala</u>	◀	Kutelula emadvolo. Kwandza ngemalunga.
<u>Indvuku</u>	◀	Kayiwakhi umuti. Kayinamuti.

Taga letingenhla tiniketwe ngatimbili ngenhloso yekukhombisa umehluko lokhona kuto. Temukeleka tonkhe ngekwehlukana kwato noma tiphimiseka etigodzini letehlukene. Kwehlukana kwetaga kukhombisa kutsi sive sakhiwe tivana letinyenti, letisetigodzini letinyenti ngaphasi kwetikhulu letehlukene.

2.14 TAGA LETICAMBEKE NGETINYONI

Live leMvelinchanti lihlotjiswe tinyoni letehlukene letinemisebenti leminyenti. Labadzala babuka kwenta kwetinyoni letitsite base bacamba taga ngako. Saga lesitsintsa ncedze kwabukwa kwenta kwakhe, kantsi saga lesitsintsa sikhova kwabukwa simo saso.

Saga: Inyoni ishayelwa labakhulu.

Inchazelo: Umntfwana kufanele asite batali bakhe; lokuncane lakutfolako akwetfule ebatalini.

Saga: Sikhova sidla emehlo aso.

Inchazelo: Sebenta kuze uphumelele.

Saga: Ncedze ukholwa tagila.

Inchazelo: Kungabalekeli ingoti kunempfumela lomubi.

Saga: Intsendzele iwe enkhundleni.

Inchazelo: Kuvele inhlanhla lenkhulu.

Saga: Inkhonjane iwele enkhundleni.

Inchazelo: Licili libonakele labanjwa.

Saga: Inyoni ihlutfuke sisila.

Inchazelo: Uhlupheke kakhulu.

Saga: Ungaboyitekela emliweni itakwemuka inyoni.

Inchazelo: Ungaboteka timfihlo takho noma kukuphi ngobe loko kutawukwenta tintfo takho tonakale.

Saga: Sigwaca silindza indvuku.

Inchazelo: Siwula lesilindza kute kufike simo lesimatima.

2.15 TAGA LETICAMBEKE NGETINKHOMO

Tikhomo tiligugu lesive ngiko nje tityenti taga leticanjwe ngenkhomo. Etageni inkhomo ivela ngetindlela letehlukene. Kuyenteka kugcanyiswe umbala: inzimakati nelilungakati, tento: kutala, kuhlaba, kubhonsa, kusengwa, kutjakadvula nalokunye, simo noma kwakheka: lilundza, timphondvo, lulaka nalokunye.

Saga: Inzimakati itala lilungakati.

Inchazelo: Kuyenteka bantfwana bangafuti batali babo ngetento.

Saga: Inkhomo kayimitsi ingaphindvwanga.

Inchazelo: Kucela kuphiwa lose waphiwa kona.

Saga: Imbuti ingatala inkhomo.

Inchazelo: Yintfo leyingeke yenteke.

Saga: Indvodza ifela etinkhomeni.

Inchazelo: Kumele utivikele tintfo letiligugu kuwe.

2.16 TAGA LETICAMBEKE NGEMANTI

Kukhona taga leticambeke ngekusetjentiswa kwemanti. Kubukwe kubaluleka kwemanti ngaphandle kwekucondzana ngco nemfula, siyalu, sicoja nalokunye.

Saga: Ungacali ngemanti imphuphu ingakasilwa.

Inchazelo: Landzelisa tintfo ngendlela lefanele.

Saga: Inhlambi ifela emantini.

Inchazelo: Umuntfu ubulawa yintfo layetayele.

2.17 TAGA LETICAMBEKE NGEKWETIKHUNDLA

Tinyenti taga leticambeke ngekwetikhundla nangetimo tebantfu emmangweni. Uma kukhulunywa ngetikhundla etiveni talabamnyama kusukwe kubukwe ingwenyama, tikhulu, tindvuna nalabanye.

Saga: Inkhosi yinkhosi ngebantfu.

Inchazelo: Bukhulu bemuntfu ngekwesikhundla kweyamele ekuphatsaneni kwakhe nebantfu.

Saga: Ingwenyama idle ingwenyama.

Inchazelo: Inkhosi incobe inkhosi yalesinye sive noma umuntfu lomkhulu lohlonishwako wehlule lomunye loselizingeni lelilingana nelakhe.

Saga: Uhlakaniphe njengenkhosi.

Inchazelo: Ungumuntfu lowenta tintfo ngendlela lehlelekile.

2.18 TAGA LETICAMBEKE NGEKWEMLANDVO

Umlandvo ubaluleke kakhulu ekucanjweni kwetaga. Simelane nalabanye (1998:17-18) baphawula ngemlandvo welichawe lakaZulu Manyosi nekubaluleka kwenkhomo kanje:

Siyobohla Manyosi: Yini lena leyobohla? Phela sisu. Kuyabonakala ukutsi indvoda beyifinya ngendvololwane ngenca yekondliwa yinkhosi

Dingane. Leli kwabe kuli butfo lenkhosi. Manyosi wahamba naMpande lowabengumnakabo nkhosi Dingane. Ngaloko Dingane wamsongela Manyosi kutsi noma angamhlamuka kepha utamkhumbula. Ngaloko-ke bantfu base bekwenta saga sekutsi umuntfu lodla achwensa uyakhohlwa kutsi ngalelinye lilanga uyolamba akhumbule emuva.

Tibonelo tetaga letibalwe ngenhla tiveta umlandvo ngekutsintsa lichawe Manyosi, belungu, timayini nembhodze. Inkhulumo yemaSwati letsintsa umlandvo wemakhosi newemachawe yinyenti. Inkhulumo leyatiwako ngulena lelandzelako:

Saga: Wadla ludledle unguMbilini yini?

Inchazelo: Uhamba kakhulu, kawuphumuli.

Saga: Wati tangemuso njengaSomhlolo.

Inchazelo: Wati lokutawukwenteka esikhatsini lesitako.

Saga: Sikhali saSobhuza!

Inchazelo: Kushiwo imfundvo lucobo lwayo.

2.19 SIPHETFO

Taga tesiSwati ticambeke ngetintfo letinyenti letiphilako naletingaphili, letinkhulu naletincane, letinhle naletimbi, njalonjalo. Loku kukhombisa kutsi akukho lokungakabaluleki ngaphasi kwemtfunti welilanga.

Konkhe lokudaliwe nalokwakhiwe kunemsebenti lobalulekile emphilweni lotsintsa emakhono, lwati nefingcikitsi. Kucambeka kwetaga kuhambisana nesikhatsi. Loko sikubona esibonelweni lesitsi:

Inkhomo imbiwa etjeni kubelungu.

Esageni lesingenhla inkhomo imele umnotfo lotfolakala etimayini lekungaba igolide, isiliva, idayimane, emalahle nalokunye.

Inchabhayi yekucanjwa kwetaga isetandleni tebacwaningi, bosotilwimi, bosolwati nalabanye lekumele babukisise imigomo netindlela tekutfutfukiswa kwelulwimi.

SEHLUKO 3

3.0 KUHLELEKA KWETAGA NGEKWETINGCIKITSI


3.1 SINGENISO

Taga tisibuko semikhakha yemphilo. Taga tikhombisa kutsi emhlabeni kunetikhatsi tebhule netebubi, letilula naletilukhuni, temphumelelo netekwehluleka, tenhlanhla netemashwa, tenjabulo netelusizi, tekuphila netekufa, tebuwula nekuhlakanipha, tenkhani nekubeketelelana, naletinye.

Tonkhe taga tinetinchazelo tato. Leso nalese saga sacanjwa ngenca yesigigaba lesitsite. Asikho saga lesingakabaluleki futsi lesinganiketi umcondvo lotsite. Leso naleso saga sitsintsa loku lokulandzelako:

- Sikhatsi
- Indzawo
- Sive

Butsatfu lobu businiketa umdvwebo lolandzelako:



3.1.1 Sikhatsi

Sikhatsi sigcama kahle etageni letilandzelako:

- Kuyokugcogca **kuhlwa**.
- Uhambela eceleni njengelilanga **lasebusika**.

Emagama lamele sikhatsi ngulawo labhaleke ehluka kulamanye.

3.1.2 Indzawo

Indzawo ivela ngetindlela letehlukene njengakuleti bonelo letilandzelako:

- Umuti ngumuti ngekuphanjukulwa.
- Uffukutsele yiNkomazi ibange elwandle.
- KaNgwane kusavutjwa ngaloludzala.

3.1.3 Sive

Sive sigcanyiswa lulwimi nemasiko. Tonkhe taga tigcamisa lulwimi nemihambo yesive lemhle nalemibi, leyemukelekako nalengemukeleki. Sive siye sivele ngalokugcamile etageni letilandzelako:

Saga: Unina ngunina maZulu (siZulu).

Inchazelo: Make ukutsandza ebuhleni nasebubini, ngako-ke akekho lofana naye.

Saga: Ngwane kawulali kulala emehlo.

Inchazelo: Bantfu bakaNgwane benta shangatsi abati lutfo kantsi bahlakanipha kadzeni.

Kubalulekile kubukisisa kutsi iyini ingcikitsi nekutsi ibaluleke ngani. Ingcikitsi umcondvonchanti noma yinhlitiyondzaba. Ayikho indzaba lengenayo inhlitiyo noma umcondvo losemcoka kunaleminye. Imphilo yebantfu yakhiwe imikhakha yemphilo leyehlukene, legcanyiswa tingcikitsi.

Cuddon (1979: 695) uchaza ingcikitsi atsi:

the theme of a work is not its subject, but rather its central idea which may be stated directly or indirectly.

Bacwaningi banemibono leminyenti ngengcikitsi. Cohen (1973:198) uveta lombono lolandzelako ngengcikitsi:

The essential meaning or main concept of a literary work.

Lomunye umbono ngewa-Abrams (1981:102) lophawula ngengcikitsi kanje:

a thesis or doctrine which an imaginative work is designed to incorporate and make persuasive to the reader.

Lokugcamako ngalemibono yebacwaningi kutsi ingcikitsi ivetwa inguloku lokulandzelako:

- umcondvo lobalulekile
- sibuko semphilo
- sihlanganisi lesicinile
- umcondvonchanti noma inhlitiyondzaba.

3.2 Ingcikitsi yekuphatfwa kwemiti

Umuti wakhiwa kubakhona kwababe namake. Bantfwana bafana netitselo emtini. Umuti kumele uphatfwe kahle ngaso sonkhe sikhatsi ngobe ngesintfu uyindzawo yalabadzala.

Esiveni semaSwati indvodza iye itsi lapho ikhuluma ngelikhaya leyihlala kulo itsi, likhaya noma umuti wababe. Wayo umuti iyawukwakhelwa bantfwabayo. Kuphatfwa kahle kwemuti kubalulekile ngobe kuye kugcamise inhlonipho, buntfu nemfundziso lenhle ekhaya.

Uma uva umuntfu akhuluma atsi, leli likhaya lami, ubokwati kutsi loyo muntfu akasilo liSwati noma akayati inchubo yesive semaSwati. Umuti sibusiso lesikhulu lekumele sinakekelwe futsi satiswe. Yintfo yalabadzala lewubabambele yona ngenhlonipho nangesizotsa. Likhaya yindzawo lephetse imfundzisonchanti noma tisekelo temphilo. Likhaya sibili libonakala nganati timphawu:

- Kusitana
- Kubambisana
- Kutfobelana
- Kuvelana
- Kukhutsatana
- Kubonisana
- Kufundzisana
- Kukhulumisana
- Kutsandzana
- Kuhltoniphana
- Kubumbana
- Kwelulekana
- Kucondzisana

Imphambosi yekwentana ngiyo lephetse sisekelo semphilo yelikhaya. Uma timphawu letibalwe ngenhla setingasekho kusho kubhidlika kwelikhaya.

Titfombemagama letisetjentswe etageni ngenhloso yekumela bubi nguleti: Kutfunya intfutfu lokusho tinkinga, indvuku lemele kulwa, buchwaga bumele imphi nelukhuni lwedvungamuti lumele kulwa, kucabana imphi nalokunye. Sibuye sitfole sitfombe lesihle lesitsi: ligugu lesimele intfo letsandvwako, lekhontiwe, lenakekelwako nalekumele iphatfwe kahle ngaso sonkhe sikhatsi.

Imphambosi yekwentana ibuye igcamise bubi nebulukhuni bodvwa lobubhidlitako uma sekwandze loku lokulandzelako:

- Kuhlebana
- Kunyembenyana/Kunyonkolotana
- Kushayana/kuhhwebana/kuchukulutana
- Kushalatelelana/kufulatselana
- Kuchelelana
- Kukhohlisana
- Kwedzelelana
- Kuphikisana

Umuti lophetfwe kahle uye ubonakale ngemphilo lenhle nalehehako futsi uba nemphumelelo etintfweni letinyenti. Uba sibonelo lesihle lesiye sibonwe futsi satiwe bantfu labanyenti bangayivali imilomo yabo ngaloko labakubonako.

Luhla lwetaga ngekuphatfwa kwemiti

Saga: Awukho umuti longatfunyi intfutfu.

Inchazelo: Awukho umuti longenatinkinga tawo.

Saga: Indvuku ayiwakhi umuti.

Inchazelo: Awukho umuti loma ucine uma indvodza ikhuluma ngendvuku.

Saga: Kotsiwa lukhuni lwedvungamuti.

Inchazelo: Umuti lapho kuhlala ngekuliwa khona.

Saga: Umuti wetichwaga uyachitseka.

Inchazelo: Umuti lekungatfotjelwana kuwo ugcina ngekubhidlika.

Saga: Ligugu liyadvonsiswana.

Inchazelo: Kumele bantfu labaganene bahlalisane kahle, babambisane, basitane, bavelane, bakhutsatane.

Saga: Akukho mfula ungahlokomi.

Inchazelo: Lowo nalowo muti unetinkinga tawo.

Saga: Akutinhlanga talahlana todvwa.

Inchazelo: Labatalanako bayavelana ngaso sonkhe sikhatsi.

Tintsengu tiye tisebentise taga ngenhloso yekusho kutsi umuti uphetfwe njani. Taga tiveta lokuhle nalokubi, lokukhutsatako nalokudzikibalisako, lokwakhako nalokubhidlitako.

3.3 INGCIKITSI YEKUGANANA

Ingcikitsi yekuganana noma kutekana igcamisa kuhlangukane kwebantfu lababili labehlukene ngebulili, bahlangana ngekwesibongo. Kulisiko nemhambo wesive kuganana. Indvodza yindvodza ngemfati kantsi-ke nemfati umfati ngendvodza.

Likhaya lima licondze ngebantfu lababili lomdvuna nalomsikati.

Lubisi (2002:39) uphawula kabanti ngalengcikitsi yekuganana utsi:

Kuteka kungumhambo wato tonkhe tive letikhona kulomhlaba. Empeleni nguMvelinchanti lowabeka kutsi bantfu batawutekana batalane bandze (Genesisi 1:27). Nalapho kukhulunywa khona embhalweni longcwele kutsi bantfu bangatekani, kusuke kungumbono walowo muntfu futsi lawukhuluma sakulesinye simo, angasenayo inkhanuko yalapha emhlabeni. Phela evini leNkhosi, Pawula ubeka umbono wakhe kutsi kube kuya ngaye ngabe vele bantfu abatekani ikakhulu laba labasebentela iNkhosi. Ukusho loku nje ngobe abona kutsi nasebanemiti batawunaka kwemindeni yabo, bakhohlwe ngumsebenti weNkhosi (KubaseKhorinte Besibili 7:25-35) Loku wakusho emva kwekutsi sashaywe lunyati, angasasuye Sawula. Besekele lilukuluku nenkhanuko njengendvodza. Besekephila imphilo lehlukile kulena letayelekile. Kepha ubuye asho vele atsi indvodza kumele ibe nemfati wayo kanjalo nemfati abe nendvodza yakhe.

Nawuteka umfati ngesiSwati usuke wakha buhlobo lobukhulu kuleyo mindeni yenu. Kubangumtfwalō wabo bonkhe labatsintsekako kuleyomindeni kubona kutsi lobo buhlobo buyanakekelwa.

Tinyenti taga letiphatselene nekutekana, letigcamisa lokuhle nalokubi. Kuganana kugcamisa lizinga noma sigaba lesitsite semphilo lesihambisana nenhlonipho nebucotfo.

Luhla lwetaga letigcamisa kuganana

Saga: Umendvo ngumkhumulansika.

Inchazelo: Intfombatane iyavoveka emendvweni.

Saga: Umendvo awutfunyelwa gundwane.

Inchazelo: Intfombatane ibona seyifikile emtini kutsi imphatfo yakhona injani.

Saga: Inhlanyelo yetsekelwa kubangani.

Inchazelo: Umuntfu ufunela umntfwanakhe umendvo ebanfwini labatiko.

Saga: Umswani wembabala kawungeniswa ekhaya.

Inchazelo: Umntfwanemtsakatsi akatsatfwa ngobe utawucedza umuti ngebutsakatsi.

Saga: Ihlonipha lapho ingayukwendzela khona.

Inchazelo: Intfombatane kumele ihloniphe wonkhe umuntfu ngobe ayati lapho iyophelela khona.

Saga: Ayigcebi lapho yale khona.

Inchazelo: Umuntfu leningasevani naye ngete aphindze akhulume lokuhle ngawe.

Saga: Kuphangwa umdzaka linile yini?

Inchazelo: Ujahela emendvweni nje kwentenjani?

Saga: Ubotidla utibeke ematsambo.

Inchazelo: Ubokhumbula kutsi licala lato litawuhlale livuke.

Uma sibuka tibonelo letingenhla, tintsatfu kuphela letineligama umendvo letisiniketa umcondvo lophelele kutsi tikhuluma ngani.

Lwati lolujulile ngelulwimi ngilo lolusisitako ekutfoleni inchazelo lophelele ngemagama lafanana nalawa: inhlanyelo umswani, wembabala nemdzaka. Inhlanyelo imele kukhula, imphilo nekwandza. Umuntfu lomsikati ekhaya ufana nenhlanyelo ngobe kufika kwakhe kusho kukhula kwelikhaya, kwandza kwemndeni nemphilo lenhle. Umdzaka uhambisana nemvula, umele imphilo nebhule. Umswani wembabala watiwa kutsi ungcolile, uyanuka futsi bantfu labanyenti abawudli ngako-ke umele kungcola, bunuku nebutsakatsi njengobe usetjentiswa kakhulu bantfu labatsakatsako.

Umuntfu loliSwati kubalula kuye kuva kutsi kusukwe kukhulunywa ngani uma kusetjentsiwa emagama latayelekile kepha ladzinga umcondvo lojulile. Tibonelo letingenhla tiveta kutsi taga takhiwe ngemagama lavakala alula kantsi ajulile. Atisiyo imisho leveta imicondvo lophelele masinyane ngako-ke kujula kwemcondvo kubalulekile. Taga tijulile, tishubile futsi tigcogcela ndzawonye lokunyenti kepha lokushiwo ngemusho noma ngemagama lambalwa.

3.4 INGCIKITSI YEKUCAPHELISA NGENGOTI

Kucaphelisa ngengoti lengahle ivele kwacala kadzeni esiveni. Kucapheliswa wonkhe umuntfu ngenhloso yekutsi angangeni engotini. Kuhle kuyibalekela ingoti isasekhashane kunekutama kuphuma kuyo sewungenile.

Indlela yekubalekela ingoti kulalela nawutjelwa, kubukisisa embikwekwenta intfo nekubutisisa nawungeva. Kubalulekile kutsatsa teluleko talabadzala nemahlahlandlela ekwenteni tintfo.

Kusetjentiswe tiffombemagama letehlukene: emanti, inkhomo, inyoka, naletinye. Kuyenteka emanti esitiba, emfula, elizubuko noma esicoja abonakale ngetulu kantsi asendzaweni lejulile futsi leyingoti. Ngiko nje kudzingeka lubhoko ngenhloso yekuweva kutsi ajule kangakanani. Lubhoko luyasita ekubalekeleni ingoti lengahle ivele. Tintsengu tiye tisiphimise ngetindlela letehlukene lesaga kanje:

Sitiba siviwa ngelubhoko.

Emanti eviwa ngelubhoko.

Inkhomo isetjentiswe ngobe kugcanyiswa kutsi intfo ibokwentiwa ngumuntfu loyatiko khona atewuyenta kahle, ngebunono nangendlela leyemukelekako. Kusetjentiswe kusengwa kwenkhomo ngoba kungesito tonkhe tinkhomo letisengekako. Lapha kucapheliswa bantfu kutsi tintfo babotishiya etandleni talabatatiko, bayekele kugagamela.

Inyoka iniketa sitfombe sebubi. Kuye kube kuhle kutsi kuliwe nentfo lembi ngekutsi kucondwane nayo ngco. Inyoka imele bubi, butsa nebungoti. Kucaphelisa ngengoti yintfo leyentiwako futsi lekumele igcizelelwe etindzaweni letinyenti. Kuphepha kubalulekile emphilweni yemuntfu. Kuphepha kubaluleke yonkhe indzawo.

Kuncono kuyibalekela ikhashane ingoti kunekutsi yenteke ngobe inemiphumela leminyenti lehlasimulisa imitimba. Imiphumela yengoti kuba tinyembeti letigeletako, buntsandzane, bufelokati, bufelwa, kukhubateka naleminyene.

Ingoti akusiyo intfo leyemukelekako ngobe iletsa lusizi nesililo. Kumele ibalekelwe etiffutsini, emakhaya, emisebentini nasetindzaweni lekukhibikwe kuto.

Luhla lwetaga leticaphelisa ngengoti

Saga: Inyoka ayilandzelwa seyisemgodzini wayo.

Inchazelo: Yekela kutifaka engotini kungakafaneli.

Saga: Inyoka kayishaywa kabili inhloko ingabonwa.

Inchazelo: Kutsatsela etulu tintfo akusikuhle ngobe kuba nemphumela lomubi.

Saga: Emanti eviwa ngelubhoko.

Inchazelo: Umuntfu kufanele abukisise kucala embikokwenta intfo.

Saga: Liso liphandlwa libukile.

Inchazelo: Ingoti ivela noma utsi ucaphele.

Saga: Inkhomo isengwa nguloyatiko.

Inchazelo: Intfo ibokwentiwa ngumuntfu loyatiko.

Saga: Inkhukhu iyawusola ummbila.

Inchazelo: Kukhona ingoti lekusoleka sengatsi ikhona.

Saga: Kawuwelwa umfula ugcwele.

Inchazelo: Ungatifaki engotini uyibona.

Saga: Inyoka ishaywe enhloko.

Inchazelo: Umbango uwucedza ngekubukana nemphehli wawo.

Saga: Ubogawula ubuke.

Inchazelo: Ubocaphela nawenta tintfo.

Saga: Lugogo luboshwa lusemanti.

Inchazelo: Balekela ingoti lifuba lisekhona.

Saga: Kubaleka lelatjwako.

Inchazelo: Uma ubona kutsi usengotini kumele utisindzise ngekusuka kuleyondzawo.

Ingoti iyabalekelwa ngenca yemiphumela yayo lemibi: lengenantfokoto, lengenakuthula lengenabuhle. Emagabazi elulwimi aye asebentise taga ngenhloso yekucaphelisa ngengoti.

3.5 INGCIKITSI YEKWELULEKA

Lena yingcikitsi leyakhako. Kweluleka kusho kubonisana, kucondzisana, kukhutsatana nekubambisana. Kwelulekana kusisekelo semphilo yemuntfu neyesive. Wonkhe umuntfu uyamdzinga umeluleki. Inkhosi kuba yinkhosi sibili ngebeluleki. Babusi kuba babusi sibili ngebeluleki.

Etibonelweni tetaga kusetjentiswe emagama lamifanekisomicondvo lalandzelako: emasongo, indlela, inyanga, inyoni neliso. Lokubatulekile emasongweni kuweva akhala, ngako-ke angeke likhale lilinye kumele abemabili kucala kute kuvakale umsindvo lolindzelwe. Inyanga kuba yinyanga sibili ngaleny noma ngaletinye. Uma iyodvwana ayiphumeleli. Inyoni yakha sidleke sayo ngekusebentisa tinsiba taleny noma taletinye. Uma iyodvwa ayiphumeleli. Liso linye alikwati kubuka ngendlela lefanele ngako-ke kumele abemabili.

Emlandvweni wemaSwati ingwenyama beyelulekwa indvuna nendlovukazi njengobe sibona lapha:

INGWENYAMA	INDVUNA	INDLOVUKAZI
Ngwane III	Mdindane Shiba	LaYaka Ndwandwe
Ndvungunye	Danile Nkhambule	Lomvula Mndzebele
Somhlolo	Masenjane Nsibandze	Somnjalose Simelane
Mswati II	Sandlane Zwane	Tsandzile Ndwandwe
Mbandzeni	Sandlane Swane	Sisile Khumalo
Mahlokohla	Mbhabha Nsibandze	Labotsibeni Mdluli
Sobhuza II	Lomadokola Sukati	Labotsibeni Mdluli Lomawa Ndwandwe

Luhla lwetaga ngengciki tsi yekweluleka

Saga: Emasongo akhala amabili.

Inchazelo: Umuntfu uphumelela uma afuna lusito kulabanye labanelwati lolujulile kunaye.

Saga: Indlela ibutwa kulabasembili.

Inchazelo: Tfolo teluleko kulabanye lasebanelwati kuze uphumelele.

Saga: Inyanga ayitelaphi.

Inchazelo: Uma inyanga igula ifuna lusito kuletinye tinyanga. Umuntfu utfola lusito kulabanye.

Saga: Inyoni yakhela ngetinsiba talenye.

Inchazelo: Umuntfu uphumelela ngekutfola lusito kulabanye.

Saga: Liso aliphumeleli lilinye.

Inchazelo: Teluleko talabanye tibalulekile kuze ube nemphumelelo.

Saga: Litfumba liphola ngekwekhanywa.

Inchazelo: Lokukuhlupha emoyeni kuphela ngekutsi ukucoco nalabanye.

Saga: Ligundvwane alibekwa nelukhotsi.

Inchazelo: Umuntfu akashiywa nentfo lesilingo kuye.

Kweluleka kunemlandvo lomudze esiveni semaSwati ngako-ke kumele kugcanyiswe ngobe kukhombisa kusebentisana, kusitana, kukhutsatana nebunye.

3.6 **INGCIKITSI YEKUSONGA**

Kusongela umuntfu akusiyo intfo lenhle nalekhutsatwako ngobe kukhombisa kulwa nenhlitiyo lelukhuni. Kusonga kuhambisana nemagcubu laholela ekulweni. Imphi leyiye icubuka ekhatsi kwebantfu noma tive isuke icale ngetinsongo nemagcubu.

Kumele kuliwe kakhulu netinsongo ngobe atakhi etimphitweni tebantfu. Kusongelana kumele kucedvwe kuto tonkhe tindzawo temmango, ukhutsatwe kuthula, bunye nekubambisana.

Emakhosi lamanyenti emaSwati abengevani netimphi, kepha afuna kuthula nemusa ngaso sonkhe sikhatsi. Loko sikubona emakhosini lafana, naboMatalatala, Dlamini II, Ngwane II, Sobhuza I, Sobhuza II nalamanye. Umuntfu lophila ngekwemasiko nemihambo yesive akahambisani netinsonga, emagcubu, inkhani nekuhhwebana, kepha ukhutsata buntfu.

Lokuvisa buhlungu lapha kutsi akekho loffola kuphumula ekhatsi kwemsongeli nemsongelwa, bobabili bahlala bakhatsatekiile.

Taga ngenqikitsi yetinsongo

Saga: Ubolibamba lingashoni.

Inchazelo: Kusho kutsi umntfwana utawugcogcwa kuhlwa abuye ekhaya bese uyajeziswa.

Saga: Abase babonana batawuphindze babonane.

Inchazelo: Akubonanwa kwekugcina kepha kutawubuye kubonanwe futsi.

Saga: Utawukhomba umuti lonetjwala.

Inchazelo: Tinsongo tekutsi utawubona kahle.

Saga: Utawuphemba ungawotsi.

Inchazelo: Utayicala intfo kepha siphetho sayo ngeke usibone.

Saga: Kutawukugcogca kuhlwa.

Inchazelo: Bulukhuni nebumatima butawufika bukubambe.

Lokuphawulekako ngetaga letisongako kutsi tiphimiseka ngesigci lesinemfutfo nemandla. Taga letinyenti letigcogcekele ngaphasi kwetinsongo tikhombisa kulwa, khlukumeta, kuphelelwa sineke nebutsa.

3.7 INGCIKITSI YEKUFA

Kufa kwehlukana kwemphefumulo nemtimba. Kuyenteka kuko konkhe lokuphilako. Kufa akwetayeleki ebantfwini, kepha kwenteka kuyo yonkhe imizuzu. Kufika kubange sililo lesikhulu ebantfwini.

Utsi umndeni uhleti kahle kufike kuwudvunge umuti. Kutsatsa babe welikhaya kwatiwe kutsi insika yemuti iwile, make welikhaya abitwe ngekutsi ngumfelokati. Uma kutsetse make welikhaya kucala, babe usala abitwa ngemfelwa. Uma kutsetse batali noma banikati bemuti bobabili bantfwana basala babitwa ngelintsandzane. Konkhe lokwentekako uma kufike kufa kuhambisana nefinyembeti.

Kufa kufika noma kunini. Kufika emini, ebusuku, libalele, ligucubele; kujatjuliwe, kukhalwa. Akukhetsi bulili nebulilikati, bukhulu nebuncane, kepha kufika kuwo wonkhe umuntfu kuyintjintje imphilo yakhe. Uma abekhomba ngalosekhatsi adle imbuya ngelutsi.

Kufa akwatiwa kutsi kwavela nini nekutsi kwacambeka njani ngaphandle kwekubambelela etinganekweni. Yintfo lefika nesihluku lesetfusako etimphilweni tebantfu, kuntjintjeke timphilo tabo ngekutsi kube mnyama kukhanya.

Emagabazi elulwimi kufa akuniketa timphawu tebuntfu kube sengatsi kuyaphila ngekutsi kutsiwe akunamahloni futsi akunantsandzane.

Lisiko lase-Afrika kutsi umuntfu losishiyile atjalwe endzaweni yakhe yekugcina lidliza noma liliba. Lidliza liyahlonishwa, liyanakekelwa, alikhonjwa nome kanjani, alimelwa futsi akukhulunywa ngalo nome kanjani. Lenye indzawo lebalulekile nguleyo lechazwa nguKasenene (1993:43) kanje:

Another sacred place related to death is Sivivane. If a person dies in a particular place, away from home, members of the family put a stone on that spot every time they pass by, before the kubuyisa ritual. At times, other people also put a stone or grass on the heap hoping to get some blessings from the ancestor who died on that spot. This heap, sivivane, builds up as passers-by continue to add

grass and stones on it. If it is near a path which is used by many people, it may grow very quickly into a big heap which may grow to the size of an ant-hill or even bigger. This place is a sacred place because it is associated with an ancestor. Whoever adds a stone to it hopes to receive some blessings from that ancestor who died at that spot.

Tive talabamhlophe nato tiyayibekisa indzawo lapho kushonele lomunye wakubo ngekutsi kubekwe siphambano lesibatiwe netimbali eceleni. Onkhe emadliza abo ayakhiwa futsi ayanakekelwa. Loko kukhombisa kutsi cishe tonkhe tive letikhona ngaphasi kwemtfunti welilanga tiyakwatisa kufa ngaphandle kwalenkholo lensha lengumvutfwamini.

Luhla lwetaga ngengcikitsi yekufa

Saga: Kusinwa kudedelwane.

Inchazelo: Kugcama labanye lamuhla, kusasa kube ngulabanye.

Saga: Kufa akunamahloni.

Inchazelo: Kufa kutsatsa wonkhe umuntfu, akukhetsi.

Saga: Tonkhe titiba tiyawugcwala umhlabatsi.

Inchazelo: Konkhe kwasemhlabeni kuyaphela. Akukho lokufawuphila kuze kube phakadze.

Saga: Kufa akunantsandzane.

Inchazelo: Kufa akukhetsi simo semuntfu, kepha kutsatsa wonkhe.

Saga: Sihlahla sifa netimphandze taso.

Inchazelo: Kuyenteka ngalesinye sikhatsi umndeni ucotseke wonkhe uphele nya.

Saga: Lalani ngelinceba.

Inchazelo: Sale nicola, ngobe sekwentekile.

Saga: Sitja lesihle asidleli.

Inchazelo: Umuntfu lotsandvwako uyashesha kufa.

Saga: Akukho mntfwana lokhasa katsafu.

Inchazelo: Umuntfu ukhasa asengumntfwana, abuye akhase nalapho asagugile, kepha-ke lesitsafu lifuba akalifoli.

Uma kufa kufikile emndenini kuphela lutsandvo sibindzi, kwati nekuhlakanipha. Kuye kudlange lusizi nesililo. Kufa kuyehlukanisa kunekuhlanganisa bantfu, kuletse lusizi kunenjabulo, kuletsi bubi kunebuhle.

3.8 **INGCIKITSI YEBUWULA**

Buwula buphikisana nenhlakanipho. Buwula kwenta intfo lengemukeleki ngenca yetizafu letisite letifanana naleti:

- kwenta intfo ungakacabangisisi.
- kwenta intfo ngobe ukhohlisiwe.
- kwenta intfo ngekungahlakaniphi.
- kwenta intfo ngendlela lephambene.

Buwula buhambisana nekungasebentisi ingcondvo ngendlela lejulile. Buwula yintfo leyenteka etikhatsini letitsile emphilweni yemuntfu ngiko nje kuye kuvetwe

ngalokusobala kutsi umuntfu wente tento tebuwula kuphi nangekwenta tiphi tento.

Kutsatsela etulu tintfo kuyalubhimbisa luhlelo kugcine kubonakala buwula kunenhlakanipho. Kucabanga kancane kuyakufaka etinkingeni letinkhulu kugcine kugcame buwula. Kuhlanketela tintfo kuveta buwula kunenhlakanipho.

Tento tebuwula tifakana engotini yekulimala nome yekufa. Konkhe lokuveta buwula kuyanyembenywa, kwetfukwe, kukhafulelwe ngenca yekungemukeleki ebantfwini.

Umntfu losiwula uhlala abukene netinkinga njalo ngobe labo labatihlakaniphi baye badlale ngaye. Buwula abusiyo intfo lenhle ngobe bukudvonsela emanti ngemsele kugcine kudlalwa ngawe. Kumele bantfu bakwati kwehlukana ekhatsi kwebuwula nekuba nemcondvo lomncane. Kubalulekile sati kutsi mukhulu umehluko lokhona ekhatsi kwalabantfu.

- Umntfu losiwula.
- Umntfu lonemcondvo lomncane.
- Umntfu logulako ngekwemcondvo.

Luhla lwetaga ngengcikitsi yebuwula

Saga: Tinyosi tidla luju lwato.

Inchazelo: Kutilimata ngekutsi ucedze loku lekumele kukusite.

Saga: Tiwula tilifa letihlakaniphi.

Inchazelo: Buwula balabanye kudlalwa ngabo ngulabo labahlakaniphile.

Saga: Intfwala idla lihlati layo.

Inchazelo: Umuntfu losiwula uvukela labo labomsitako.

Saga: Utibona emaphiko ekundiza kantsi atindizi tonkhe.

Inchazelo: Akahlakaniphi kahle. Timo tabo tibukeka tetsembisa kantsi tilite.

Saga: Katiphelelanga kwasala ncedze nalogwaja.

Inchazelo: Akahlakaniphi. Tento takhe tebuwula.

Buwula kwenta intfo lengemukeleki lekhombisa kucabanga kancane, kuphambuka endleleni lefanele nekuphaphalata. Umuntfu lowente tento tebuwula uye awabone emaphutsa akhe, atisole kakhulu.

3.9 INGCIKITSI YENKHANI

Inkhani kwenta intfo ngemandla, ngemfutfo nangekuphocenelela. Kusebentisa inkhani akusiyo intfo lenhle ngobe kuhambisana nengoti. Tikhona tindzawo lapho kuye kudzingeke kusetjentiswa kwayo inkhani, kantsi esikhatsini lesinyenti ayidzingeki ngobe ibulwane.

Umuntfu loliphikankhani noma umbeleseli akavami kuphumelela etentweni takhe, kepha ugcina angene etinkingeni letinkhulu. Tilwane letatiwa ngekuba nenkhani nguleti letatiwa ngekutsi tidlanyama: emabhubesi netingwe. Tatiwa ngelulaka, inkhani nebulwane. Ngaso sonkhe sikhatsi inkhani yeyamaniswa nato.

Etageni letingentasi kusetjentiswe emagama lamifanekisomicondvo lalandzelako: Liselesele, litje, litubanemvundla. Liselesele lisetjentiswe kulesaga ngenhloso yekukhombisa tento talo tenkhani. Umvundla noma logwaja

kubukwe kubaleka kwakhe ayewusitsela njalo. Lituba kubukwe kundiza kwalo liyewushona khashane, kantsi-ke litje kubhekwe kucina nebulukhuni balo.

Luhla lwetaga ngengcikitsi yenkhani

Saga: Akusinkhani liselesele libange emsamo.

Inchazelo: Kwenta intfo ngenkhani ungakhuteki.

Saga: Hamba tuba bayokuhlutsa embili.

Inchazelo: Chubeka nekwenta loku lewukhutwa kuko tintfo tiyokucaka embili.

Saga: Umvundla tiwuncandza embili.

Inchazelo: Kwenta intfo ngenkhani noma ukhutwa kuyacakana ngobe ugcina ngekutisola.

Saga: Kwaphekwa yena nelitje kwavutfwa litje kucala.

Inchazelo: Ngumuntfu lophikelelako futsi lowenta tintfo ngenkhani, longakhuteki nalongahleleli emuva.

Saga: Babuyisi basembili.

Inchazelo: Tiyokucaka tintfo embili bese ubuya emuva.

Inkhani yintfo lekumele ibalekelwe ngaso sonkhe sikhatsi ngobe ihambisana nekweswela buntfu. Kumele kukhutsatwe kubonisana, kucocisana nekwelekelelana kunekusebentisa emandla enkhani.

3.10 INGCIKITSI YEMASHWA

Kuba nemashwa kusho kweswela inhlanhla. Akusiyo intfo lenhle kuba nemashwa futsi kunemiphumela lemibi etimphilweni tebantfu. Ligama letsi lishwa liphikisana nalelitsi inhlanhla. Lamanye emagama lasho lishwa ngulawa: umnyama, sinyama, ibhadi, likhombo nalamanye.

Emashwa abonakala ekwenteni tintfo ngekutsi kungabiko imphumelelo. Kuyinkholelo yebantfu kutsi imbangela yemashwa kungenti tintfo ngendlela lefanele kutsintseke labaphilako nalabangasaphili:

- UMvelinchanti.
- Emadloti - bantfu lasebalala.
- Bantfu labaphiko.

Indlela yekulwa nemashwa kwenta tintfo ngendlela lefanele. Kubambisana nalabanye bantfu kusetjentwe ngemoya lamuhle, lopholile nalokhutsatako. Kugcamisa bucotfo nebuntfu.

Lapha kusetjentiswe imifanekisomicondvo lelandzelako inyoni, lilumbo, inhlangi naleminye ngehloso yekuveta kwenteka kwemashwa.

Luhla lwetaga ngengcikitsi yemashwa

Saga: Itsi ingahlutfuka sisila ihlekwe.

Inchazelo: Umuntfu lotkhukhumetako uye ahlekwe lapho tintfo tingasamhambeli kahle.

Saga: Lilumbo lidla umninilo.

Inchazelo: Umuntfu ulinyatwa yintfo abecondze kutsi ilimate lomunye.

Saga: Yeka kufa kwekutenta.

Inchazelo: Lapho umuntfu atilimate ngesikhali sakhe.

Saga: Inhlanti ishelwe ngemanti.

Inchazelo: Uphumele ebaleni inhlupheko yakhe yabonwa nguwo wonkhe umuntfu.

Saga: Inyoni lenkhulu itsi ingafa kubole emacandza.

Inchazelo: Kufa kwemnumzane kwenta tintfo tonakale unomphele.

Kubalulekile kutsi umuntfu acale atihlole yena ngekhatsi enhlityweni futsi acwangingisise ngekucaphelisisa tento takhe emikhakheni yemphilo embiwekusho atsi unemashwa. Emashwa kulesinye sikhatsi avela ngekwetento letiphambene letitsintsa inhlebo, butsakatsi, bugebengu, bucabanisi, umona, nalokunye.

3.11 **INGCIKITSI YEKUNGABI NEBUNTFU**

Kungabi nebuntfu sento lesibi futsi lesingemukeleki phasi kwemtfunti welilanga. Kuba nemitselela leminyenti lemibi lehambisana nekutiphatsa kabi, bulwane, umona, inkhohlakalo nekungacabangeli labanye bantfu.

Kweswela ubuntfu akusiyo intfo lecale kubonakala kuleminyaka lena, yacala kadzeni kusabusa emakhosi lacamba tive letikhona nyalo. Taga letingaphasi kwalengcikitsi tiveta ngalokuphelele bulukhuni bemphilo.

Umntfu lovamise kuba sitsa kuwe kuba nguloyo lomsite kakhulu wakhombisa kumnakekela nekutinikela ekuphumeleliseni yonkhe imitamo yakhe. Loyo muntfu uba yingoti ngetulu kwabo bonkhe labanye bantfu lose waba nebudlelwano nabo.

Buntfu kumele bukhutsatwe ebantfwini. Umuntfu longenabo buntfu silwane sibili. Lowo muntfu akamcabangeli lomunye, akamsiti lomunye, akamveli lomunye. Inhlitiyo yemuntfu longenabuntfu ihlala igaya tiboti njalo. Saga lesitsi, inja idla umnikati sisebentise umfanekisomcondvo wenja njengesilwane lesinemnikati, lesifuywako, nalesigadzako. Uma seyidla noma seyiluma umnikati kusuke sekuvela bulwane, kungetsembeki, kungabongi nekungatiphatsi kahle.

Sive semaSwati asihambisani netigameko letikhombisa kweswela buntfu letifanana naleti:

- Kulwa lokugcina kucitse ingati.
- Kungalekelelani lokuphambene nalokwentiwa lilima.
- Kubukelela umuntfu lodla imbuya ngelutsi lokuphambene nekusita.
- Kuba yinkhomo ledla yodwa lokuphambene nemihambo yesive.
- Kumenywa esibhimbini lokungentiwa ngekwemihambo yesive ngobe kumele nakuke kwafinyelela etindlebeni takho kutsi kutawube kusindvwe ngebelitfole kaSibanibani unikele khona.
- Kubandlulula bantfu ngekwelifa.
- Kwenana lokuya etfunjini.
- Kudzabula ekhatsi tinkhomo temnumzane.
- Kudla nekunatsa emanti bume.
- Kuteka tindzaba telive netelikhaya bume.
- Kungahloniphi tiphatsimandla, tindvuna, tikhulu, ingwenyama, njalonjalo.
- Kunganakekeli emabanga ekukhula kwebantfwa nemisebenti yabo lebalulekile emasikweni nasenchubeni yesive.
- Kubukela phasi tindlela tekwelapha tifo nekusebentisa imitsi yase-Afrika.
- Kukhobosa emadloti njengebachumanisi bemuntfu neliDloti lelikhulu, uMvelinchanti.

Luhla lwetaga ngengcikitsi lephatselene nekungabinabuntfu

Saga: Umbeki wenkhosi akabusi nayo.

Inchazelo: Umuntfu losita labanye bavama kumkhohlwa lapho sebaphumelele.

Saga: Inja idla umnikati.

Inchazelo: Kulimata loyo lokondlako ngenca yekweswela buntfu.

Saga: Umlungisi utitsela sisila.

Inchazelo: Umuntfu lowentela labanye lokuhle uvamise kutfola inkhokhelo yebubi.

Saga: Emabutto akhohlisana ahlomile.

Inchazelo: Loyo naloyo wenta lakucabangako nalabona kukuhle kuye.

Saga: Udlala ngelikhuba kutiliwe.

Inchazelo: Wenta intfo lengakafaneli ngesikhatsi lesingakafaneli.

Buntfu bubalulekile ngekuhlanganisa tinhlanga letiphila ngephasi kwemtfunti welilanga. Buntfu buhambisana nemusa, kubeketelelana, kuvana, kusitana, kusebentisana nekubumbana. Buntfu buphikisana nemona, butsa, kungabongi, kungavelani, kungasitani nekungabambisani.

3.12 INGCIKITSI LEPHATSELENE NEKUTIGCABHA

Kutigcabha akusiyo intfo lekhutsatwako uma kuhambelana nekukloloda, kweyisa nekubukela phasi labanye ngenca yetimo letitsite letibatsintsako letifanana naleti:

- tici letisemifimbeni.
- tento labatentako.

Kutigcabha kusho kutiphakamisa, kutati nekutibona buncono kunalabanye. Kuye kuhambisane nekunotsa. Esikhatsini lesinyenti umuntfu lonjingile noma lonotsile ngekuba nemfuyo nemali uye alingeke ngekutsi abe ngulotigcabhako. Kuyenteka kulesinye sikhatsi kube ngumuntfu lowenta umsebenti lotsite lotigcabhako. Kwetayelekile kulabo labasebenta emahhovisi kutsi kube ngabo labagajwe ngulomkhuba. Ngiko nje uva bantfu labanyenti bakhuluma batsi.

- Utigcabha njengamabhalane ehhovisi.
- Utigcabha njengesicukutwane.

Kutigcabha kuyakhutsatwa uma kuhambisana nekungatikhobosi nekufishaya sifuba ngetintfo letitsite lewunato, lekungaba tintfo letiphatsekako noma tici. Kwetayelekile kuva bantfu batsi:

- Ngiyatigcabha ngelibala lami lengaliphiwa nguMvelinchanti.
- Ngiyatigcabha ngetici tami (bufisha, budze, kukhuluphala, bumphumphutse, emasoli, emalimi, njalonjalo).

Etageni letitibonelo letisihlanu kusetjentiswe tilwane ngehloso yekundlulisa umlayeto lotsintsa kutigcabha. Tento letentiwa nguletilwane ngito letiletsa imicondvo kuletaga: kuhlekana tiphongo, kukhala kwelichudze, kutfwala umdlonga, kuhlalwa yimphungane nekunona kwengulube.

Luhla lwetaga letiphatselelene nekutigcabha

Saga: Timfene tihlekana tiphongo.

Inchazelo: Ubona tici talabanye, awutiboni takho.

Saga: Nalapho kungakhali khona lichudze kuyasa.

Inchazelo: Noma ungekho tintfo tihamba kahle.

Saga: Uhlala atfwele umdlonga.

Inchazelo: Ungumntfu lotiphakamisako noma lotikhukhumetako.

Saga: Akahlalwa yimphungane.

Inchazelo: Ungumntfu lotitsandzako.

Saga: Akwatiwa lokwanonisa ingulube.

Inchazelo: Kukhetsa kudla kukwenta ubulawe yindlala.

Kutigcabha yintfo leyentiwa bantfu ngenhloso yekugcamisa simo lesitsite sebhule noma sebubi, sekutikhukhumeta noma kutikhobosa. Kubalulekile kutsi kutigcabha kwenteke etikhatsini letifanele nasetindzaweni letifanele.

3.13 INGCIKITSI YEKUKHULISWA KWEBANTFWANA

Indlela yekukhulisa bantfwana ibaluleke kakhulu esiveni sonkhe. Umntfwana uye akhule kahle uma ati kutsi wonkhe umntfu kumele amhloniphe ngendlela lefanele. Kumele abone wonkhe umntfu lomdzala afana neyise nenina, nagogo namkhulu wakhe. Konkhe lakwentako kulaba kumele kube tintfo langatsandza kutsi tenteke kuye.

Umntfwana ukhuliseka kahle uma ati emagama latsi: babe, make, gogo, mkhulu, nalamanye. Likhaya lisisekelo senhlonipho nekutiphatsa kwemntfwana. Sikolo setsasisela kuloku lakufundza ekhaya umntfwana. Lisontfo liyengeta kuloku losekufundvwe ngumntfwana.

Umntfwana kumele akhuliswe ngemasiko lafanele kusukela aluswane aze

afinyelele ezingeni lebudzala lekutimela. Kumele endlule kuto tonkhe tigaba tekukhula aniketwa imfundziso lefanele.

Etibonelweni letingentasi kusetjentiswa tiffombemagama letilandzelako: umutsi lomele imphilo nekukhula, inkhonyane lemele imphilo nebusha, inyoni lemele buhle noma lokuhle, inkunzi lemele emandla, bukhulu nebuholi.

Umntfwana akatikhuleli yena ngaphandle kwekusitwa nekufundziswa ngulabadzala. Imfundziso yalabadzala iba nendzima lebanti kakhulu ekukhulisweni kwebantfwana. Kumele afundziswe kutsi abotiphatsa njani lapho anebangani, tihlobo nebantfu labadzala. Kumele ati kutsi wonkhe umntfu lomdzala umtali wakhe noma bangesibo bengati yinye.

Umntfwana lokhuliseke kahle uyashesha kufinyelela etinhlosweni takhe ngekutsi aceceshelwe umsebenti lawutsandzako. Kufundza ube ngummeli, nguthishela nathishelakati, ngudokotela, ngumfundisi, ngumhlengi nemhlengikati kuyinkhomba nemphumela wemfundziso yalabadzala leyendlalele imfundvo yasesikolweni.

Uma imfundziso nemfundvo kwesekelene kahle etimphilweni tebantfwana, angeke sibe nabosidlani, tephulamtsetfo, tinswelaboya bosikhotseni, bagagadleli nialetinye tigilamkhuba.

Luhla lwetaga ngengcikitsi yekukhuliswa kwebantfwana

Saga: Umutsi ugotjwa usemanti.

Inchazelo: Umntfwana kumele afundziswe indlela lefanele asemncane ngobe kuyawuba lukhuni kumfundzisa asakhulile.

Saga: Inkunzi isematfoleni.

Inchazelo: Kumele bantfwana bakhuliswe kahle ngobe kuyawuchamuka baholi kubo.

Saga: Inyoni ishayelwa labakhulu.

Inchazelo: Umntfwana kumele akwetfule abatalini bakhe konkhe lakutfolako.

Saga: Umntfwana ugaba ngenina.

Inchazelo: Umntfwana wedzelela ngobe atsembe make wakhe.

Saga: Inkhonyane lenhle ngulekhotfwa ngunina.

Inchazelo: Kuncono kuba namake ngobe ukuniketa lutsandvo lolufanele.

Umntfwana longamange akhuliseke kahle ubonakala ngetento nekukhuluma kwakhe lapho anabontsanga yakhe nebantfu labadzala. Lokhuliseke kahle kuye kusho wonkhe umntfu atsi kaSibani batiniketa litfuba lelanele futsi bakhombisa kutimisela ekukhuliseni umntfwanabo.

Imphandze yekukhulisa umntfwana kumfundzisa inhlonipho, buntfu, kuchumana kahle nalabanye ngendlela lefanele, leyemukelekako nalekhutsatako.

Uma luswana luvela noma lubelekwa ngunina ngemzuzu wekucala emhlabeni luye lukhale. Kukhala kwalo kuhunyushwa bahumushi labanyenti batsi lusuke lubingelela eveni noma lusuke lutsi, "naku mine sengikhona". Kubingelela kwalo umhlaba ngiyo inhlonipho leyo. Nawufika noma uhlangana nebantfu nichumana ngekubingelelana. Luswana luchumana nemhlaba ngeliphimbo. Liphimbo leluswana luyachumanisa.

Inhlonipho ivela ngetindlela letinyenti: ivela ngelivi lapho luswana lukhala, ivela ngekuchebulana lapho bantfu lababili bahlangana babingelelana; ivela ngekugoba emadvolo kwalomncane ngobe abingelela umuntfu lohlonishwako eligunjini lelitsite njengathishela, mantji, ummeli wasemajajini, lijaji, inkhosi yesive nalabanye.

Inhlonipho igcama kumuntfu kusukela atalwa, akhuliswe ngayo seyifake imihambo nemasiko esive. Inhlonipho ihambisana naletinye tingcikitsi temphilo letifanana nebuntfu, lutsandvo, inkholo, imvelo, bunye, kukhutsatana naletinye.

3.14 INGCIKITSI LETSINTSA LUFUTO

Lufuto lusho kufanana ngekwetento nesimo. Esikhatsini lesinyenti lufuto lubukwa ebantfwini. Kuye kubukwe umntfwana acatsaniswe nebatali bakhe. Umntfwana uye afute batali bakhe ngetici letitsite letibonakala emtimbeni wakhe. Kulesinye sikhatsi uye abafute ngesimo netento takhe.

Etibonelweni tetaga letingentasi kusetjentiswe emagama lamifanekisomicondvo lalandzelako: lukhuni nenkhonyane kukhombisa lufuto. Ngekubuka bantwana labanyenti uye ubone ngalokuphelele simo netento tebatali babo, ubuye wati nemphilo yasemakhaya labaphuma kuwo. Uma ungumtali kühle ukhulise bantfwana ngendlela lefanele ngobe live lisebentisa bona njengesibuko selikhaya lakho.

Sibona kucatsanisa kuleso naleso saga. Likhuni lubukwe lwacatsaniswa nemlotsa; inkhonyane ibukwe nenina; umbala wabukwa nekhonyane. Uma sikhuluma ngelufuto sibuka ngekucatsanisa umntfwana nemtali.

Taga ngengcikitsi letsinta lufuto

Saga: Lukhuni lutala umlotsa.

Inchazelo: Umuntfu locotfo kuyenteka atale umntfwana longafani naye ngesimilo.

Saga: Ikhonyane yemdlandla yeca lapho kweca khona unina.

Inchazelo: Umntfwana ufuta batali bakhe ngebuhle noma ngebubi.

Saga: Umbala ucaca enkhonyaneni.

Inchazelo: Umntfwana ufuta batali bakhe ngetento letinhle noma letimbi.

Taga letitsintsa lufuto tiyahambelana naleto letiphatselene nekusekwa kwemifi, kukhuliswa kwebantfwana nekuphatsana kwebantfu. Lufuto luyincenye yemphilo yebantfu ngobe luyacatsanisa lubuye lufanise.

3.15 INGCIKITSI LEPHATSELENE NEKWEHLULEKA

Kwehluleka kuphikisana nemphumelelo. Kwehluleka akusiyo intfo lekhusatwako ngobe kunemphumela lomubi. Kubekwe njengengcikitsi lapha hhayi ngobe kugcanyiswa kunaletinye tingcikitsi. Inhloso kuphawula ngako bese kunyembenywa.

Kwehluleka kubonakala emikhakheni yemphilo leminyenti: emidlalweni, emitameni, enkhulumeni, efikhundleni, njalonjalo, kwehluleka kubakhona ngemuva kwemitamo leminyenti lelwa nemphumelelo.

Lekumele kwatiwe kutsi kwehluleka umuntfu lowenta imitamo hhayi logoce tandla wabukela lokwentekako. Tinyenti tindzawo lapho umuntfu aye ehluleke khona njengaleti:

- Kwehluleka emdlalweni.
- Kwehluleka emsebentini.
- Kwehluleka esikhundleni.
- Kwehluleka enkhulumeni.

Kwehluleka kwenta umuntfu asebente kamatima ngoba alungiselela kutsi aphumelele ngemuso. Kusilinganiso semagalelo emuntfu lesenta abone kutsi kumele alungise kuphi, acinise kuphi futsi atfole teluleko letinjani.

Kusetjentiswe imifanekisomicondvo lefana nalena: imphi, emahawu, inkhukhu, umjuluko, tandla, tinyawo, ematse naleminye kugcamisa kwehluleka.

Luhla lwetaga ngegcikitsi yekwehluleka

Saga: Imphi idle emahawu.

Inchazelo: Kusho kwehluleka.

Saga: Inkhukhu ijutjwe umlomo.

Inchazelo: Uphelelwe akati kutsi utawukwentani.

Saga: Umjuluko wenja uphelela eboyeni.

Inchazelo: Kusebenta kwakhe akubonakali.

Saga: Kwetfu kwetandla ngabe kwetinyawo bekutatihambela.

Inchazelo: Akukho lokulungako kuyo yonkhe imitamo yetfu.

Saga: Ematse abuyele kasifuba.

Inchazelo: Uphelelwe akasati kutsi utawutsini.

Taga letibalwe ngenhla tigcamisa ingcikitsi yekwehluleka, kuphela

kwemachinga, kuphela kwemitamo nekwenta lokunganamphumelelo. Emagabazi atsi kuncono kutama wehluleke kunekwehluleka kutama.

3.16 INGCIKITSI YEKUTIPHINDZISELA NELUNYA

Kutiphindzisela akusiyo intfo lenhle, lekhutsatwako nalemukelekako ngobe akwakhi lufu kepha kuyabhidlita. Lunya luhambisana nenhlitiyo lembi, butsa, umona nemagcubu. Kuphindzisela nelunya tintfo letingemukeleki ngobe tiphambene nebuntfu.

Tento tekutiphindziselela tiveta similo semuntfu. Lokungenani kuye kube kuhle kumzuza lowomuntfu lowonile, umbonise, umfundzise, umkhutsate, umeluleke kunekutsi uphindzisele lokubi kuye. Kuphindzisela kuhambisana nebuchwaga, kubandlulula, kuphelelwa ngunembeza, kungasebentisi umcondvo ngendlela lejulile nebulwane.

Kusetjentiswe emagama emifanekisomicondvo lalandzelako: lunya, liphela, lizinyane nemancina kugcamisa imphindziselo nelunya. Kuphindzisela ngekwemavi nangekwetento akwakhi kepha kubhebhetsela simo embili kugcine kudaleke lomkhulu umonakalo.

Luhla lwetaga ngengcikitsi yekutiphindzisela nelunya

Saga: Lunya lwabasha luyaphindzana lwetalukati luphindzana ngelugwayi.

Inchazelo: Umuntfu lophetse kabi lomunye kumele alindzele kuphindzisela.

Saga: Ukhetsa liphela emasini.

Inchazelo: Uyabandlulula.

Saga: Lizinyanelebube alidliwanga yingwenya kwacweba titiba.

Inchazelo: Uma uvise umuntfu buhlungu lobukhulu, lindzela kutsi naye utawutiphindzisela.

Saga: Ungibophela emancina enyatsi.

Inchazelo: Ushaya sengatsi uyangisita kantsi ungiholela engotini.

Kumele kuliwe nemphindziselo nelunya ngenhloso yekukhutsata kubuyisana nebunye. Bunye nebuntfu kumele kugcugcutelwe ebanfwini bonkhe noma behlukene ngekwebuve, ngekwembala, ngekwemazinga emphilo nemnotfo nangekwebulili.

3.17 INGCIKITSI YEKUPHATSANA KWEBANTFU


Kuphatsana kwebantfu kwehlukene kabili: kuphatsana kahle noma kabi. Kuphatsana kahle kuyakhutsatwa ngobe kukhombisa buntfu. Kuphatsana kabi kumele kuliwe nako ngobe akwaxhi kepha kuyabhidlita.

Saga lesetayelekile ngulesitsi, umuntfu ngumuntfu ngebantfu lesisho kutsi umuntfu kumele atiphatse kahle ngekutsi alekelelane futsi asitane nalabanye ngobe imphilo yeyame etentweni talabanye. Kuphatsana kahle kumele kukhutsatwe kubo bonkhe bantfu, labancane nalabadzala, labasikati nalabadvuna. Sive semaSwati siyakwatisa kuphatsana kahle ngobe kungumhambo nesisekelo semasiko aso.


Letinye tive tiye tiphawule ngemagama lahlabako noma layinhlamba letiye tiweve emilonyeni yemaSwati. Liciniso leliphелеle kutsi kuteketisa kwemaSwati loko. Asikho sive lesikhutsata emavi lahlabako nalekuyinchubo yaso kuwaphimisa.

Kuphatsana kahle kubalulekile emakhaya, etitfutsini, emihlanganweni, etibhimbini, emasontfweni, etikolweni, njalanjalo. Kuphatsana kahle kusisekelo semphilo yebantfu. Kuphatsana kahle kuye kubonakale emazingeni lafanana nalawe:

Emazinga ekukhula



Emazinga etikhundla



Iaga ngengcikitsi yekuphatsana kwebantfu

- Saga: Tandla tiyagezana.
- Inchazelo: Umuntfu usita labamsitako.

Saga: Kwandza kwaliwa ngumtsakatsi.

Inchazelo: Kubongwa lokuhle lokwentakele.

Saga: Ubophainja netinkhuni.

Inchazelo: Uyemana.

Saga: Luhlobo lolungabekelwainja.

Inchazelo: Bantfu lababi lekumele bangandzi.

Saga: Sigubhu lesingenabutfumbu.

Inchazelo: Ungumntfu lonesimilo lesibi.

Saga: Udlela emkhombeni wemphaka.

Inchazelo: Wedzelela kabi.

Saga: Ikhahlela labayisengako.

Inchazelo: Unelulaka lolubi kakhulu, ngobe akusondzelwa edvute kwakhe.

Saga: Live liyengcayelwa.

Inchazelo: Kumele uhloniphe nalabo longakasondzelani nabo.

Kuphatsana kahle kwebentfu kwakha buhlobo lobungapheli. Kwenta bantfu batisane, bakhumbulane bavelane babuye basitane. Kuye kubuse umoya wekuvana, wekubambisana newekukhutshatana ekubhekaneni netimo temphilo.

3.18 SIPHETFO

Tingcikitsi tiyimikhakha yemphilo. Titincenye letehlukene letihlanganiswa takhe imphilo lephelele. Kukhetfwe tingcikitsi letilishumi nesitfupha kuphela ngenhloso yekugcamisa kubaluleka, kusebenta nendzima letiyidlalako ekutfutfukiseni imphilo yebantfu.

Tingcikitsi tikhombisa ngalokuphelele kutsi imphilo yakhiwe yesekelwa buhle nebubi, bukhulu nebuncane, imphumelelo nekwehluleka, tinhlanhla nemashwa, kuphila nekufa, buwula nebuhlakaniphi.

SEHLUKO 4

4.0 KUHLELEKA KWETAGA NGEKWESAKHIWO

4.1 SINGENISO

Kwakheka kwetaga kutsintsa luhlelo nelulwimi. Ngaphasi kwalesehluko kutawubukwa loku lokulandzelako:

- Sigci noma umsindvo lovakalako uma kuphinyiswa taga.
- Linani lemagama lakhe saga ngasinye.
- Kubuka saga njengemusho nekusebenta kwaso naleminyane imisho.
- Kwakheka kwetaga ngekusetjentiswa kwetitfo tenkhulumo.
- Kugcama kwetinongo tenkhulumo etageni letehlukene babuye bahlatiye.

Kuhleleka kwetaga kukhombisa lizinga lelisetulu. Kwenta sibone kutsi tancanjwa bantfu labacabanga bajule, banome, bacwaningisise.

Sive kuye kube sive lesinelulwimi kwaso futsi lesitigcabhako ngalo ngetaga. Kwakheka kwetaga kukhombisa kusebentisa imicondvo ngendlela lenebuciko.

Kuhleleka kwetaga ngekwesakhiwo akupheleli kuloku lokubalwe ngenhla, finyenti tindlela letingalandzelwa. Lapha sikhetse kubuka letimbalwa letilingene umtsamo walolucwaningo futsi letilandzelelekako.

Sigci sitawubukwa emakhonweni lalandzelako: luchumano, imvumelwano, kweciwa kwabonkhamisa, linani lemagama lakhe saga nekusetjentiswa kwemagama esageni.

Sigci sivetwa nayingcikitsi lecuketfwe saga. Saga lesitsintsa intfokoto sinesigci lesisheshako lesikhombisa kujabula, kantsi lesitsintsa kufa sinesigci lesinensako lesikhombisa lusizi.

Sigci lesiheshisako nalesinensako sigcama etageni letinaletingcikitsi:

Lesishesisako	Lesinensako
• buchawe	bugwala
• kuhlakanipha	buwula
• kukhutsala	kuvilapha
• imphumelelo	kwehluleka
• inhlanhla	emashwa
• ematsembe	kudzikibala

4.2 SIGCI ETAGENI

Sigci ngumdvumo lovakala lapho kuphinyiswa saga. Saga siye siphimiseke kube shangatsi inkondlo noma ngumculo. Sigci satiwa kakhulu etibhimbini lapho kuhlatjelelwa kubuywe kugidvwe. Sigci sitsintsa kakhulu tiffo: tindlebe ngekuva, umtimba ngekunyakata (tandla, tinyawo, inhloko naletinye) nemehlo ngekubuka.

Sigci siletfwa kuhleleka kwemalunga emagameni ngaphandle kwekulandzela umcondvo locuketfwe saga. Tibonelo:

- Emalunga lalinganako emagameni lamabili.
Akakhulumi uyabasela.
Akattfukani uyanameka.
- Emalunga lalinganako emagameni lamatsatfu.
Indvuku ishaya umviki.

Umuntfu ubongwa afile.

- Kweciwa kwankhamisa wekugcina emagameni lamabili ekucala.
Inji ibambeli umnikati.
Emasongi akhali amabili.
- Kweciwa kwankhamisa wekugcina eligameni lekucala.
Ingwi idla ngemabala.
Insakavukeli umchilo wesidvwaba.
- Luchumanosicalo: kusebenta kweligama linye ekucaleni.
Inyoka ishaywa enhloko.
Inyoka kayilandzelwa seyisemgodzini wayo.
- Luchumanosigcino: kusebenta kweligama linye ekugcineni.
Emanyeva aphume nebovu.
Liphume nebovu.
- Imvumelwanosigcino: kusebenta kwelilunga noma emalunga lafanako ekugcineni.
Inhlava iyabekelwa.
Sihlahla kasinyelwa.
- Imvumelwanosicalo: kusebenta kwelilunga lelifanako ekucaleni.
Live lifa ngemphofana.
Lihlokohloko lidla lilodvwa.
- Budlelwano belibito nesento/Sichumanisi libito-sento.
Lihlola lihlola tintfo tonkhe.

- Umcondvophika
Batibona emaphiko ekundiza kantsi atindizi tonkhe.

Sigci kuhleleka kwemalunga nemagama lokufana nekugcizelela nekungagcizeleti, kwehla nekwenyuka kweliphimbo. Lokuphawulekako ngesigci etageni nguloku lokulandzelako:

- X Kuphindvwa kwemalunga nemagama.
- X Kusetjentiswa kweliphimbo ngekutsi lehle libuye lenyuke.
- X Kugcizelela nekungagcizeleli emalunga latsite.
- X Budze nebufishane bemigca.


4.3 LINANI LEMAGAMA

Linani lemagama libalulekile etageni ngobe likhombisa umdvumo noma sigci. Emagama lambalwa akhombisa kugcogceleka ndzawonye kwemcondvo. Loku kusikhombisa kutsi kukusho intfo ngemavi lambalwa. Kuyenteka saga sibe sidze kepha inchazelo ibe yimfishane noma saga sibe sifishane inchazelo ibe yindze.

- Taga letinemagama lambalwa netinchazelo letindze: Uvinjwe yimphumulo ñ usilima lesimangalisako ngobe akayiboni intfo leyingoti kuye. Nalokungenaludvonsi kuyasutela ñ Nesilima lesatiwako sikhuluma lesikutsandzako ngobe silingisela labanye lesibavile nalesibabonile bakwenta loko. Mayime umutsi wetinyanga ñ Umuntfu lophike kuma njengesilima angati kutsi umeleni.

- Taga letinemagama lamanyenti netinchazelo letimfishane: Ngibone lokwabonwa yinja ngenyeti – imihlolo! Unetiga ekhatsi niengamfagolweni – akanasimilo lesihle. Insakavukela kugeza kwemehlo – kwemalanga onkhe.
- Taga letinemagama lalingana newetinchazelo: Inkhomo ingatala umuntfu – ngeke yenteke leyontfo. Ucedzile ungesilo litfole – ukhulume liciniso lonkhe. Udwale litulu lelisetulu – udwale ngendlela lemangalisako.

Linani lemagama etageni lisiniketa umdvwebo lolandzelako:



- (a) Umvuka wendvulo ($a - b$).
- (b) Umlilo uvuka etaleni ($a - c$).
- (c) Imfene kayilulahli lukhobo lwayo ($a - d$).
- (d) Ingwenya idla luhlobo leyase yaludla ($a - e$).

Linani lemagama etageni ligcamisa loku lokulandzelako:

- Umdvumo losheshako
Umdvumo losheshako uvakala kahle etageni letakhiwe ngemagama lambalwa lanemdvumo lolandzelekako. Umdvumo wetayeleke kakhulu efinkondlweni, emiculweni, emidlalweni

nasetingcocweni letitsite.

- Ligcogcomcondvo

Taga tikhombisa kugcogceka kwemcondvo lokuvetwa kuhleleka kwemagama. Letinye taga tiveta umcondvo lophelele ngemagama lamabili nje kuphela, kantsi letinye tisebentisa emagama lamatsafu, lamane, lasihlanu, njalonjalo.

Kugcogceka kwemcondvo kuvela kahle lapho kuyalwa umuntfu kutsi abophatsa kahle labanye ngekutsi abanikete labakudzingako ngobe angeke kumente abesichaka kusita loyo lofuna kusitwa. Ligcogcomcondvo libonakala esageni lesitsi: Sisu semhambi asicedzi lutfo.

- Lubumbanomcondvo

Saga sakhiwe imicondvo lemibili lesekelene ngenhloso yekuletsa umcondvo munye lophelele.

Umcondvo uye ugczeeleleke ngekusetjentiswa kwemagama manye lantjintje ngekwetitfo tenkhulumo esageni. Tibonelo:

Saga: Timbambo ngumatsiya ngekutsiya bubendze.

Inchazelo: Umuntfu uyakufihla lokungekhatsi kuye ngako-ke angeke kubelula kwati tinhlupheko takhe.

Saga: Lapho kukhona sidvumbu kulapho kukhona emangce.

Inchazelo: Bantfu bayayijabulela inhlupheko yalomunye umuntfu.

Saga: Kubona kanye kubona kabili.

Inchazelo: Uma sewuke wavelelwa lishwa uye wesabe ucabange kutsi litawuphindze livele.

Umcondvo 1	Umcondvo 2
Timbambo ngumatsiya Lapho kukhona sidvumbu Kubona kanye Akukho nyoni lendizako	Ngekutsiya bubendze. Kulapho kukhona emangce. Kubona kabili. Ingahlali phasi.

Umcondvo 1: Umcondvosisekelo

}

Lubumbanomcondvo

Umcondvo 2: Umcondvosengeneto

Umcondvosisekelo	Umcondvosengeneto
Itsi ingalamba	Iphendvuke linkentjane
Sihlahla sifa	Netimphandze taso
Umntfwana longakhali	Ufela embelekweni
Livi lemphofana	Livunywa muva
Akukho langa lashona	Lingenatindzaba talo
Mati wendlela	Ngumhambi wayo
Indvuku lenhle	Igawulwa etiveni
Inyoni yinhle	Ngetinsiba tayo
Makhelwane wembesa	Sifumbu samakhelwane

4.3.1 Emagama lamabili

Saga: Imikhombe iyenanana.

Inchazelo: Umuntfu usita loyo lowake wamsita.

Saga: Ligugu liyadvonsiswana.

Inchazelo: Kuze labaganene bahlale kahle kumele basitane, bavelane, batfobelane.

Saga: Bungacitseka bugayiwe.

Inchazelo: Tintfo tingonakala sekunelitsembe lekutsi tiyalunga.

Saga: Ubogawula ubheka.

Inchazelo: Ubokwenta tintfo ngekucaphela.

Saga: Umdzaka uyaphangwa.

Inchazelo: Intfo lofuna kuyenta uboshesha uyente emafuba asekhona.

Saga: Sitawuyicela ivutsiwe.

Inchazelo: Sitawubona kutsi utawuphumelela yini.

Saga: Inyanga ayitelaphi.

Inchazelo: Umuntfu usitwa ngulabanye etinkingeni takhe.

4.3.2 Emagama lamatsafu

Saga: Emehlo lamabili ayabonisana.

Inchazelo: Cela seluleko kulomunye nawunenkinga.

Saga: Emakhuba alingene balimi.

Inchazelo: Tintfombi tilingene emajaha.

Saga: Emakhatsato abuyele emhlantsini.

Inchazelo: Ujabhile ngobe kwenteke abengakakulindzeli.

Saga: Emanti angacitseka acitsekile.

Inchazelo: Umuntfu lofile ungete waphindze umvuse.

Saga: Imbe umgodzi yangena.

Inchazelo: Lentfo yami ilahlekile ngobe kute lotsi uyibonile.

Saga: Imbiba idla yetayele.

Inchazelo: Lapho wase wasitakala khona uphindze ubuyele.

Saga: Imbita ivutfwa ngekukhwetelwa.

Inchazelo: Yonkhe intfo iphumelela ngekuvuselelwa.

Saga: Inala ihlola indlala.

Inchazelo: Phindza ungiphe ungentele inhlanhla.

4.3.3 Emagama lamane

Saga: Itsi ingahamba idle ludzaka.

Inchazelo: Ungalindzeli imphatfo lenhle lefana neyasekhaya ekuhambeni.

Saga: Itsi ingacotfuka sisila ihlekwe.

Inchazelo: Umuntfu lotigcabhako uyahlekwa lapho avelwe lishwa.

Saga: Umjuluko wenja uphelela eboyeni.

Inchazelo: Ucinele tindzaba talabanye esikhundleni sekulungisa takhe.

Saga: Wati talabanye takhe timhlalele.

Inchazelo: Ucinele tindzaba talabanye esikhundleni sekulungisa takhe.

Saga: Aligujiwa lidliza umuntfu angakafi.

Inchazelo: Ungasheshi ulahle litsemba.

Saga: Tinyosi tidla luju lwato.

Inchazelo: Udla umjuluko wakhe.

Saga: Imfene ayilulahli lukhobo lwayo.

Inchazelo: Umuntu lonesimilo lesibi akehlukani naso.

Saga: Hamba tuba bayokuhlutsa embili.

Inchazelo: Chubeka nalokwentako, kuyokucaka embili.

Saga: Liphisi lenyatsi lidliwa yinyatsi.

Inchazelo: Umuntu ufela emsebentini wakhe.

4.3.4 Emagama lasihlanu

Saga: Sitsa semuntu nguye lucobo lwakhe.

Inchazelo: Umuntu utilimata yena ngekwakhe.

Saga: Lofuna kuhlakanipha wakhe eceleni kwelicili.

Inchazelo: Lofuna kuphumelela ucaphela kwenta kwalabo labaphumelelako.

Saga: Ungakhulumi ngabhejane kungekho sihlahla edvute.

Inchazelo: Ungatifikazi engofini kungafanele.

Saga: Ingula lendzala ivama kunuka emasi.

Inchazelo: Kudlanga kwesifo lesake sagadla ekhaya.

Saga: Inyoni lenkhulu ingafa kubola emacandza.

Inchazelo: Kufa kwemninimuti kwenta tintfo tingabe tisalunga.

Saga: Sisu semhambi asingakanani, singangeso yenyoni.

Inchazelo: Sihambi seneliswa nguloko lesiphiwa kona, nome kukuncane kangakanani.

Kolulucwaningo kubukwe tibonelo letinemagama lamabili kuya kulasihlanu. Taga letinyenti tiffolakala kulelinani lemagama. Loko kufakazela kutsi saga simusho lomfishane locuketse umcondvo lojulile.

Taga letinemagama langetulu kulasihlanu timbalwa kakhulu njengaleti:

Saga: Kulele kunye kube kubili ngabe kuyavusana.

Inchazelo: Umuntfu losengotini loweswele lomelekelelako.

Saga: Batibona emaphiko ekundiza kantsi atindizi tonkhe.

Inchazelo: Kushiwo kumuntfu longakahlakaniphi kahle.

Saga siligcogco lemagama lakhetseke ngendlela leselizingeni lelisetulu ngenhloso yekugcamisa imicondvo letsite nekundlulisa umlayeto.

4.4 IMISHO

Saga simusho lophelele. Umusho uphelele ngekutsi ube nasobito, silandziso noma nesichasiso. Saga siniketa umcondvo lophelele imisho. Saga sendlulisa umlayeto ngendlela lekhombisa kujula kwelulwimi nelikhono lelisetulu.

Ase sibuke kusebenta kwesaga njengemusho etindzaweni letehlukene:

- Saga njengemusho lophelele
Imfuyo itsandza loyitsandzako.
- Saga ekucaleni kwemishombici
Imfuyo itsandza loyitsandzako sibili, loko kubonakale kuMabhengeda injinga yesigodzi.

- Saga ekugcineni kwemishombici
Tiphendvuke imilalandle ngenca yebunyenti loko kuveta ngalokugcamile kutsi imfuyo itsandza loyitsandzako.
- Saga ekhatsi kwemishombici
Kuyabonakala kutsi imfuyo itsandza loyitsandzako ngobe tinkhomo taNdlela tigcwele ematsafa.

Lesikucaphelako kutsi saga siyakwati kusebenta naleminye imisho sigcamise umcondvo munye. Saga singemagama lagcogceleke ndzawonye ngelikhono.

Tibonelo letingenhla tisikhombisa umdvwebo wemusho lomihlabamitsatfu lolandzelako:

(a)	1 – 3 Saga Njengemusho lophelele		
(b)	1 Saga ekucaleni	2	3
(c)	1	2	3 Saga ekugcineni
(d)	1	2 Saga emkhatsini	3

Lapha sibuke kusetjentiswa kwesaga ngekwetindzawo emishweni. Lokugcamako lapha kutsi saga sinemumo (form) lotsite. Saga sikhombisa likhono (art), ingcikitsi (theme), indzaba lesiyicocako (subject matter), kumiswa (style) nendlela lesisetjentiswa ngayo.

Uma sibuka kusukela ku (b) – (d) sibona kuchumana kwemisho nekwemicondvo lokugcamisa sichasiso noma sikhanyiso.

4.4.1 **Saga njengemusho wekucala**

Uma saga sisetjentiswe ekucaleni siniketa umcondvo lophelele ngoba singumusho lophelele. Umusho lolandzelako usuke sewuchaza kabanti ngaloko lokushiwo saga. Uma sibuka saga lesitsi, kwendza kutilahla lesisho kutsi intfombatane ayati kutsi iyophatseka njani emendvweni sitfolo umcondvo lophelele nenchazelo ngesimo sasemendvweni. Uma sesibuka saga lesisikhetsile ku- (a) sesitfolo sichasiso lesigcamile ngekuveta imphilo nebunikati.

Luhla lwetibonelo

- (a) Kwendza kutilahla sibili, loko ukubona ngemphilo yakaMotsa.
- (b) Inkunzi isematfoleni mnaketfu, khulisa kahle bantfwana.
- (c) Kuhlonishwana kabili jaha lembutfo ngoba imphilo iba yinhle ngekuphila nebantfu.
- (d) Sitsa semuntfu nguye lucobo lwakhe ngekungenti tintfo letifanele ngesikhatsi lesifanele.
- (e) Inyoni ikhala kusile ntsanga ngobe awukwati lokutawukwenteka kusasa.
- (f) Ingwe idla ngemabala mnaketfu, ngako-ke chubeka netento takho letinhle.
- (g) Kufa kusetiveni sibili ngobe umuntfu ulimalela noma kukuphi.
- (h) Ungabona emehlo esibungu uma Sipho angaphumelela etifundvweni takhe ngobe ulivila.
- (i) Sekubonwa ngekusa ngobe akasakwati kukhuluma, kudla nekuhamba.

- (j) Inkhukhu ijutiwe umlomo njengobe licembu lakhe lehlulekile.

4.4.2 Saga njengemusho wekugcina

Kusebenta kwesaga ekugcineni njengemusho wekugcina kuveta imicondvo leminyenti leyehelelene lephikisako, levumelanako, lechasisako nalekhanyisako. Tibonelo:

- **Imphikiswano / Kucatsanisa**

Kuphana: Lomavundvo phani bantfu kudla.

Kwemana: Kubophainja netinkhuni.

- **Kugcizelela**

Umcondvo wekucala: KaNdlovu akulalwa.

Umcondvo logcizelelako: Kotsiwa lukhuni lwedvungamuti.

Luhla lwetibonelo

- (a) Lomavundvo phani bantfu kudla uyekele kubophainja netinkhuni.
- (b) LaKhumalo wammela umntfwanakhe wakhohlwa kutsi libunjwa liseva.
- (c) KaNdlovu akulalwa kotsiwa lukhuni lwedvungamuti.
- (d) Kulisiko lemaSwati kutsi intfombi kayendlulwa.
- (e) Kadze atjelwa angalaleli Bhembe kutsi indvuku kayiwakhi umuti.
- (f) Loku lewungente kona mnaketfu ungabokhohlwa kutsi lunyawo alunamphumulo.
- (g) Kuko konkhe lokwentako ubokhumbula kutsi tandla tiyagezana.
- (h) KwabukanaleMelika nelaseRashiya kwabonakala kutsi kubhekene inyanga nelilanga.
- (i) Kuhamba kweyise emhlabeni kwenta kwabonakala kutsi inhlanti ishelwe ngemanti.

- (j) Waphelelwa ngumsebenti kadzeni ngiko nje kakhe likati lilala etiko.

4.4.3 Saga njengemusho losekhatsi

Uma saga sisetjentiswa njengemusho losekhatsi kugcama loku:

Umusho losingeniso: Waboniswa Sifiso.

Umusho loyinhlityondzaba: Sikhundla ngutentele.

Umusho losiphetfo: Akasebente ngekutimisela.

Imisho lemitsatfu iye yahlanganiswa kwakhiwa umusho munye lophelele. Kusetjentiswe tihlanganiso letifanele ngenhloso yekutfola umcondvo munye lobumbene.

Luhla lwefibonelo

- (a) Kwabonakala kutsi lukhuni lutala umlotsa ngesento saMkhatjwa nendvodzana yakhe.
- (b) Waboniswa Sifiso kutsi sikhundla ngutentele ngako-ke akasebente ngekutimisela.
- (c) Kumele sati emhlabeni kutsi akukho mfula longenatikhukhula, loko kuyincenye yemphilo.
- (d) Savele sambona kutsi kuhlupheka kumhleli embonjeni ngobe abengati kutsi utsatsani uyihlanganisa nani.
- (e) Kwati wonkhe umuntfu kutsi Mandla wenteni kepha-ke ngobe umlomo lishoba lekutiphungela, uloku uyaphika ubeka taba.
- (f) Ngamtjela weva kutsi uyowukhomba umuti lonetjwala uma angafuni kutsatsa teluleko.
- (g) Ngimbonile kutsi ukhetsa liphela emasini lapho apha bantfwana kudla.
- (h) Ngamtjela kutsi livila lidla buvila wangelaleli.

- (i) Itsite noma imbuti igudla liguma ngachubeka ngekungamniketi lifuba.

4.5 KUPHENDVULEKA KWEMIBUTO

Uma sikhuluma ngetaga sisuke siphendvula imibuto letsite ngendlela lefihlekile. Kuphendvuleka kwaleyo mibuto sikubona etibonelweni tetaga letilandzelako:

- Ngani?
Emanti aviwa ngani? Ngelubhoko.
Linyeva likhishwa ngani? Ngalelinye.
- Ini?
Ingwenya ilandzela ini? Ingati.
Inhlitiyo igaya ini? Tiboti.
- Nini?
Ngibone lokwabonwa yinja nini? Ngenyeni.
Ngumvuka wanini? Wasendvulo.
- Kuphi?
Wakhahlelwa yindlovu kuphi? Esifubeni.
Kuhlupheka kumhleti kuphi? Embonjeni.
- Njengani?
Unonele ngekhatsi njengani? Njengendlati.
Uluma aphotisa njengani? Njengeligundvwane.
- Yentani?
Indlu lengenangcongwane ivame kwentani? Kunetsa.
Indlu yeligagu yentani? Iyanetsa.

Akusiyo imibuto lengenhla kuphela lephendvulekako, minyenti kakhulu. Sente tibonelo letimbalwa kukhombisa indzima lendze yetaga ekuphendvuleni imibuto.

4.6 TITFO TENKHULUMO

Saga singumusho loyinhlanganisela yetitfo tenkhulumo. Esikhatsini lesinyenti kucala libito lelibonakala ekucaleni kwesaga.

Sibonelo:

Saga: Likhombo labhatata kuphakelwa ngesandla.

Inchazelo: Yinhlanhla yami lembi.

Kuyenteka kutsi libito livetwe sivumelwano njengalapha:

Saga: Sikudle sadzine sakubeka lutsi. (Kudla).

Inchazelo: Sikudle kwasala.

Kuyenteka libito libe sekhatshi esageni:

Saga: Ukhokhele lizini lenkwazu.

Inchazelo: Utawuhlupheka udzine utenyanye ngalomuntfu lomcalile.

Kulesinye sikhatsi libito liba sekugcineni kwesaga njengalapha:

Saga: Ugule wacofuka inhloko.

Inchazelo: Ugule sikhatsi lesidze kakhulu.

Kuyenteka emabito alandzelane esageni njengalapha:

Saga: Umkhanukangekho umhluti wesambane.

Inchazelo: Intfo ledzinanako naseyikhona kantsi bewuyifuna isasekhashane.

Uma emabito ehlukaniwe ngulesinye sitfo senkhulumo kuba kanje:

Saga: Umhamo wadla kudla kushisa.

Budlelwano belibito nebuniyo bugcama kahle kuletibonelo:

Licili lifela ebucilini (Libito – buniyo).

Lichawe lifela ebuchaweni (Libito – buniyo).

Inchazelo: kulula kukhuluma nalokungesilo liciniso.

Tibonelo tetitfo tenkhulumo etageni.

1	Libito	Silandziso	Sandziso sendzawo
	Lingcina Sitfuni Tindlebe	liphume kungena time	embiteni emeneni enhloko
2	Libito	Silandziso	Sandziso sendzawo
	Intsendzele Umbala Likhuba	iwe ucaca lishisa	enkhundleni enkhonyaneni emhlane
3	Libito	Silandziso	Libito
	Imbilapho Lukhuni Ingwe Inala	ivuna lutala idla ihlola	silondza umlotsa umnikati indlala
4	Libito	Silandziso	Libito
	Inyoni Inkhukhu Umpheki Inkhwali	ihlutfuke isikwe udla ibaniwe	sisila umlomo infutfu sidvwa

5	Libito	Silandziso	Silandziso
	Liso Emabutfo Indlondlo Imbita	liphandlwa akhohlisana yaluka lengaphushi	libukile ahlomile selibalele ayivutftwa
6	Sibanjalo	Sihlanganiso	Libito
	Yinkhukhu Yinja Likafi	na na na	imphaka likati ligundvwane
7	Sento	Sandziso sendzawo	Linani
	Awumbiwa Ayigawulwa Atikhali	godzini hlatsini mfuleni	linye linye munye

4.6.1 Sibanjalo

Sibanjalo sitfo senkhulumo lesikhanyisako. Sisikhanyisela kabanti ngasobito. Etibonelweni letingentasi tendvulelwe ngemabito.

Saga: Umuti ngumuti ngekuphanjukelwa.

Inchazelo: Phatsa kahle bantfu emtini wakho kuze bavakashe nakusasa.

Saga: Umkhwenyana sigodvo sekucebula.

Inchazelo: Bekhabonkhosikati batikhalela kumkhwenyana uma bahluphekile.

Saga: Umlomo sihlangu sekutivikela.

Inchazelo: Umuntfu utilungisela ngemlomo lapho asenkingeni.

Kuhloliswe tindlela lekwakheke ngato taga kusetjentiswa titfo tenkhulumo. Yinkhulu indzima ledlalwe titfo tenkhulumo ekwakhiweni kwetaga, ikakhulu sobito, sichasiso, silandziso nesikhanyiso.

4.6.2 Emabitombaca

Letinye taga tisebentise emabitombaca kuveta umcondvo letiwucuketse.
Lamabitombaca abonakala ekucaleni kwetaga njengalapha:

Salakutjelwa sibona ngemopho.
Emaphikankhani afela enkhanini.
Lisukamuva likholwa tagila.
Matfunywavume njengemphaka yemtsakatsi.
Umkhanukangekho umhluti wesabane.
Mafikamuva udla umlente.

Emabitombaca kuyenteka abonakale ekugcineni kwetaga noma loko kungakavami. Tibonelo:

Lifa Jakamdliwayini.
Umendvo ngumkhumulansika.
Bahlangene ngetulu njengelihlindzafuku.

Emabitombaca akhombisa kugcogceleka ndzawonye kwemicondvo lemibili noma leminyenti bese ivetwa kanyekanye seyikhombisa kubumbana. Emabitombaca atayelege kakhulu etimeni tenkhulumo letifana netisho letilandzelako:

Umnukelambiba – sishibo lesimnandza kantsi sincane.
Umntfwanemfabele – umntfwana wemuntfu loliphuya.
Umshonisalanga – umsebenti lowephuta kuphela.

4.7 TAGA LETISAKUPHIKA

Taga tiyindlela lenhle yekubeka inkhulumo lejulile. Umuntfu loyintsengu uyakwazi kubeka inkhulumo yakhe ngendlela lenebuciko ngekutsi akhetse taga letifanele aphindze atisebentise kahle. Umcondvo wetaga ujulile, awufani newetisho:

Sibonelo:

Saga: Akelaphi ugwabula ematje.

Lomunye umuntfu angacabanga kutsi lesaga sichaza umuntfu lowelapha ashiye emanceba nobe ashiye konakele. Lomunye angatsi sichaza umuntfu lolapha kucubuke tinkinga kumbe lokhipha imikhobo, timfene, botikoloshi njll. Phela uma ugwabula ematje kungahle kuvele tinyoka, bofecela naletinye tilwanyana letiyingoti. Lomunye angatsi cha, lesaga lesi sichaza umuntfu loloyako. Inchazelo lekungiyi nguletsi: Akehlulwa sifo.

Saga lesisakuphika siyibeka inkhulumo kube sengatsi siyaphika, kantsi siyagcizelela. Takhi letetayelekile letikhombisa kuphika nguleti: aka-, aku- noma ligama akukho.

Luhla lwetaga letisakuphika

Saga: Akukho mfula ungenatikhukhula.

Inchazelo: Kufanele umuntfu alindzele lokuhle nalokubi emphilweni yakhe.

Saga: Akusikhumba sehlela beshuki.

Inchazelo: Ayikho intfo leyehlula bonkhe bantfu.

Saga : Akunyoka yakhwela emtsini.

Inchazelo: Tilungiselele kucala embikwekuba wente intfo.

Saga : Akukhuba leswele umlimi.

Inchazelo: Ayikho intfombi lengashelwa.

Saga : Akukho mshado weswela tibukeli.

Inchazelo: Umcimbi awubesweli bantfu.

Saga : Akukho langa lashona lingenatindzaba talo.

Inchazelo: Lelo nalelo langa linetalo letinhle naletimbi.

Saga : Akunyoka yakhoahlwa ngumgodzi wayo.

Inchazelo: Akekho umuntfu lose akhoahlwe likhaya lakhe.

Saga : Akukho matolo laphika nelilanga.

Inchazelo: Emandla akalingani.

Saga : Akundlela ingayi ekhaya.

Inchazelo: Tonkhe tintfo umuntfu latentako tinemiphumela yato.

Saga : Akukho nyoni lendiza ingahlali phansi.

Inchazelo: Konkhe kunesiphetfo sako.

Saga : Akunyatsi yehlulwa liffole.

Inchazelo: Akekho umtali lowehlulwa ngumntfwanakhe.

Saga : Akatalanga wabola ematfumbu.

Inchazelo: Umntfwana wakhe ute lusito kuye.

Saga: Akatsakatsi ubuya nakusako.

Inchazelo: Utsakatsa kakhulu kwengca labanye.

Saga: Akuyiwa kanyekanye kungesiko esitibeni.

Inchazelo: Bantfu abaphumeleli bonkhe ngesikhatsi sinye.

Saga: Akukho geza lingenasiyela.

Inchazelo: Kute umuntfu longasoleki ndzawo.

Umcondvo lophelele uvakala kahle uma sekubukwe saga lesiphelele. Emagama lehlukene akaniketi umcondvo lovakalako nalolandzelekako ngakoke saga kumele sibukwe sonkhe njengemusho munye lobumbene ngekwakheka nangekwemcondvo.

4.8 BUNYE NEBUNYENTI ETAGENI

Saga singumusho lophelele, longagucuki. Uma saga sisetjentiswa emshweni asiguculwa. Sisetjentiswa njengaloku sinjalo. Saga lesisebunyeni sihlala sisebunyeni, asiyiswa ebuningini uma sisetjentiswa. Nalesisebuningini asiyi ebunyeni.

Tibonelo tetaga letisebunyeni:

Saga: Indvuku ishaya umviki.

Inchazelo: Umuntfu uye alinyatwe yintfo latsi uyayati futsi ayimehluli.

Saga: Udlala ngelikhuba kutiliwe.

Inchazelo: Udlala ngentfo leyingoti.

Saga : Umhlaba sewuhleti ngeludzengelo.

Inchazelo: Sewuphelile emtimbeni angafa nome kunini.

Saga : Ushayainja yami.

Inchazelo: Wenta shangatsi utsetsisa bantfwana kantsi utsetsisa mine.

Saga : Wadla insimi ingakabaselwa.

Inchazelo: Wenta shangatsi utsetsisa bantfwana kantsi utsetsisa mine.

Saga : Wadla libaba lifile.

Inchazelo: Unemahhunga.

Saga : Wadla sibindzi sengwenya.

Inchazelo: Unesibindzi lesibi nemuntfu angambulala.

Tibonelo tetaga letisebunyentini

Saga : Ematsanga ahlantela labangenatimbata.

Inchazelo: Lokuhle nalokuyimphumelelo kutfolwe ngebantfu labangakudzingi.

Saga : Tinhlanga temuka nemoya.

Inchazelo: Kwenta taba letingenamphumelelo.

Saga : Imikhombe iyananana.

Inchazelo: Umuntfu usita loyo lomsitako.

Saga : Emacili kawakhelani.

Inchazelo: Bantfu labanebutulujane abasondzalani futsi abetsembani.

Saga: Tinyosi tidla lujw lwato.

Inchazelo: Umuntfu udla umvuzo wetifukutfuku takhe.

Saga asifani nesisho ngobe sihlala sinjalo singagucuki. Tibonelo letingenhla tisebentise bunye nebunyenti etageni lekumele bungagucuki: indvuku > tindvuku, likhuba > emakhuba, ludzengelo > tindzengelo,inja > tinja, insimi > tinsimi, ingwenya > tingwenya, umkhombe > imikhombe, licili > emacili, inyosi > tinyosi, luhlanga > tinhlanga, litsanga > ematsanga. Lokwentakalako etageni kutsi tisacanjwa nentfufuko yelive, kepha-ke atiguculwa leto lesetivele tikhona.

Tigaba temabito

Emagama ekucala etageni letinyenti ayahleleka njengetigaba temabito. Loko kubonakala kahle kuletibonelo letilandzelako:

Sigaba	Sicalo	Sibonelo
1	umu-	<u>U</u> mntfu ngumntfu ngebantfu.
2	ba-	-
3	umu-/um-	<u>U</u> mtimba uviwa ngumnikati.
4	imi-	-
5	li-	<u>L</u> iso liwela umfula ugcwele.
6	ema-	<u>E</u> mani aviwa ngelubhoko.
7	si-	<u>S</u> isu lesihle ngulesibonwa lilanga.
8	ti-	<u>T</u> ibi telikhaya atilahlwa khashane.
9	in-	<u>I</u> ndvuku lelukhuni imila esiweni.
10	tim-	<u>T</u> imfene tihlekana tiphongo.
11	lu-	<u>L</u> ukhuni lutala umlotsa.
14	bu-	<u>B</u> ubi bemuntfu tento takhe.
15	ku-	<u>K</u> udliwa kushiyelwana.

Lokugcamako kutsi taga letinyenti fibonakala ngaloku lokulandzelako:

- libito, inhloko noma sivumelwano senhloko.

- kukhona letiveta bunye ngekwesicalo sato naletiveta bunyenti.
- tiyahleleka ngekwetigaba temabito letinyenti.

4.9 IMICONDVO LECUKETWE TAGA

Imicondvo lecuketwe taga ibalulekile ekutfoleni tinchazelo. Kuyenteka kutsi saga sinye sikhombise imicondvo lemibili lekhombisa kuvuma nekuphikisa. Lapha kuvela umcondvovuma (positive idea) nemcondvophika (negative idea). Kucala ngekutsi kube ngemagama laphikisanako, bese kulandzela umcondvo lekungaba ngulovumako.

Saga sehlukene tincenye letimbili: Yekucala legcamisa umcondvo lotsite neyesibili lecuketse umcondvo lekungaba wekuvuma noma wekuphikisa.

Sibonelo 1

Incenye Yesaga		Umcondvo
1	Tentile akakhalelwa	Wekuphikisa
2	Kukhalelwa Tumekile	Wekuvuma

Saga lesiphelele:

Tentile akakhalelwa kakhalelwa Tumekile.

Sibonelo 2

Incenye Yesaga		Umcondvo
1	Macala ngebubi	Wekuphikisa
2	Ugcina ngebuhle	Wekuvuma

Saga lesiphelele:

Macala ngebubi ugcina ngebuhle.

Sibonelo 3

	Incenye Yesaga	Umcondvo
1	Ngwane kawulali	Wekuphikisa
2	Kulala emehlo	Wekuvuma

Saga lesiphelele:

Ngwane kawulali kulala emehlo.

Luhla lwetaga nemicondvo leyehlukene

Umlomo <u>longadli</u>	umcondvo wekuphikisa
Ubekela lodlako	umcondvo wekuvuma

Ikhotso <u>leyikhotsako</u>	umcondvo wekuvuma
lenqayikhotso iyayikhahlela	umcondvo wekuphikisa

Kwenta kuya <u>emuva</u>	umcondvo wekuphikisa
Kuye embili	umcondvo wekuvuma

Kuhlwile <u>embili</u>	umcondvo wekuphikisa
Kusile emuva	umcondvo wekuvuma

<u>Kwembulwa</u> ingubo	umcondvo wekuphikisa
Kuvalwe ingubo	umcondvo wekuvuma

Uyishaya <u>emuva</u>	umcondvo wekuphikisa
Ayishaye embili	umcondvo wekuvuma

<u>Inala</u> kayihambi	umcondvo wekuphikisa
Kuhamba indlala	umcondvo wekuvuma

<u>Kuwa</u> kwendlu	umcondvo wekuphikisa
Kunqokuvuka kwalenye	umcondvo wekuvuma

<u>Kwephana</u> ludvumo	umcondvo wekuphikisa
<u>Kwemana</u> ludvumo	umcondvo wekuvuma

Lifa <u>letiwula</u>	umcondvo wekuphikisa
Lidliwa <u>fihlakaniphi</u>	umcondvo wekuvuma

Mentiwa <u>akakhohlwa</u>	umcondvo wekuphikisa
<u>Kukhohlwa</u> ument	umcondvo wekuvuma

Inala iya <u>emuva</u>	umcondvo wekuphikisa
Iye <u>embili</u>	umcondvo wekuvuma

Lokuphawulekako kuloluhlobo lwetaga nguloku lokulandzelako:

- Takhiwe ngemagama lamanyenti.
- Tinemicondvo lemibili: kuvuma nekuphikisa.
- Tiyagcizelela.
- Tisebentisa emagama laphikisanako.

Tibonelo:

embili > emuva

buhle > bubi

4.10 TINONGO TENKHULUMO

Tinongo tenkhulumo tilikhono lekusebentisa lulwimi ngendlela leselizingeni lelisetulu ngekukhetha emagama lafanele nekuwahlala kahle. Likhono lelidzala lelacatwa bokhokho kusukela kadzeni. Nalamuhla lisasebenta, kantsi nakusasa litawube lisebenta.

Lapha sitawubuka kuhleleka kwetaga ngekwetinongo tenkhulumo. Manyenti emagama lasetjentiswa bacwaningi lacondzene netinongo tenkhulumo

Ianjengalawa:

- Tifombemagama.
- Imifanekisomicondvo etageni.
- Lulwimi etageni.
- Likhono lekucanjwa kwetaga.

Tonkhe tihlokwana letibalwe ngenhla tiyagabancana ticine tikhiphe umcondvo munye ngekwakheka kwetaga.

Taga tisetjentiswa yonkhe indzawo. Ebandla inkhulumo ibamnandzi ngetaga. Emakhaya inkhulumo ivakala kahle ngetaga. Taga tiyincenye yetinongo tenkhulumo leyenta lulwimi lubemnandzi, luhehe futsi lunongeke. Lulwimi lwebele lumnandzi kakhulu ngetinongo tenkhulumo.

4.10.1 **Sifaniso**

Sifaniso sinongo senkhulumo lesicatsanisa tintfo letimbili letinekufanana lokutsi. Kwekucala kufaniswa nekwesibili ngekutsi kusetjentiswe takhi letilandzelako: njenga-, kuhle kwa-, sa-, nganga-, fana.

Lokucatsaniswa simo netento ngaphasi kwesifaniso. Ngaso sonkhe sikhatsi sitfola imicondvo lemibili leyehlukene kepha lefaniswa.

Tento lokufaniswa	Lokufaniswa nako
Kukhwela etikwendlu	umtsakatsi
Kuhambela eceleni	lilanga
Kudla asulela phasi	inkhukhu
Kutfunywa avume	imphaka
Kukhwela etikwendlu	inja
Kutibeka embili	umncadvo
Komela elutsini	intsetse
Kwandza ngetulu	libhakede
Kulahla	inyongo yenyatsi
Kuluma apholisa	ligundwane
Kunonela ngekhatshi	indlati

Tibonelo tetifaniso

Saga: Wandze ngetulu njengelibhakede.

Inchazelo: Ungumuntfu lokhulumela futshi.

Saga: Utibeka embili njengemncadvo.

Inchazelo: Ungumuntfu lotigcabhako.

Saga: Ukhwela etikwendlu njengemtsakatsi.

Inchazelo: Uyedzelela. Tendo takhe tikhombisa kweswela inhlonipho.

Saga: Uhambela eceleni njengelilanga.

Inchazelo: Uyashalatela.

Saga: Udla asulela phasi njengenkhukhu.

Inchazelo: Kwenta kwakhe akunamaciniso.

Saga: Matfunywa avume njengemphaka yemtsakatsi.

Inchazelo: Umuntfu lotfunywa konkhe – lokuhle nalokubi avume.

Saga: Ukhwela etikwendlu njengenja.

Inchazelo: Ungumuntu lowedzelelako.

Saga: Uyawukomela elutsini njengentsetse.

Inchazelo: Sebentisa lokutfolako ngekunakekela ngobe indlala itawufika.

Saga: Wamlahlisa kwenyongo yenyatsi.

Inchazelo: Kushiya umuntu ebaleni angabinayo indlela yekutisita.

4.10.2

Sifanisongco

Sifanisongco sinongo senkhulumo lesifanisa ngekutsi kusetjentiswe ligama lelinye kubita intfo lefaniswako. Tifanisongco tigcama kahle etibonelweni letingentasi ngekutsi intfo ibitwe ngaleny.

Libito	Sifanisongco
umlomo	lishoba
licala	ngumphikwa
kufa	butfongo

Sifanisongco sisebenta njengesitfo senkhulumo sibanjalo ngekutsi kwehliswe liphimbo elilungeni lekucala noma kuphongotwe siphongoto lesifanele.

Tibonelo tetifanisongco

Saga: Umlomo lishoba lekutiphungela.

Inchazelo: Umuntu utivikela ngemlomo lapho asenkingeni.

Saga: Licala ngumphikwa.

Inchazelo: Noma umuntfu onile ucala ngekuphika ngobe atsi uyatisindzisa.

Saga: Ngumcaba lowasala emasini.

Inchazelo: Amange abe nenhlanhla yekuffola umendvo.

Saga: Kufa butfongo.

Inchazelo: Umuntfu ulala aphila kuse afile.

4.10.3 Simuntfutiso

Lesi sinongo senkhulumo lapho intfo lengaphili iniketwa timphawu temuntfu lophilako. Tento letentiwa bantfu tiniketwe tintfo letitsite.

Uma sibuka tibonelo letingentasi kugcama loku:

Tento tebantfu	Timphawu tebuntfu tiniketwe
Kwembula ingubo	licala
Kungayipheki ingcamu	kufa
Kulayetela	imbila
Kuwela umfula	liso
Kutala	lukhuni
Kulala	indzaba

Tibonelo tesimuntfutiso / Kumuntfutisa

Saga: Licala lembula ingubo lingene.

Inchazelo: Licala uyaletfwala ungaketeleli.

Saga: Kufa akuyipheki ingcamu.

Inchazelo: Kufa kuyatumana.

Saga: Imbila yeswela umsila ngekulayetela.

Inchazelo: Ubotentela tintfo ungetsembeli kulabanye.

Saga: Liso liwela umfula ugcwele.

Inchazelo: Tifiso tenhlitiyo tifyinelela lapho umntfu angenamandla ekufinyelela khona.

Saga: Likhuni lutala umlotsa.

Inchazelo: Kusho kutala umntfwana longafani nemtali ngekwetento.

Saga: Indzaba ilala endleleni.

Inchazelo: Inkhulumo lebeyikhulunywa lengakapheli.

4.10.4 **Sicatsaniso**

Sicatsaniso sinongo senkhulumo lesiveta kucatsanisa, kufanisa nekulinganisa. Kucatsasisa kuniketa imicondvo lemibili esageni sinye.

- **Imicondvo lemibili**

Imicondvo lemibili lovumako nalophikako ivela esageni sinye ingagcanyiswa ngemagama lephikisanako. Tibonelo titfolakala ku 4.8.

- **Kuntjintja kweliphimbo**

Taga leticatsanisako tibonakala ngekuntjintja kweliphimbo. Incenye yekucala iveta lelinye liphimbo lelehlukile kuleyo yesibili. Sibonelo:

Liphimbo I – Wadla lilunga lakulungela

Liphimbo II – mine ngadla jekwa wangijekulela.

Kulungelwa tintfo kuhambisana nentfokoto neliphimbo
leliphakeme, kantsi kungalungelwa kuvakala ngelivi leliphasi
nekujabha.

Luhla lwetaga leticatsanisako

Saga: Umlomo longadli ubekela lodlako.

Inchazelo: Intfo lewungayisebentisi yilondvolotele
labayidzingako labatayisebentisa.

Saga: Tentile akakhalelwa kukhalelwa Tumekile.

Inchazelo: Umuntfu lotifake yena enhluphekweni abona
akavelwa buhlungu.

Saga: Uyishaya emuva ayishaye embili.

Inchazelo: Ungumuntfu longetsembeki, lokhuluma tintfo
letehlukene naletiphikisanako njalo.

Saga: Kuwa kwendlu kungukuvuka kwalenye.

Inchazelo: Bayajabula lapho kusuke kuyokwendzela khona
intfombi, bajabhe lapho isuka khona.

Saga: Indzaba inendvodzana uyise akanacala.

Inchazelo: Kuyenteka kutsi bantfwana bangabafuti batali
babu ngetento.

Saga: Inala kayihambi kuhamba indlala.

Inchazelo: Lokuhle akuhiali kuhlala lokubi.

Saga: Kusindza takaLuvadlwana kufe takaSibinjana.

Inchazelo: Bugwala buyamsindzisa umuntfu, kantsi buchwaga buyambulalisa.

Saga: Kwenta kuya emuva kuye embili.

Inchazelo: Emphilweni umuntfu uhlangabetana netimo letibuhlungu naletimnandzi.

Saga: Inala iya emuva iye embili.

Inchazelo: Emphilweni kunetimo letahlukene letimbi naletinhle.

Saga: Umlomo udla lokushisako, udle lokubandzako.

Inchazelo: Emphilweni kwenteka tintfo letehlukene letinhle naletimbi, letikhutsatako nelatijabhisako.

Saga: Kuhlwile embili, kusile emuva.

Inchazelo: Uhlangene nesimo lesimatima lesimenta akhumbule emuva.

4.10.5 **Sifutangwaca**

Lesi sinongo senkhulumo lesikhombisa kusebenta kwabongwaca labafananako esageni ngenhloso yekuveta umcondvo lotsite.

Tibonelo tetifutangwaca

Saga: Kubona kanye kubona kabili.

Inchazelo: Umuntfu lovelele lishwa bese uyesaba.

Saga: Inkhomo lenemlomo kayinamasi.

Inchazelo: Umuntfu lokhulumela futsi uye angakwati
kwenta tintfo.

Saga: Kwasha kwacima kwasala ticintsi.

Inchazelo: Kwaba nje kwabuye kwaba nje.

Saga: Liso licoshwa libhekile.

Inchazelo: Siphosiso wetfuka sesentekile.

4.10.6 **Sifutankhamisa**

Lapha kusetjentiswe bonkhamisa labafananako esageni sinye
ngenhloso yekuveta umsindvo lotsite.

Saga: Titiba tiyawugcwala inhlabatsi.

Inchazelo: Lokuhle kuyawuphela nya.

Saga: Muntfu uyabuya muntfu uyabuya nhho!

Inchazelo: Walindzelwa sikhatsi lesidze wangabuyi.

4.10.7 **Secamagama**

Secamagama sinongo senkhulumo lesikhombisa kwakheka
kwesaga. Sivumelwano senhloko noma sesichasiso sisitjela kabanti
ngenhloko njengakulesibonelo:

Lisinamuva liyabukwa, (Libutfo).

Luhla lweitecamagama

Saga: Ikhotsa leyikhotsako lengayikhotsi iyayikhahlela.
(Inkhomo)

Inchazelo: Umuntfu usita loyo lomsitako.

Saga: Libunjwa liseva. (Libumba)

Inchazelo: Intfo kumele yentiwe sikhatsi sisekhona futsi sisavuma.

Saga: Lesuka muva ikholwa tagila. (Inyoni)

Inchazelo: Kwenta tintfo kamuva kunciphisa ematfuba emphumelelo.

Saga: Kubamba letingelako. (Inja)

Inchazelo: Imphumelelo ayiti kumuntfu, kepha kumele yena aphume ayoyifuna.

Saga: Usenga letimitsi. (Tinkhomo)

Inchazelo: Ngumuntfu lonemanga.

Saga: Itsi ingadla litsambo yetayele. (Inja)

Inchazelo: Umuntfu akadzeli lapho atfola lusito khona.

4.11 IMIFANEKISOMICONDVO

Yenabile indzima yemifanekisomicondvo ekucanjweni kwetaga. Ngiyo leyenta kutsi taga teyame ebunkondlweni esikhatsini lesinyenti. Imifanekisomicondvo

isho kukhetseka kwemagama ngendlela letsite ngenhloso yekushaya emhlolweni, kugcamisa imicondvo nekugcizelela.

Imifanekisomicondvo lesitawuyibuka lapha nguleyo lephatselene nemiva: kubona, kuva, kuhogela, kutsintsa nekunambitsa.

4.11.1 **Imifanekisomicondvo lebonakalako**

Lapha sikhuluma ngemiva yekubona. Tifoluvulo emehlo titsintseka kakhulu uma sibuka lemfanekisomicondvo. Tibonelo:

Saga: Libuke uligcine.

Inchazelo: Kusonga kwemuntfu locondze kukhipha umphefumulo.

Saga: Emehlo akaphatselani ngemabheka ashiye.

Inchazelo: Tibonele ngekwakho ungetsembeli kulabanye.

4.11.2 **Imifanekisomicondvo levakalako**

Lapha kutsintseka tifoluvulo tindlebe. Lokuvakalako kungaba ngumsindvo wenkhulumo, wemculo, wemaphimbo nalokunye. Tibonelo:

Saga: Yimbulu lekhala ngemaphimbo lamabili.

Inchazelo: Liphimbo liguculwa ngenhloso yekukhohlisa.

Saga: Kutalele lihloko.

Inchazelo: Kuvimbanise umsindvo lomkhulu.

4.11.3 Imifanekisomicondvo lehogelekako

Lapha kutsintseka imiva yekuhogela. Titfo letitsintsekako timphumulo. Lokuhogelekako liphunga. Tibonelo:

Saga: Umpheki udla intfutfu.

Inchazelo: Lophekile uye agcine angakadli ngobe kuye kumhlale enhlityweni.

Saga: Kwakho ngulokudlile.

Inchazelo: Longakakudli awubi nesiciniseko sekutsi ngekwakho ngobe kungahle kubekhona lokukutsatsako kuwe.

4.11.5 Imifanekisomicondvo letsintsekako

Lapha kukhulunywa ngemiva yekutsintsa. Tinyenti titfo letingasetjentiswa ngenhloso yekukhombisa kutsintsa. Tibonelo:

Saga: Kusukisana nemuntfu imphunga.

Inchazelo: Kulwa nemuntfu.

Saga: Utfukuse indvuku emcubeni.

Inchazelo: Ufihle lisu latawugadla ngalo.

4.11.6 Siphetfo ngemifanekisomicondvo

Imifanekisomicondvo igcanyiswa kusetjentiswa kwemagana ngekutsintsa imiva. Ngiyo leletsu kujula kwetaga.

Tiffo	Imiva	Lokugcamile
Emehlo	yekubona	lokuphilako/lokungaphili
Tindlebe	yekuva	umsindvo
Lulimi	yekunambitsa	lokumnandzi/lokubi/lokubabako
Timpumulo	yekuhogela	liphunga
Tandla	yekutsintsa	kwenta/tento

4.12 TAGA NETISHO

Ncongwane naNcongwane, (1994:17-19) baniketa umehluko emkhatsini wetaga netisho kanje:

Taga	Tisho
(a) Taga atigucuki ngenca yebunyenti nome bunye bemabito lasondzelene nato futsi atiguculwa sikhatsi nabondzaweni. Taga tihlala tinjalo nje fitimele ngekwato.	Tisho tiyagucugucuka ngenca yebunyenti nome bunye bemabito lasondzelene nato futsi nangenca yetikhatsi nabondzaweni.
<i>Sibonelo:</i> Bunyenti: Kuncono nibuyeke. Imbita ivutfwa ngekukhwetelwa. Bunye: Kuncono ubuyeke. Imbita ivutfwa ngekukhwetelwa. Sikhatsi lesendlulile: Ngabe kwabancono kube nabuyela. Imbita ivutfwa ngekukhwetelwa.	<i>Sibonelo:</i> Bunyenti: Babalandvulisa ligwayi. Bunye: Bamlandvulisa ligwayi. Sikhatsi lesendlulile: Bebamlandvulisa ligwayi. Tisho ngenca yekutsi afinamavi enhlakanipho nelwati atiphumeleli
(b) Taga tiletsa sifundvo nome kuyala lokufanele kwemukelwe.	kufundzisa nekuyala.

Sibonelo:

(c) Letinye taga tibuselwa emasikweni
landluliswa ngetingane kwane
nasemilandweni webantfu
netehlakalo. Kungako nje tihlala
tiliciniso.

Sibonelo:

Atibuselwa emasikweni kodvwa
figcile etentweni kakhulu.

(d) Taga ativami kufihla emabito
aloko letiphatselene nako.

Tisho tona tiyavamisa kufihla
emabito aloko letiphatselene
nako.

Sibonelo:

Linceba lendvodza alihlekwa.
Inhlanti ishelwe ngemanti.

Sibonelo:

Lingihleti emphinjeni. (Linoni)
Tadliwa yimphi. (Tinkhomo)

4.12.1 **Taga**

Taga tingasuselwa ngekwakheka kwato etingane kwaneni, emphilweni yebantfu nasemilandweni wabo, emfuyweni, etilwaneni tonkhe nakulokuhlanyelwako nakulokutimilelako kwemvelo nakuyo yonkhe imikhuba yalokukhona lokubonakalako nalokungabonakali.

(a) *Libito nesibanjalo*

Etageni libito liye lilandzele sibanjalo.

Sibonelo:

Kufa butfongo.

Kufa lisela

Licala ngumphikwa.

(b) *Kuphikisana*

Lapha ekuphikisaneni kukhona kuphika kwesibanjalo
nekuphikisana kwemagama nome kwemicondvo kanye
nekuphika lokuyindlela lesaga lesibekwe ngayo.

(i) *Kuphika kwesibanjalo*

Lapha uthola kutsi sibanjalo siyaphika bese silandzela
letinye tifo tenkhulumo nome luhlelo.

Sibonelo:

Akunkhani licoco libange emsamo.

Akundlela ingayi ekhaya.

(ii) *Kuphikisana kwemagama nome umcondvo*

Lapha kusetjetiswa emagama lanemcondvo
lophikisanako kuze kubumbeke umcondvo munye.

Sibonelo:

Kusenhla nentasi

Litsatsa losemsamo limphose emnyango;

lanemcondvo lophikisanako kuze kubumbeke
umcondvo munye.

Loyishayile akakayosi, naloyosile akakayidli,
naloyidlile udle licala.

(iii) *Indlela lephikako*

Letinye taga tibekwe ngendlela lephikako.

Sibonelo:

Alikho licili lelatikhotsa emhlane.

Umhlaba awunoni.

Budze abuphangwa.

(iv) *Indlela lephindzaphindzako*

Taga tiyabekwa nangendlela lephindzaphindza
emagama bongwaca nabonkhamisa nemcondvo
lotsite.

Sibonelo:

Kubona kanye kubona kabili.
Sengibatse mantulu uyavutfwa uyavutfwa.
Linyeva likhishwa ngelinyeva.
Mentiwa akakhohlwa, kukhohlwa umenthi.

- (v) *Indlela lephocelelako*
Tikhona taga letisebentisa indlela lephocelelako.

Sibonelo:

Hamba tuba bayokuhlutsa embili.
Lala lulata sikwengule.

4.13 SIPHETFO

Lokuphawulekako kutsi linani lemalunga libalulekile ekuletseni umdvumo nemcondvo lophelele waloko lokushiwo saga. Linani lemagama liphumelele kugcogcela ndzawonye umcondvo wesaga. Uma saga sakhiwe ngemagama lambalwa, siniketa umcondvo munye. Tibonelo:

Saga: Utawuyikhomba inkhosi.

Inchazelo: Utawulikhuluma licinso.

Saga: Lidvume lagwabula ematje.

Inchazelo: Abetfukutsele kakhulu alwa.

Uma saga sisidze, kuye kuvele imicondvo lemibili njengalapha:

Saga: Kwephana tidvumo nekwemana tidvumo.

Inchazelo: Bantfu badvuma ngaloko labakwentako noma kuhle noma kubi.

Saga: Kukhuluma koniwa ngumlomo.

Inchazelo: Lokoniwe kuyalungiswa ngekukhuluma.

Taga timisho ngekwato lengakwati kusebenta naleminye imisho kuvele imicondvo lemhle, levakalako nalehehako. Taga tiye tibonakale ekucaleni, ekhatsi nesezugcineni kwemisho.

Taga takhiwe tifo tenkhulumo letehlukene, kepha letigcamile ngusobito, sichasiso, silandziso nesikhanyiso.

Taga atiguculwa ngekwabanye nebunyenti, kepha tihlala tinjalo. Lesicanjwe sisebunyeni sihlala sinjalo. Nalesicanjwe sisebunyentini asiguculwa.

Taga takhiwe tinongo tenkhulumo letinyenti, kepha lapha sibuke sifaniso, sifanisongco, simuntfutiso, sicatsaniso, sifutankhamisa, sifanangwaca neseCamagama.

SEHLUKO 5

5.0 SIPHETFO SELUCWANINGO

5.1 SINGENISO

Lokuphawulekako kutsi taga tetilwimi tebaNguni letilandzelako: siZulu, siNdebele, siSwati nesiChoza ticishe tifanane kwehluke lubhalomagama nje kuphela. Tizatfu tekufanana kuba nguleti leti landzelako:

- kudzabuka ndzawonye.
- kuphila ndzawonye nekwakhelana.
- kuhlobana kwemasiko nemihambo.
- kuganiselana, kuchumana nekusebentisana.

Sisekelo sekufanana kuba buntfu nenhlonipho lengenaminyele. Umuntfu kuba ngumuntfu kucala embikwekwati kutsi ungumhloboni. Tive tebaNguni tiwahlonipha onkhe emakhosi ngekungakhetsi. Tiwahlonipha kusukela kubo Phunga naboMageba kuye kufinyelelwe engwenyameni lebusako nyalo. Tiwahlonipha kusukela kubo Dlamini wekucala emaSwatini kuye kufinyelelwe engwenyameni lebusako. Tiwahlonipha kusukela kuboMzilikazi, boMhlanga naboMusi kuye kugcina emakhosini labusako. Nangesheya kweNciba emaChozeni kwenteka lokufananako.

Uma sibuka saga lesitsi, libuniwa liseva lesisebenta etilwimini letinyenti ngaphandle kwekuntijintja lubhalomagama. Uma sibukisisa ligama lesibili liseva lelisuselwa kuleli kuva kufika imicabango leminyenti uma sicatsanisa ngekwetilwimi:

siSwati - ngiyeva.

isiZulu - ngiyezwa.

isiXhosa - ndiyeva.

isiNdebele - ngiyezwa.

5.2 SIPHETFO NGEKUCAMBEKA KWETAGA

Kucambeka kwetaga akusiyo intfo yalamuhla kepha yanyase. Tacanjwa kadzeni ngekubuka tintfo letinyenti eveni. Tibonelo:

Tintfoluvelo

S	Emehlo
S	Tindlebe
S	Timpfumulo
S	Lulimi
S	Tandla/Tinyawo

Imvelo

S	Tintsaba
S	Emawa
S	Emafu
S	Emagcuma
S	Lwandle

Lokumilako

S	Titselo
S	Tibhidvo
S	Tihlahla

Lokuphilako

S	Tilwane letindizako
S	Tilwane letihucutelako
S	Tilwane letinwabutelako
S	Tilwane letihambako

Kucanjwa kwetaga akunamkhawulo kepha kugcamisa emakhono esive ekusebentisa lulwimi ngendlela lenhle, leyemukelelako nalehehako. Taga tisetawucanjwa ngekubuka kutfutfuka kwemakhono elwati, temvelo, temnotfo, tekukhibika nekuvakasha nalokunye. Leto taga titawube tendvulelwe umlandvo, kufika nekucala kwemphucuko, tinhlobonhlobo tetinganekwane, tilwane nalokunye. Kucambeka kwetaga kuyincabhayi kulabo labakhuluma lulwimi lwesiSwati.

Umuntfu longesilo liSwati kuye kudvume etindlebeni takhe uma kukhulunywa ngekusebentisa taga. Saga siyindlela lemfisha yekuchaza simo sentfo nobe yekubeka inkhulumo ngendlela lefincako. Saga sijulile ngemcondvo sikhombisa indlela yekusebentisa emagama ngekuhlakanipha. Uma sicwaningisisa kahle, linyenti letaga tinemlandvo letiwucocako ngesive mayelana nekutsi kwasukelaphi kute sibe khona. Umehluko lomkhulu logcamako emkhatsini wesaga nesisho ngukutsi simo semagama esaga asigucuki.

- **Awumbiwa ndzawonye:** Nguloyo naloyo unelisu lakhe lekwanta intfo. Unelwati lwakhe lalufundza encenye.
- **Indvuku lenhle igawulwa etiveni:** Kuncono kuteka/kutsatsa umfati wasekudzeni.
- **Ngiswela emafahlawane kengitsambe:** Ngitfokote ngempela ngeswela timphiko tekundiza.

- **Ayishukwa imbeleko umntwana angakabelekwa:** Ungayilungiseleli intfo ungenalo liciniso layo kutsi itawulunga yini.
- **Yeka emandla esambane kumba umgodzi singawulali:** Kusebentela mahhala noma lite.
- **Sitayicela ivutsiwe:** Sitake sibone kutsi kutawulunga yini.
- **Itsi ingadla litsambo yetayele:** Umuntfu akadzeli kubuyela lapho ake wasitakala khona.
- **Imbilapho ivuna silondza:** Belusendvo bayavelana, bamelane ebulukhunini.

5.3 SIPHETFO NGETINGCIKITSI ETAGENI

Taga tenabe kakhulu ngobe titsintsa yonkhe imikhakha yemphilo. Leso naleso saga sihleleke ngaphasi kwengcikitsi letsite legcamisa buhle noma bubi, bukhulu noma buncane, inhlanhla noma likhombo, kwakha noma kubhidlita.

Taga tigcamisa imicondvo leyehlukene lesisekelo semphilo yemuntfu kanje:

buchawe	bugwala
inhlonipho	indzelelo
bunono	budlabha
kuhloba	kungcola
bugagu	bubhimbi
kutsandza	kutondza

Letinye taga tiye tivete imicondvo lefananako tibe tehlukene ngekwakheka.
Loku kwetayelekile emagameni esiSwati latayelekile nalahloniphako.

- Taga letimcondvofana

- s Umvundla tiyawuncandza embili.
- s Hamba tuba bayawukuhlutsa embili.

- Taga letimcondvophika

- s Linyenti liyabona bubendze.
- s Injobo itfungelwa ebandla.

Lapha akusho kutsi taga tiyavumelana noma tiphikisana sibili, kepha yindlela letivakala ngayo kugcane netimo letisetjentiswa phasi kwato.


Ingcikitsi yesaga ivela lapho sesiphimisiwe kwevakala kutsi lokhulumako ucondze kutsini, kubani, nini. Saga sibeka emavi kwekuvisisa kahle kutsi sitsini. Kubuye kugcane sihloniphiso ngendlela emavi labekwa ngayo. Tibonelo:

Saga: Emavi lazotsile	Inchazelo: Emavi lahlabako
Takhala kanye kwasa.	Akakahlakaniphi kahle.
Ubophainja netinkhuni.	Uyemana.
Indlu yeligagu iyanetsa.	Ukhulumela futsi akakwati kwenta.
Kugwabuke tincipho lamuhla.	Ukhuluma kakhulu lamuhla.
Imphi idle emahawu.	Wehlulekile.

Umcondvo wesaga uvela ngalokuphelele emuva kwekulandzela loku lokulandzelako:

- kuphinyiswa kwesaga
- kutfola inchazelo yesaga
- kutfola umcondvo lophelele wesaga nekusetjentiswa kwaso

Tingcikitsi letigcogcela ndzawonye imikhakha yemphilo nguleti letilandzelako:



5.4 SIPHETFO NGEKWAKHEKA KWETAGA

Leso naleso saga sigcamisa umdvumo lolandzelekako. Umdvumo uvakala kahle lapho sewutfolile kutsi sitsini saga nekutsi inchazelo yaso isifundzisani.

Umdvumo lonensako uvakala etageni letiphatselene nekufa letilandzelako:

- Lalani ngelinceba.
- Mhlaba kawunoni.
- Sitja lesihle asidleli.

Umdvumo losheshako uvakala etageni letiveta tebusha letilandzelako:

- Nalongenankhomo uyayidla inyama.
- Emakhuba alingene balimi.

Linani lemagama livefa likhono lekwengcisa umlayeto. Lomunye umlayeto wengciswa ngemagama lambalwa kantsi lomunye ngemagama lamanyenti. Taga letakhiwe ngemagama lambalwa tehlukaniseka kanje:

- Tenkhulumo lesebaleni
s Inyanga ayitelaphi.
s Lidloti liyabhekelwa.
- Tenkhulumo lebhacile
s Kufa butfongo.
s Iyawuphindza umdzaka.

Taga letakhiwe ngemagama lamanyenti tigcamisa loku lokulandzelako:

- Kuchaza
Ayikho ingwe lengenalibala lelimnyama.
IMfolozi lemnyama lekhetsa baweti.
- Kukhanyisa
Livi lemphofana livunywa muva.
Lenelifunga kayisengeli phasi.

Kwakheka kwetaga kuveta taga njengemisho lemifishane nanjengemisho lemidze. Imisho lemifishane isebentisa emagama lambalwa, kantsi lemidze kuba ngemagama lamanyenti.

Titfo tenkhulumo tibaluleke etageni njengeluphahla lwendlu. Leso naleso saga sakhiwe titfo tenkhulumo letitsite njengaleti:

- Sobito.
- Sichasiso.
- Silandziso.
- Sikhanyiso naletinye.

Tinongo tenkhulumo letetayelekile etageni kuba nguleti letilandzelako: sifanisongco, sifaniso, sicatsaniso, simuntfutiso netifutamisindvo. Tinyenti letinye tinongo tenkhulumo letitfolakala etageni kepha lekungakaphawulwa ngato kulolucwaningo ngesizatfu sekungabi tinyenti. Sibonelo: Sihabiso: Wadla lichudze lifile.

Lokubalulekile ngetaga kutsi teneka emaciniso emphilo kutsi avakale kahle kubo bonkhe bantfu. Tibonelo:

- Saga: Litsatsa losemsamo limphose emnyango.
- Inchazelo: Kwemhlaba kuyaphendvuka ngobe losemuva ugcina asembili, losembili agcine asemuva.

- Saga: Incola lengahambi ayikhonkhofwa tinja.
- Inchazelo: Umuntfu lowenta tintfo letingabonakali akawadvonsi emehlo ebantfu.

Taga tikhombisa emakhono laselizingeni lelisetulu ngaso sonkhe sikhatsi. Etibonelweni letingenhla emaciniso emphilo avetwe ngemicondvo lemibili lechumene: umcondvo wesingeniso (introductory idea) nemcondvo wesiphetfo (conclusive idea).

Umcondvosingeniso	Umcondvosiphetfo
Litsatsa losemsamo	limphose emnyango
Incola lengahambi	ayikhonkhotfwa tinja
Likhiwa lelihle	ligcwala tibungu
Inhlambi yemanti	imuka nemanti
Kubona kanye	kubona kabili
Itsi ingahamba	idle ludzaka
Umjuluko wenja	uphelela eboyeni
Indzaba yemakhosi	ayibanjelwa mlandvo
Kayihlatjwa mvusi	ihlatjwa embili
Yeka tindlela	kumila tjani

Lokugcamile kulolucwaningo kutsi taga tiyinka sisindvo inkhulumo yelulwimi ngaletizatfu letilandzelako:

Taga tiyinkhulumo leluhlelomagama leyakhiwe kuhleleka kahle kwetiffo tenkhulumo ngekutsi sobito achasiseke kahle ngesiphawulo, sibaluli, linani nebuniyo; alandziseke kahle ngesento nesibanjalo abuye akhanyiseke kahle ngesandziso nesentakutsi. Sibonelo:

Libito	Sichasiso	Silandziso
Libele	lendlela	kalivutfwa

Tiyinhlelembisomagama lesiniketa umcondvo lophelele ngekusebentisa imifanekisomicondvo lejulile futsi leyenta taga tehluka etinkhulumeni nasemavini latayelekile. Sibonelo:

Umndeni uyadla tibankhwa tetsamele.

Taga timisho lephelele lemifishane nalemidze legcogcela ndzawonye imicondvo. Timishogcogca ngobe tiyakwati kubutsela ndzawonye imicondvo leminyenti ngemagama lambalwa. Tibonelo:

Saga: Timbiwe yinsele yatishiya.

Inchazelo: Kuvele inhlanhla lenkhulu lebeyingakalindzelwa muntfu.

Saga: Inhlitiyo ibala iyabeka.

Inchazelo: Inhlitiyo icabanga lokwa nalokwa.

Saga: Insimba yesulela ngemfuku.

Inchazelo: umuntfu lomkhulu uvama kusola labancane ngetiphosiso takhe.

Saga: Khukhumba kati ufulile.

Inchazelo: Hamba nentfo yakho ngobe ucabanga kutsi utakwemukwa.

Saga: Kwehla ngemphimbo munye.

Inchazelo: Wonkhe umuntfu uyabuva buhlungu ngendlela lefananako.

Saga: Utfukuse indvuku emcubeni.

Inchazelo: Ufihlele umuntfu lisu lotawumehlula ngalo.

Saga: Ligundvwane alibekwa nelukhotsi.

Inchazelo: Ungabombeka umuntfu nentfo lesilingo kuye.

Saga: Liffumba liphola ngekwekhanywa.

Inchazelo: Intfo lekuhluphako emoyeni iphela ngekutsi uyikhiphele ebaleni.

5.5 SIPHETFO NGEMIBONO LEYEHLUKENE YETAGA

Ngesizatfu sekutsi abekho bacwaningi bemaSwati labatinikete litfuba lenelele lekucwaninga kabanti ngetaga, kubonakele kunesidzingo sekwenta lolucwaningo. Kubutwe emaSwati lalishumi nesishiyagalokunye kutsi tiyini taga. Timphendvulo tawo ngekutsi tiyini taga kube nguleti letilandzelako:

- ✿ Ngemavi lanotsile elulwimi ...
- ✿ Ngemavi lagcogcekile lasetjentiswa engcocweni ...
- ✿ Bucikomlomo nencenye yemasiko esive ...
- ✿ Tisekelo telulwimi nenjulalwati yesive. ...
- ✿ Yinkhulumo lenetifombemagama ...
- ✿ Yinkhulumo leshubile, lemnandzi, lehehako ...
- ✿ Imisho lephelele lefundzisako, lecondzisako nalekhutsatako ...
- ✿ Bugabazi besive bekuchumana ...
- ✿ Tiyinhlitiyo yelulwimi ...
- ✿ Tiyimphandze yelulwimi ...
- ✿ Tisilinganiso sekujula kwelulwimi ...
- ✿ Tilikhono lalabadzala ekucambeni nasekutfufukiseni lulwimi ...
- ✿ Tisibuko sebunjalo bemphilo emazingeni lehlukene ...
- ✿ Timisho lephakatsile ngekusho intfo ngendlela yebunkondlo ...
- ✿ Ngemagama lahlelekile ...
- ✿ Imifanekisomicondvo lehleliwe ...
- ✿ Yindlela yekubeka emavi lejulile ...
- ✿ Ngemaciniso emphilo langenakuphikiswa muntfu ...
- ✿ Yinkhulumo lehlonishwako ...

5.6 TINCOMO

Kumele kwatiwe kutsi taga letinsha tisetawucanjwa ngenca yetingucuko letifana naleti:

- kuntijintja kwenchubo yesive.
- kugucuka kwemasiko esive.
- kutfutfuka kwebuciko nebucwepheshe.
- kuhlanguka kwetilwimi netive letehlukene.

Kumele bacwaningi bacwaninge ngekucatsanisa taga ngetilwimi, ngetigodzi nangemave.

Kufanele kubukisiswe kusebenta kweluhlelo netincenye talo kuleso naleso saga, bese kuphawulwa ngalokujulile ngemiphumela letfolakele.

Budlelwano baleminye imibhalo netaga kumele buhlolisiswe ngenhloso yekuveta umehluko, kuhlobana nekufana. Kubuka taga njengembhalo lotimele kwenta silweswele lwati lolujulile lwekuchumana naleminye imibhalo.

Kuye kujabulise kubona taga tisetjentiswe kulo lonkhe luhlobo lwemibhalo ngenhloso yekuveta umnotfo welulwimi, bumnandzi belulwimi nebuhle belulwimi.

Kubukisisa kusetjentiswa kwetaga etindzaweni letehlukene: emakhaya, emphakatsi, etibhimbini nakuletinye tindzawo kuyincabhayi kubacwaningi. Kumele kucwaningisiswe ngetaga kugcilwe etindzaweni nasekusetjentisweni kwato.

Kubalulekile kutsi taga tifundziswa lapho kufundziswa Lulwimi lwasekhaya (Primary Language), Lulwimi Lolwengetiwe Lwekucala (Additional First Language) neLulwimi Lolwengetiwe Lwesibili (Additional Second Language).

Uma kufundziswa taga kumele kusetjentiswe indlela yeluchumano bese kulandzelwa imigomo yekufundzisa letsi kumele kucalwe ngetaga letilula naletatiwako kuyiwe kuletilukhuni naletingatiwa.

Emakhono ekukhuluma, ekufundza nekulalela kumele akhutsatwe ngekusebentisa taga ngendlela lefanele efindzaweni nasemikhakheni leyehlukene.

Kubalulekile kutsi taga fibukwe kuto tonkhe tincenye telulwimi letifana nelubumbomagama, inchazomagama, luhlelomisho naletinye. Ekugcineni kumele kuvele kuchumana lokuniketa umcondvo lophelele wesaga. Lucwaningo ngetaga kumele lutsatfwe njengemhlahlandlela walabanye bacwangingi lekufanele balutsatse njengencabhayi bahlute ngalokujulile lemikhakha lelandzelako:

- Tisho
- Umehluko ekhatsi kwetaga netisho
- Tiphicaphicwano

Kufundziswa kwetaga kumele kucale emabangeni abokhewane kuye kufinyelele etikhungweni temfundvo letisetulu, kubukwe yonkhe imikhakha yemphilo nekubaluleka kwato elulwimini nasesiveni jikelele.

IMITFOMBO YELWATI

- Abrams, M.H. 1981: A Glossary of Literary Terms. Tokyo: CBS Publishing Co.
- Bhiya, O.A. 1993: Cosi, Cosi lyaphela. Pretoria: Kagiso Publishers.
- Bryant, A.T. 1965: Olden Times in Zululand and Natal. Cape Town: Struik Publishers.
- Cohen, B.B. 1973: Writing about literature. Glenview Illinois: Scott Foresman and Company.
- Cuddon, J.A. 1979: A Dictionary of Literary Terms. Harmondsworth: Penguin Books.
- Fergusson, R. 1983: The Penguin Dictionary of Proverbs. London: Bloombury Books.
- Groenwald, H.C. 1990: Oral Studies in Southern Africa. Pretoria: HSRC.
- Kasenene, P. 1993: Swazi Traditional Religion and Society. Mbabane: Websters Publishers.
- Krige, E.J. 1968: The Social System of the Zulus. Pietermaritzburg: Shuter & Shooter.
- Libhayibheli LesiSwati. 1996: Cape Town: Inhlango YeliBhayibheli YaseNingizimu Afrika.

Lubisi, P.M. 2002: Kubuka Ngeliso Lelibanti Ligalelo Lemasiko Nenkholo Yebantfu Ekutalweni Kubusha Kwa-Afrika Kubukwe Ngco Sive SemaSwati. KwaDlangezwa: Unpublished PhD Thesis. University of Zululand.

Lubisi, P.M. 1992: Litfunga. Cape Town: Maskew Miller Longman.

Mahlalela, S.S naMabuza, E.J 1991: Emasisweni. Pretoria: Via Afrika.

Mahlalela, S.S. 1988: Lidlelantfongemi. Pretoria: Via Afrika.

Maphalala, S.J. 1985: Inaugural Address. KwaDlangezwa: University of Zululand.

Mathenjwa, L.F naMaphumulo, A.M 1999: Udondolo. Pretoria: Aktua.

Matsebula, J. 1972: A History of Swaziland. London: Longman Publishers.

Mavuso, M.P naMakhanya, C.N 1994: Ematfundvuluka. Pretoria: Aktua.

Msimang, C.T. 1994: Inkosi Yinkosi Ngabantu. Pretoria: Out of Africa.

Ncongwane, J.J. 1994: Ematekelo Ayitolo. Pietermaritzburg: Shuter & Shooter.

Ncongwane, S.J. 1995: Kwasendvulo kwalomuhla. Alberton: Bridge Publishers.

Nyembezi, C.L.S. 1974: Zulu Proverbs. Johannesburg: Wits University.

Simelane, M.D.S naThwala,J.J 1998: Izingxabo Zomhlabathi. Alberton:
Bridge Publications.

Simelane, S.Z naThwala, J.J 1991: Umsinsi. Kenwyn: Juta Publishers.

Thwala, J.J. 1986. Figures of speech in siSwati. Published article. Educumus.
Pretoria: DET.

Thwala, J.J. 1996: Emasundvu. Cape Town: Oxford Press.

Thwala, J.J. 1999: Umkhunsu. Pretoria: Aktua.